

DIBUULULA DYÀ YESÙ KILISTÒ

 Twasàkidila, wa manza tèntè, Mwanèètù Neville.
Nudi mwà kusòmabaayi.

² Ngeela meeji ne bààkamba musangu kampànda, ne: “Mvwa ne disànkà pààkangambilabò ne: ‘Tuye mu nzùbu wa Mukalenge.’”

³ Mpindyewu, nwatùfwilaayikù luse mutùdì katùyi ne myaba, anyì myaba yà disòmba, bwà bwônsò bàdì mwab’ewu aba, nènku pàmwàpa nebàvule mu lumingu lùlwalwà elu, bantu bààlwà, pùùmvwàbo bwà masangisha aa.

⁴ Kàdi kabingila kàà cikondo cyà pabwàcì eci kàvwa bwà twamònà mwà... Nyumà Mwîmpè uvwa mutèèke didimwija dyà ditwishiibwa edi pa mwoyi wànyì, ne: “Bivwa bìkèngela bwà Èkèleeziyà mu ditùkù edi kwikalaye ne Mukenji ewu.” Bwalu, ndi ngitabuuja ne m’Mikenji yà mitàmbe kwikala yà pabwàyì yà Bible, bwalu yìdi yìbuulula Kilistò mu Èkèleeziyà Wendè pa díbà edi.

⁵ Nènku, muntu kêna mwà kwikala ne diitabuuja anyì kumanya cìdìye wenza, anyi kuyaayàye to, ànu yéyè mwikale ne cikampànda, cintu kampànda cyà kushindikilayepu meeji èndè ne diitabuuja. Ki bwà cinyi, piìkalà Mufundu mutùbuulwile Kilistò mu matùkù à ndekeelu aa, ne ngiikàdilù wa cikondo, mbifwànyìne kutwenzela bìmpè bwà—bwà kuCikenketa ne kujandula ne tudi penyì.

⁶ Mpindyewu, tudi—tudi tuumva bibì be mùdì èkèleeziyà wetù kàyi mutàmbe bunène to, díngà ditùkù tudi tutèkemena bwà kupeta wa munène.

⁷ Nènku matùkù ànaayi a ndekeelu aa, nangànangà, a dilonga dyà cyôcì eci pa citùpà cyà maalu malonda cyà—cyà Mukàndà wà Bwàkabuulwibwà, Ndi mukapone pa bintu bîmvwà ncìyi mwà kwela meeji ne bìkaatukù byenzèke bulelèlà to. Nènku mbimfikishe too ne—ne ku dyumwva ne, paanyimà pàà *Bikondo Mwandamutekète byà Èkèleeziyà* ebi, mêmè mubijikije, Ndi njinga kwikala ne mulongolongo wa masangisha à mùshindù awu bwà kutwala “Èkèleeziyà mu—mulelèlà ne èkèleeziyà wa mashimi,” yónsò pàmwè, ànu mu maalu malonda ne mu Mifundù. Byenze bu musangu kampànda wûntù ndwangana, mu diyisha kampànda, bwà kwangata “Mvinyò mulelèlà ne mvinyò wa mashimi,” yìdì yìsanganyiibwa mu Bible. Nènku tudi...

⁸ Netwìkale mwà kuteeta bwà kupeta ndambù wa nkwasà, pàndì ngeela meeji bwà mùshindù wà bantu kusòmbabù apa. Nènku netùpete, netùteete bwà kupeta, ndambù mukwàbò wa nkwasà, bwà kuteeta kuuja bibambalu byà paanyimà ebi, ne

pambelu, ne ndambù mukwàbò eku ne eku, bwà twamònà mwà kusòmbeshaku ndambù mukwàbò wa bantu mu masangisha aa.

⁹ Mpindyewu, pa bwalu ebu, ndi muswè kulòmba muntu ne muntu wa kunùdì udi maalu aa makÙngàme bulelèlè, mmufwànyìne—mmufwànìne kulwa dîbà dyônsò ditwìkàlà mwà—mwà kuByùmvwija. Nènku ncyêna mufwànyìneku kubanga to, anyì mvwa ngeela meeji mêmè mwine ne... [Katùpà kàà mukàbà wà mèyì munda mutupu—Muf.] ... kubanga bwà... [Katùpà kàà mukàbà wà mèyì munda mutupu.]... Mukàndà munènà wà Bwàkabuulwibwà ewu wà... [Katùpà kàà mukàbà wà mèyì munda mutupu.]... Bikondo Mwandamutekète byà Èkèleeziyà. Kàdi ndi ngeeyemena Nzambì ne mwanyì mwônsò, bwà—bwà kucìmbuulwila pândì mfikakù.

¹⁰ Bwalu bulonda bwà mu bufùki ebu, bwikale bwà... bwangacila kùdì bafundi bâà maalu malonda bâà batàmbe kwikala bâà pabwàbù bândìku mumanye. Ndi mwadije mu bìrò byànyì mwàmwa, ànu mpindyewu ewu, mèyì a nsèka matwè ku ataanu anyì àsamboombò, *Baabùlona Yibidì* wà Hislop, *Mukàndà Wà Bafuile Diitabuuja* wà Foxe, ne mikwàbò mikàndà minènè; bu mùdì Nsangilu wa Kumpàla kwà Nicée, mikàndà mitwè ku yinaayi pa bwalu abu, mukàndà wônsò ne mabeji àamba kutwa ku nkama yinaayi. Nènku mwaba awu Nsangilu wa Nicée, ne maalu malonda ônsò atûdì pèètù mwà kupeta awu. Bwalu, paanyimà pàà cyôcì eci, kwangacila ku mukàbà wà mèyì, netûfunde dyela dyà nsèke pa Bikondo Mwandamutekète byà Èkèleeziyà, bwà kutuma pa buloba bujima, mutùdì mwà kukòòkeshila pèètù amu, bwalu tudi mu matùkù à ndekeelu. Tukaadi ku cikondo cyà nshìïkidilu.

¹¹ Kabuvwaku bwanji kungiimana ku mwoyi bikolè mùshindù ewu to ànu ku ma—masungulangana à ndekeelu aa, ne pashììshe mêmè kumònà mwaba utùvwà tusanganyiibwa. Pashììshe ke Nyumà Mwîmpè kubanga kunsokolwela, bwà—bwà kudimwija bantu, ne kuteeka cyôcì eci. Nènku ncyêna mwà kucyènza mu—mu èkèleeziyà bu nùnku, mu mùshindù mukumbane to. Nènku dîbà adi mêmè musòmba paanshì ne kuditwa ànu mu difundà dyà mukàndà... Ndi ndyùmvwa ne bu mêmè mwà kufika ku cyambilu, ne disonsodiibwa dyà Nyumà Mwîmpè munkaci mwà beena Kilistò adi kulwadì pambidi pàànyì, bwà kunkwàcishakù, dîbà adi ndi mufwànyìne kutàmba kukumbana bwà kufunda mukàndà awu pa dîbà adi, paanyimà pàà mêmè mumane kubyàngàcila pa mukàbà wà mèyì, bwalu kwàka tudi bafwànyìne kupeta disonsodiibwa dyàbì. Mikàndà, mu bushùwà bwà bwalu, neyìlongolodiibweku ndambù mu mùshindù kampànda, bwalu, apa, tudi twamba bintu bitùdì katuyi mwà kufunda mu mukàndà to. Ne pashììshe tudi... Ne tudi tuplicisha dîbà dipitepite bûngì mu dyambulula bintu twéetù biine, anyì ki mûntù ngenza's. Ne pashììshe, mu mukàndà, nebìlongolodiibwè byônsò. Kàdi netûteetè bwà

kubìteeka byônsò, ne mwètù pètù mwônsò amu, pa mikàbà yà mèyi.

¹² Mpindyewu, mikàbà yà mèyi, dilòòlò dyônsò, maalu mafûnda à kubala ne bikwàbò, nsongààlùme ayi neyìlkale naabi pambelu pàà nzùbu pààpa.

¹³ Mpindyewu, ndi mwa kwikala ncìyi ne mùshindù dilòòlò dyônsò to, bu mutwângàcì twêtù biine dipangadika bwà kuteeta bwà butumbi bwà Nzambi, bwà—bwà kutwàla Mikenji mwandamutekète yà èkèleeziyà eyi, anyì Bikondo Mwandamutekète byà Èkèleeziya, mu malòòlò mwandamutekète; kwangata dilòòlò dyônsò, cikondo cimwè. Bu mùdi, mu dimwè dilòòlò, Efeso; mu dìbìdì dilòòlò, Seemùnà; mu dísààtù dilòòlò, Peegàmo; mu dînààyi dilòòlò, Twatilà; mu dítàànù dilòòlò, Saadi; ne mu diisambòmbò dilòòlò, Filàdelefìyà; ne mu dyàlumingu mu dîndà ne mu dyàlumingu dilòòlò, cyà Laòdìkiyà, cikondo cyà èkèleeziyà citùdì ne mwoyi eci. Mfila maalu malonda à èkèleeziyà wa ku cibangidilu, ne—ne bafundi ne balongi bàà maalu malonda, ne banjèlo bàà cikondo aci, ne—ne mikenji, ne lwendu lwà èkèleeziyà, mudiye mulwè too ne ku cikondo eci.

¹⁴ Nènku bìdi bikemesha bwà kumònà mùshindù ùdì bwalu ne bwalu budyanjila kwamba bwônsò bwà Mufündu awu bùnwangana menemene ne maalu malonda, ànu menemene, ku meeji a cyôcì aci. Civwa mene cinkèmeshe bikolè be, mu mùshindù wà ne, makèèlèlè awu, mvwa mubale too ne pâmvwà ngumvwa byenze bu ne mésù àànyì avwa mûle àamba kútaayika. Ki mêmè kupatuka e kwambila mukàjàànyì ne: “Kacya ncitu mwanji kwelaku meeji ne bìdi mwà kwikala mùshindù awu to.” Nwamònù anyì? Mùshindù mwine ûvvwàbi bwalu bunène’s!

¹⁵ Nènku mpindyewu, misangu mikwàbò, ndi mwà kwikala ncìyi mufwànyìne kucijikija dilòòlò dimwèpelè to, èkèleeziyà, mukenji wà èkèleeziyà. Nènku mêmè ncìyi mwà kucijikija, dilòòlò to, dìbà adi nêncijikije pààcyabu mu dîndà dyàlonda pa dìbà dikumi jaajaaja. Nebacimanyishe dilòòlò dyônsò, kùdì aba bàdi baswè kulwa bwà kutèèleja citùpà cikwàbò aci, bwalu tuyàaya, tuteeta, bwà kubikwàta pa mukàbà wà mèyi. Néngenzè masangisha pashìshe kuumukila pa dìbà dikumi jaajaaja, mu dîndà, too ne mu nkànkàlà, mundaamuunya, bwà kuteeta kuwutwala, citùpà cikwàbò cyà mukenji aci, bwalu bàdi mwà kuwùkwàta pa mukàbà wà mèyi. Kabiyi...

¹⁶ Tudi bamanyishe ne kakwàkwikala masangisha à dyondopa to, bwalu tudi tuteeta kushààla mu cipaapu cyà cipròfetà cyà mu Bible. Dìbà adi, tudi benze disangisha dyà dyondopa ànu àbìdì àdi pansiì aa mwab’ewu. Pashìshe paanyimà pàà masangisha aa mamane kujika, dìbà adi netwìkale ne masangisha à dyondopa paanyimà mwaba ewu.

¹⁷ Kàdi mpindyewu ndi—ndi muswè kutòòkesha eci menemene, bwà muntu yônsò wàmòna mwà kuvùluka, ne mpindyewu, mu mwab’ewu, bìdi mwà kwenzeka ne binutape ne bìnùhulùmune pansi, ne bitùpèèshe twêtù bônsò dinyùkishiibwa dinène. Kàdi mêmè ndi mwambule bujitu, kabiyi bwà—bwà cíngà cintu to ànu kuyiisha kwà Dîyi. Aci, s’ ki kwajiki. Ànu—ànu kacya ngaakwàta ku Dîyi. Nènku misangu yàbûngì mbifwànyìne, mu bikondo byà èkèleeziyà ebi, mbifwànyìne kudìleejila pa dingumba dyà muntu kampànda. Nènku byôbi byenzè nànku, kî mbwena kwamba ne mbyenza bwà kufiitangana mèyi à àtapangana to. Bidi—bìdi ànu kwamba cìdì Mufundu mwambe, ne dibuulula dîndì naadi bwàCì. Nènku nwênu nwela meeji ne ndi mutùpàkane mu bwalu abu, dîbà adi kanushààdi bacindamine ku mwoyi to, nwânsambidilaayikù ànu bwà Nzambi wàndeejakù cìdì címpè, bwalu ndi muswè bulelèlè kwikalà mu bululàme.

¹⁸ Ne pashiìshe cikwàbò cintu, mu kujingulula bujitu bûndì naabu, mu—mu disangisha bu edi nùnku ewu, bwà kulongesha bantu, ne Nyumà Mwîmpè neàndumbùlwìshe bwà mèyi ândì ngamba mu cyambilu emu. Pa nànku nudi numòna mutùdì tulenga bwalu ebu byà kakùyi tuseku to. Mpindyewu, wetù . . .

¹⁹ Nùnku’s mvw’á kuswa kwenzela cyôcì eci mwaba mukwàbò wà cyanàànà. Kàdi, bu mùdìbi ne ndilongesha, dîbà adi mu wètù . . . Mu masangisha à butangadiki à pambelu, muntu ne muntu wa kutùdi ùdi ne mmwenenu kampànda anyì—anyì dijingulula, anyì wa bwena utukù mu cikondo cijima eci, ne tudi ne èkèleeziyà yètù twêtù, ne bìdi èkèleeziyà yètù ayi yìtulongesha, ne bitùdi twitatuuja. Tudi . . . Ncitu muswe kubwela mu èkèleeziyà wa muntu mukwàbò, anyì munkaci mwà bantu mùshindù awu to, ne kwamba cintu kampànda cyà cibèngangane ne mùdì bantu balongeshììbwe. Bwalu, ndekeelu wa byônsô, ntu nkaadi mwakule patòòke ne . . .

²⁰ Muntu yéyè mwikale mwena Kàtòlikè, ne yéyè mweyemene Èkèleeziyà wa Kàtòlikè bwà lupandu, mmujimine. Yéyè mwikale Baptiste, ne mweyemene Èkèleeziyà wa ba-Baptiste, s’mmujimine. Anyi mwena Mpenta, mweyemene Èkèleeziyà wa Mpenta awu bwà kumusÙngilaye, s’mmujimine. Kàdi . . . Èkèleeziyà kanà yônsò ewu’s! Kàdi muntu nkààyà awu yéyè mwikishile ne dîsù dikolè pa diitabuuja mu byenzedi bijikija byà Kilistò ku Kàlvariyò, mmusÙngidììbwe, nànsha yéyè mwikàlé wa mu èkèleeziyà kaayi. Bwalu: “Ku diitabuuja nkunùdì basÙngidììbwe, ne ciine aci ku ngâsà.”

²¹ Mpindyewu, misangu mikwàbò, mu kwenza kwà cyôcì eci, dîbà adi nêngeele meeji, mu nzùbu wànyì sungasunga mukesi ewu utùvwà babange kukaadi bidimu byàbûngì, ànu ne mushiki wa kale wà mabwe à nshàmenda ne bikwàbò, nènku bwêtù twêtù ùdi bu mwaba wa cijila. Katwena baswe, nànsha byà munyi, baswè kucimòna cishintuluke to, bwalu ewu ki mwaba wà kumpàla wàkabanga Nzambi kutwilangana neetù, mpatuvwa

mene katùyi nànsa beeble mabwe pansi pèndè apa to. Kàdi mbi—mbikafike mu cipidi cyà ne mpindyewu too ne mukààdii ùkùlakaja emu, ne tudi ne ndongamu wa lwibaku—lwibaku mwab'ewu, bwà kupatakaja èkèleeyìà eku ne eku kwà mwaba wônsò ewu's.

²² Mpindyewu, ne patwàmba kufikila ku diine dîbà adi, ndi ndyùmvwa ne pândì mfûma mu budimi bwà bwambi, pândì nciyi mwà kutapa bânà bëètù ku mwoyi ne, anyì, mayiisha ne bikwàbò to, dîbà adi bïdi bìmpèèsha bukenji bwà kwamba patòòke mmwenenu wanyì mêmè sungasunga, mu—mu wanyì... mu cyambilu emu. Ne pa nànkú wêwé mwambe ne: "Ndi mulongeshìlbwe mu mùshindù mushìllàngànèku ndambù," Ndi mufwnayìne... Ne pashìishe, mu cyôcì eci, tudi ànu tubìikila muntu kanà yônsò udi muswè kulwà awu. Nwamònù anyì? Kakwena muntu nànsa umwe udi ucítuudila mfranga to, anyì nî ncinyì cyônsò. N'Tabernacle ewu's. Nènku muntu yônsò udi muswè kulwa awu, tudi tumwakidila ànu bîmpè bwà kulwaye. Lwâku wêwé ànu kulwa. Pa nànkú ndi nnulòmba bwà nulwe ne Bible wenù, mu disangisha dyônsò, ne nulwe ne kìdiyô ne dibeji.

²³ Nènku mpindyewu, ne mèyì ônsò à dyela naawu nsèke ne bikwàbò, ncivva nkumbana bwà kutwàla mikàndà yônsò ayi to. Pa nànkú ndi ànu mufunde, mufunde apa, musangu wônsò, pa dibeji kaaba aka, tuntu tukesè tûndì mwangate mu maalu-malonda ne dyela dyà nsèke, ne bikwàbò, bîndì mufwànyìne kukùmbana ànu mwà kubìbadila mu—mu tuntu tufunda etu etu, pamutù pàà kwangata mukàndà ne kubanga kubuulula mabeji awu. Kàdi, pakààdibi bïkafika ku Mifundu, netwangate Bible. Nènku pashìishe mu dyela dyà nsèke, nêngùmvwije; anyì mu maalu-malonda, ne mmufundi kaayi wa maalu malonda uvwa mucyàmbe, ne bikwàbò. Dîbà adi mu... Mu bushùwà bwà bwalu, bwà mukàndà wikalà ne cyà kulwa awu, mòna's, dîbà adi's tudi mwà kuwùfunda bîmpè ku cyamù dîbà adi, ne biikale mwà kupeta byônsò byenza mùdìbi bìkèngela.

²⁴ Mpindyewu, netwènzè ne mwetu mwônsò bwà kubanga kumpàla kwà dîbà ne kupatuka kumpàla kwà dîbà mu mìshindù yônsò. Necììkale matükù mwandamukùlù, à masangisha, kubangila ku dyàlumingu too ne ku dyàlumingu dikwàbò.

²⁵ Mu dîndà emu ndi mbanga ne nshapità wa 1 wa Bwàkabuulwibwà, wa Mukàndà wà Bwàkabuulwibwà. Ne Bwàkabuulwibwà mbukosa mu bitùpà bisatu. Nènku nshapità yìsatu yà kumpàla ki yitwikala ne cyà kukwàta naayi mudimu mu matükù mwandamukùlù aa. Pààbì, cikondo cyà èkèleeyìà cìmwèpele cìdi mwà kutwangata ngondo mujimà. Kàdi netùlenge ànu myaba yà maalu manène, bu mutùdì mwà kucibìikila's. Dîbà adi panùdì nupeta mukàndà awu, nebiìkale bitàmbe kufundiibwa, ku kantu ne kantu.

²⁶ Mpindyewu, Bwàkabuulwibwà, nshapìtà yisatu yà kumpàla ayi, yìdi yàkula bwà Èkèleeziyà, pashìishe Èkèleeziyà ùdi ùùmuka mu cyalu. Katwèna tuMumònà kàbìdì too ne ku cikondo cyà nshììkidilu. Kuumukila ku Bwàkabuulwibwà 1 too ne ku 3, ki Èkèleeziyà; Bwàkabuulwibwà 4 too ne ku 19, ki Izàlèèlè, ditunga; ne 19 too ne ku 22, bìdi byônsò bibìdì, pàmwè. Ne bipupu ne madimwija, ne bikwàbò, ku ndekeelu! Bitèèkìlbwe mu bitùpà bìsàtù. Nwamònù anyì? Nènku tudi twangata nshapìtà yisatu yà kumpàla, yìdi yàmba bwà Èkèleeziyà ayi, ne cikondo cyà èkèleeziyà citùdìmu ne mwoyi eci.

²⁷ Mpindyewu, dyàmbedi, bìdi mwà kumweka bu byûmàkane bwalu bìdi bìkèngela bwà twétù kwalukila cyànyimà bwà kutèèka cishìmikidi. Ndi musamble ne mulonge, ne mwenze byônsò bìmvwà paanyì mwà kwenza abi, bwà kuteeta bwà—bwà kupeta meeji à Nyumà Mwîmpè, mùshindù wà kuteeka cyôcì eci, bwà bantu kucimònabo, ne, bwà mu dicimònà amu, nwafwànyìna kwikala batòòkeshììbwe ne nwénù kutàmba kuseemena kùdì Kilistò, bwalu tudi ku cikondo cyà ku nshììkidilu.

²⁸ Nènku ncintu cyà cikemesha be, bu mûmvwà ndonga maalumalonda, bwà kujandula mùshindù wàkabanga èkèleeziyà awu, ne mwàkayàye kule, ne bìvwa byenzeke, ne kumònà Dimiinu dikesè dyà Nzambì adi dikwata mudimu munda mwà cyônsò cyà ku bikondo byônsò abi; too ne mwàkajiminaDi, pabwipì ne dyônsò, mu mwaba kampànda.

²⁹ Mpindyewu, mààlabà dilòlò, netùbangilè, ne netwìkale ne—netwìkale ne ci—dizola kampànda kaaba aka; kî ndizola to, kàdi mbôdì, bwà ngààmònà mwà kucilongeshila ku mbôdì. Ngeela meeji ne mulongeshi wa kàlaasà kàà Dyàlumingu, umwe wa kùdìbo, ùtu ne mbôdì wa kufundila. Ntu mmumònà mundeelu mwàmwa. Nebìkèngèle bwà mulami wa ku ntempelu kumuntwadilaye, kumutèèkaye lwà apa mu mpàla emu, bwà ngààmònà mwà kulongeshila ku mbôdì awu, ne kucifùnda bwà nwénù kwikala batwìshììbwe. Nènku udi mwà kucizola pa dibeji dyèbè, ne bikwàbò, ne kuciseemeja pabwipì mutùdì mwà kuciseemeja amu.

³⁰ Kàdi ndi muswè ànu kwambakù ànu eci kumpàla kwà kubanga: Pa kumònà mbangilu wa cikondo cyà èkèleeziyà eci, ne pa kumònà mùvvà bàpostòlò, ne malongesha, ne bintu byàkalongeshàbo abi, ne mèyì makulu à Bible; ne pashìishe pa kumònà ne èkèleeziyà awu, mutangile bu ku mulongo mwibîdì wà bàpostòlò, mwàkatwadijaye kujimija, dilongesha dishuwashùwâlé, dilelèlè adi; mulongo mwisâtù, kutamabaye kuya kule; ku mulongo mwinâyì, kujiminaye ne kukabwela mu—mu civùmvù, èkèleeziyà kulela èkèleeziyà wa civùmvù.

³¹ Ne pashìishe Èkèleeziyà mûle tente ne Nyumà! Byôbì biine, ndi ngamba bwalu ebu ne kaneemu kàà difwànà dyà

Nzambì bwà ntèndeleelu wa muntu yônsò. Kuumukila ànu ku cibangidilu, too ne mu cikondo eci, Èkèleeziyà mulelèlè, wa bushùwà ùvwà ànu ng'Èkèleeziyà wa mpenta. Mbulelèlè. Nzambì wàkalaminyina Èkèleeziyà ewu.

³² Kàdi mêmè ntu ànu ndikonka misangu yàbûngì, pààkamba Yesù dîyì adi, wàmба ne: “Kanùcìnyi to, nwénù kasùmbù kakesè kàà mikòòkò, ndiswa dyakàne dyà Taatù wenù bwà kunùpeesha bukalenge.” Ntu misangu yônsò ànu ndikonka civwa aci ciswa kumvwija, kàdi ndi ncyúmvwa mpindyewu’s.

³³ Lumingu lushààle elu tuvwa benze disangisha mu Shreveport, mu Louisiane, disangisha dyà ditàmbe bunène dyà mu nyumà dîmvwàku mubwele kacya, bwà kacya bandela. Shreveport!

³⁴ Mvwa... Mvwa ne ndambù wa matùkù à diikisha, nènku mvwa moye mu Kentucky ne Mwanèètù Wood ewu, umwe wa ku balami bâà mu èkèleeziyà, anyì balubuludi's we, bwà kulemba nyama. Twêtù kubwela mu meetu.

³⁵ Mvwa mwase nshìndì wa kumpàla. Ki mêmè kwamba ne: “Nênganjì ànu kwindila,” bwalu muntu kampànda mmupicilemu ne yìmwè mbwa. Ki mêmè kwamba ne: “Nênganjì ànu kwindila too ne pààpatuka nshìndì mu milundu. Kubàndayi lubilu mu micì amu, mu milundu ayi, kàdi kusokomaiyì mpindyewu.” Mêmè kwamba ne: “Pààpatukayi... Mêmè nênsombè apa bwà kwindila.” Bwalu kùdi mashika à menemene ne à makolè, ne macì àmba kutuuka. Kàdi, nudi bamanye’s, mpeepèle yèbè yà—yà mikole yipicila mu mpòngò amu’s. Mêmè ne: “Nênganjì ànu kwindila too ne pààpatukà nshìndì.”

³⁶ Ndi mwenze ànu ntwà nyimà pansi, s’ki Nyumà Mwîmpè kwamba ne: “Juuka, nda lwà mu mwaba unùdì nubiikila ne ‘lupòngò lwà mwena manayi mwîmpe.’ Nêngààkulemù neebè.”

³⁷ Ki mêmè kuya mu mwaba awu ûmvwà mwinyike ne “lupòngò lwà mwena manayi mwîmpe.” Bwalu, cîmvwa mwinyikile mpòngò ayi dinà, mêmè mwine, mbwà ngamònà mwà kumanya mwaba ûmvwa nsanganyiibwa. “Lupòngò lwà mwena manayi mwîmpe,” bivwa mbwalu bavwa ne... Mvwa mubwele muntwamu ne kumònà nshìndì dikumi ne yìsambòmbò misòmbè ku mucì; kwasa bûngì bungaanyishila, kushiya mikwàbò ayi mwaba awu, ne kukwàta njila kuya. Nènku aci’s ki dinàya adi, mwà kudyenza. Nànkü dibà adi mêmè kucibìikila ne: “lupòngò lwà mwena manayi mwîmpe.”

³⁸ Ki Yéyè kuntèèlala ne: “Mwaba útù ubìikila ne ‘lupòngò lwà mwena manayi mwîmpe awu.’” Kî n’Yéyè uvwa mulùbìikila to, kàdi mêmè nguvwa mulùbìikila nànkü.

³⁹ Pashìlshe mêmè kuya lwà ku mutù kwà lupòngò alu ne kusòmba mwinshi mwà mucì wà lusanga lutòòke, ne kwindila bu citùpà cijima cyà díbà, kàdi cintu nànshapu cimwe cyà kwenzeka. Mêmè kudyàdija pansi, kupona mikookwela pansi

mêmè mwine, kwela byanza muulu. Ki kushììshaYe kwakula naanyì.

⁴⁰ Nènku pààkenzaYe nànkú, Mèyi àkambuulwilaYe, pa Mufùndu mwine ewu utùdì ne cyà kufikaku mu dìndà emu ewu, Ncivwaku kacya mwanji kucimòna kwônsò aku to, kacya bândela.

⁴¹ Nènku pashììshe pângààkafikà ku Shreveport, mu Louisiane, mukàjì kampànda udi mukàjì mwikale ne mapà, dînà dyèndè m'Mandamu Schrader . . .

⁴² Kukaadi bidimu byàbûngì, pààkatuutakeena naanyì Mwanjèlo wa Mukalenge lwà kwinshì ku musulu eku, bwà musangu wà kumpàla, ne kumwènèka mu Bukénkè abu, ne Mèyi àkambaye mwaba awu; paanyimà pàà bidimu dikumi ne cìmwè, pângààkabwelà mu disangisha kampànda, mukàjì mutekète ewu wàkajuuka ne kwakulaye mu myakulu ne kwandamunaye. Civwa mmwaku ku mwaku cintu cìmwècìmwè cyàkamba Mwanjèlo aci.

⁴³ Nènku mukàjì mutekète umwèumwè ewu, pângààkabwelà mu tabernacle ku . . . anyì mu mwaba mwine wà ku Shreveport wutuvwà tusanganyiibwamù ewu, Life Tabernacle, Nyumà Mwîmpè kupwekaye pa mukàjì awu ne kwàmba ku mwaku ku mwaku cyàkangambilaYe lwà pa kakùnà apu. Dîbà adi Nyumà kubanga kunyunga ne kufila dikudimuna, ùdyanjila kwamba maalu ku dibuulula, ku cipròfetà, bintu bivwà mwà kwenzeka mu disangisha dilòòlò dìvvà dilondà adi, kàdi musangu nànsha ûmwè kabítukù byanji kupangila to.

⁴⁴ Kumpàla kwà cyôcì aci, mukàjì mutekète kampànda kuuukaye mu disangisha amu, mukàjì kampànda wa ba-Baptistes kulwaye mwaba awu kàyi mumanye civwàye mwà kwenza to. Nènku ûvwa mwimane munkaci mwà disangisha ne Nyumà Mwîmpè kumutuulukilaye pambidi, ki kubangaye kwakula mu myakulu, mukàjì kampànda wa ba-Baptistes wa mu Èkèleziyà wa ba-Baptistes wa Dyàmbedi wa mu Shreveport. Ne pashììshe kàvwa mumanye civwàye mwenze to. Nènku dîbà adi, kumpàla kwà yéyè kwamba ní ncinyi ní ncinyì, Nyumà Mwîmpè kufila dyandamuna, kwamba ne: “EMU MMUDÌ MUKALENGE WÀMBA, ‘Munda mwà ngondo yìsatù, nekwìkale Nyumà wa Môsà, Eliyà, ne Kilistò, munkaci mwà kukwàta mudimu mu tabernacle emu.’” S’ki cyôcì aci cyenzeke, ànu menemene.

⁴⁵ Muntu mulùme baptiste kampànda wa ku Meridian, mu Mississipi, kwenzaye ne àteekà cyanza cyèndè pa frigo wendè, bwà kupatula cintu kampànda mu frigo amu, ki Nyumà wa Nzambì kumupwekela pambidi. Ne yéyè wàkaakula mu myakulu, kàyi mumanyè civwàye wènza aci to. Nènku kumpàla kwà yéyè kupeta . . . kumpàla kwà yéyè kuumvwa civwàye wenza, Nyumà Mwîmpè kwakula kwamba ne: “Nda ku

Shreveport, mu Louisiane. Musadidi wanyì neàkwambile cyà dyenza.”

⁴⁶ Ki kulwaye mwaba awu, kwambaye ne: “Ebu bwalu ncyêna mbuumvwakù to; kacya kabùtu bwenzekekù nànsha.” Kaa, ekèlekèle!

Tudi ne mwoyi mu matükù à ndekeelu pabwîpì menemene ne Dilwa dyà Mukalenge.

⁴⁷ Èkèleeziyà mukesè awu ùtu misangu yônsò ànu wa banyààbanyà, wa Mpenta awu. Ncyêna nswa kwamba dingumba dyà beena Mpenta adi to. Kí ndîndì nswa kwamba to. Kàdi, mbantu bâdi ne dilabula dyà mpenta! Mpenta kî mbulongolodi nànsha. Mpenta ndilabula didi diya kùdi ewu yônsò udi muswè. Mwena Kâtòlikè, mwena Yuda, muntu ucìdi witabuujilakù, ba-Méthodistes, ba-Baptistes ne: “Ewu yônsò udi muswè, àlwè.” Ndilabula didi muntu nkaaya... Nzambi kàtu ùkwàta mudimu ne dingumba to, Yeyè kàtuku nànsha ùkwàta mudimu ne bàà Bisàmbà byà bendè bu—bu cisà anyi cisàmbà kampànda to. Üdi ùkwàta mudimu ne bantu nkààyà ne: “Ewu yônsò udi muswè.” Ikale mutòòke, mufiìke, wa kalaabi, mufikuluke; Méthodiste, Baptiste, mwena Mishòonyì, mwena Kâtòlikè, cyônsò cidiye aci: “Àlwè,” nî nganyì yônsò. Ndi ne disànkà dyàbûngì bu mudiYe mucyénzè müşhindù awu. Ndi...

⁴⁸ Ànu muvwa muntu awu mwambe musangu kampànda ne: “Mbipìciìbwé ne mêmè mMuumvwa wamba aci pamutu pàà kuteela dînà dyànyì ne: ‘William Branham àlwè,’ bwalu nkufwànyine kwikala bakwàbò baa William Branham. Kàdi pààkamba Ye ne: ‘Ewu yônsò,’ ndi mumanye ne aci ncincangate.”

Pa nànku müşhindù awu ke utùdì bwônsò mwà kudyùmvwa ne: “Ewu yônsò udi muswè, àlwè.”

⁴⁹ Mpindyewu, ndi mumanye ne kùdi bantu bààbûngì munkaci mwà kwindila pambelu apa mu nzùbu yà bilaala-beenyi ne bilaala-beenyi byà bàlaminyinamu màshinyì, bâdi bàfumina pa buloba bujima. Nwamònou anyì? Kùdi bantu mwab’ewu bafumìne ku Irlande ne mu myaba mishìlèshìllàngane, bindile bipungidi ebi. Kàdi ncyêna mwà kubyangata mpindyewu mene to. Ndi muswè kufila dîbà dyànyì ku cyôcì eci, bwà nwènù kuumvwa.

⁵⁰ Pândì mfuma ku ngendu eyi, ndi ngààlukila nangananga bwà kupeta—kupeta muntu kampànda wa kukwàcila mudimu, bwalu bâtu balama bipungidi. Kàdi mpindyewu mene bìdi bikèngela bwà twêtù kubiteeka ku luseka bwà Cyôcì eci.

⁵¹ Mpindyewu, cintu ànu cìmwèpele kumpàla kwà twêtù kubanga Mukàndà ewu. Ku cibangidilu kwakadi Èkèleeziyà wa Mpenta. Èkèleeziyà wa Mpenta awu wàkapàtuka mu bukolè bwà Nyumà ne kufunda Mukàndà wà Byenzedi. Musangu mwibibì, údi ubanga kukèèpela, èkèleeziyà kulwa wa kwîsùkwîsù. Cikondo ciibidì cyà èkèleeziyà, cìvwa ànu bintu byà kwîsùkwîsù

byètù byà menemene ebi, kàdi kaaDimiinu kakesè kàà Mpentaaku kavwa ànu katungunuke ne kulwa, kàà nyumà. Pashiìshe kubwelaci mu bikondo byà mìdimà, byà bidimu bitwe ku cinunu ne nkàmà yinaayi ne byà mu njila, cyà dikèngeshiibwa dyà mìdimà. Cikondo cikesè cyà Mpenta aci kutùngukaci ànu ne kwikala ne mwoyi ku cyôci aci. Mùshindù mwine ùdici cipandukè, kanunkonkiku to. Civwa neyanza cyà Nzambì, cintu cìmwèpelè civwa mwà kwikala cicyenze.

⁵² Bwalu, bàkabàpoopela, ku makunji. Nènku kwangatabò bantu balùme ne kubiinamijabo pa—pa cikuuku, ne kwangatabo mpoopo ya micì e kubafinyikabo mu mikòlò, kàdi kulekela nyama, mbwa, yibadiila lwànyimà, yibatuulakaja mala, kumpàla mene kwà kufwàbò. Kwangata bantu bakàjì, kubàkosa mabèèle, ne lushoola mùshindù ewu, dibèèlè dyàbo dyà dyàbalùme adi, kàdi biimana ne balekela mashi awu ànu àtuuta lubòlèèlè pansi, too ne mudibo batuula nkindà. Bàngata bânà mu mafu à baamaamù bwà kwelela mbwa ne ngulube, piine apu mbôbò ànu babàtàngile's. Wa bwalu bàmba muvwaci bwena Kilistò; kàdi's Bible mmwambe, ne Yesù wàkamba ne: "Nebyènzeké ne nebììkalè mwà kunùshipa, beela meeji ne bávva bènzela Nzambì mudimu." Nwamònú anyi?

⁵³ Nènku mpindyewu cintu aci ncilambe too ne mu cikondo cikwàbò. Ki ndekeelu wa byônsò kupatukaci. Pashiìshe tudi tumòna ne pàvwà èkèleeziyà ùpatuka mu dilongolola amu, kulalukaye ànu kulaluka, kubangila ànu musangu awu, ne kuyayè kule ne Nyumà, kuyayè kule ne Nyumà, ànu nànkú too ne ku cikondo cyà ndekeelu eci pakaadiye pabwípi ne kudyenza cimuku ne kwenza cimfwànyì cyà nyama wa lwonji.

⁵⁴ Kàdi Nyumà mukesè awu neikale ne mwoyi munda mwà myoyi yà bantu too ne pààlwà Yesù. Bikèngela bwà kwikalabi nànkú. Lamààyì aci mu meeji.

⁵⁵ Netùcizole pa mbôdì pààpa, kwangata maalu-malonda ne bikwàbò byônsò, bwà kunuleeja ne bidi ànu mùshindù awu menemene. Nenwàngate maalu-malonda, nwènù biine, bwà nucìbale. Numònè cìdì Bible mwambe, ne pashiìshe cìdì maalu-malonda mambe. Numònè mùdici cìpetangana ànu menemene mùshindù awu. Kaa!

⁵⁶ Katùteeciku bwônsò kwangata eci ànu bu dilonda dyà bwalu to, kàdi ne dísù dikolè, ne dísù dikolè twangate madimwija à Nyumà Mwîmpè bwà kusambilà, muunya ne bufuku. Kanulekediku cintu nànscha cìmwè cinupangisha bwà kusambilà to.

⁵⁷ Patùdì tuditwamù, netùpatulemu nsòmbelu yà bantu banène bàà kale wàwa, ne mùshindù wàkadikèngeshabo. Neùmòne mùshindù ùdì cyûdì wêwè mwenze cikese. Bitu bimfikisha ku didyùmvwa mêmè mwine bundu misangu mikwàbò, mùshindù ùdibi bìkèngela bwà twêtù kwikala ne bintu byônsò ànu

bipeepèle nùnku ewu, kàdi bôbò bààkapeta bintu byônsò ne lutàtu. “Bààkalalakana,” mwâkamba Pôlò mu Ebèlu 11, “bavwâle bisèbà byà mikooko ne byà mbùji, bakengeshìibwe ne batàcìshìibwe, banyengibwe byônsò.” Bujaadiki bwètù nebwigakale cinyì kumpâla kwà bwàbù’s? Mmùshindù kaayi wìkalàbu ku luseke lwà aci’s? Kàdi twêtù bìkèngela twikale ne bintu byônsò ànu byà bilenga.

⁵⁸ Mpindyewu, ànu bwà kaneemu cyanàànà, bangabanga ne twêtù kubuulula Mukàndà, ndi njinga bwà twêtù bônsò, bâdi mwà kucyenza abu, kujuukilaku ànu kuulu katancì kakesè cyanàànà bwà disambila. Mpindyewu ne meeji matòòke a mu mwoyi wèbè, nunganaku mwaku wà disambila bwà...kùdì Nzambi.

⁵⁹ Mukalenge Nzambi, Mufuki wa maulu ne buloba, Mfukyamukele wa Mwoyi wà Kashidi, ne Mufidi wa mapà ônsò mîmpè ne mapwàngane. Tudi baswè kuKulòmba, Mukalenge, dyàmbedi, bwà kutùfwilaku luse ku dibenga kucyùka dyètù dyônsò dyà myanda, ne ku mpèkaatù yètù ne matomboka ètù biKwenzela, ne benzelangane muntu ne mukwèndè ne bakwètù.

⁶⁰ Swàkukù bwà cikondo cikesè cyà didisanga eci kaciìkadi ànu bwà diibakiibwa dyà misùùkà yètù twêtù nkaayaayi to, kàdi swàkukù bwà bìikale bwà kutùtòòkeshila mu mùshindù wà, ne kutùpa disonsodiibwa, mu mùshindù wà twàya kambila bakwàbò. Swàku bwà cììkàle cikondo cyà didilambulula, biikale tudisanga ne Mubidi wà Kilistò mu kaabujimà ne biikale badilongòlole bwà Dyambwibwa.

⁶¹ Taatù Nzambi, kî nku njiyà yàànyì mêmè mwine to, mumanye ne musadidi Webè, ne basadidi bakwàbò bwônsò aba, kî mbakumbane bwà mudimu munène ewu to. Tumòna muvwa bantu banène, bàà kale, bapete bujitu pa myoyi yàbo bwà kuteeta kubuulula Eci, anyi bwà kwela nsèke pa Dibuulula dinène edi; dîbà adi tudi tufika ku dyumvwa ne tudi, bapite ne mùdìbo, katùyi bakumbane to. Kàdi Wêwè ke dyètù dikùmbànyina.

⁶² Nènku ndi ndòmba, Taatù wa mu Dyulu, bwà Wêwè kwenza cintu kampànda cyà pabwàcì munda mwà dîbà edi, bwà Nyumà Mwîmpè kwikalàYE ne bukòòkeshi pa mwoyi ne mwoyi wônsò. Tengùla mishiku yìdì yàkula ne maci àdì atèèleja. Nènku pààjika cyônsò, ne twêtù kucilambula Kûdì, swàku bwà tupatukeku ku mushiku wà mbèlù wà nzùbu ewu, twenda twamba ne: “Bivwa bîmpè bwà twêtù kwikalapù’s. Nyumà Mwîmpè mmwakule neetù patùvwà basòmbe mwaba awu apu. Nènku mpindyewu tudi bakange mwoyi bwà kwenza cyônsò citùdì mwà kwenza pàcidì Makénkè à dilòdlò munkacì mwà kuteema.” Enzàku nànku, Mukalenge.

⁶³ Swàku, mu disangisha edi, bwà kufikisha balùme ne bakàji ku dipeta dyà lukunukunu, mu mùshindù mupyamùpyà.

Swàku Ùjuulà baakudi bâà mu myakulu, bandamunyi bâà myakulu. Swàku Ùjuulà mapà à cipròfetà, Juulaku bayiishi, bampaasatà, batangadiki, ne bikwàbò, bwà Èkèleeziyà wàmònà mwà kwibakiibwa. Juulaku ba-missionnaires bwà kuyabò mu budimi bwà bwambi mwàmwa ne kutwàla Èvànjeeliyò wa butumbi ewu. Kwônsò kwàyà Dîyì aku, swàku bwà Dyàmata mu buloba bwîmpè, dipàtula makwàbò lukama, bwalu tudi twitabuuja ne tudi ku ndekeelu wa cikondo. Dikùmbana dyà maalu ônsò dikaadi pabwîpì.

⁶⁴ Twéñzèlèku bintu ebi, Taatù. Ne kumutù kwà maalu ônsò, Mukalenge, pa dîbà edi, Nkwacisheku, mêmè mwena lukengelu ewu. Bwalu ndi ndòmba nànku, pândì ndilambula Kûdì bwà masangisha aa apa, mu Dînà dyà Yesù Kilistò. Amen.

[Mwanèètù wa bakàjì kampànda ùdi wakula mu mwakulu mukwàbò, mwanèètù wa balùme kampànda ùdi wandamuna—Muf.]

⁶⁵ Nzambì wa Bukolè, Wàkabiìsha Yesù ku bafwè, tudi ne disànkà dyàbûngì dyà kumanya ne Nyumà Webè mmusòmbèle munkaci mwètù. Yéyè ùtu misangu yônsò ànu wa cyà bushùwà ne kacya kàtukù mwanji kwamba mwaku wà mashimi to. Nènku mpindyewu, Taatù, shindikaaku Dîyì Dyèbè patùdì tubala apa, bwà butumbi Bwèbè. Nènku swàku bwà mwoyi ne mwoyi wônsò, bu muWàkamba ne: “Yikalaayi badìlongololè ne pabwîpì, bwalu nekùlwé cintu kampànda.” Cìdi mwà kwikala bantu bâàkidila didimwija dyàbò dyà ndekeelu bwà kuumuka ku bintu bìdìbo benza mpindyewu ebi, kuya ku njila wa bushùwà. Tudi tuKwela twasàkidila, Nzambì wa Cijila, mu Dînà dyà Mwân’Ebè, Mukalenge Yesù. Amen.

⁶⁶ Tubuulula mpindyewu mu Mukàndà wà Bwàkabuulwibwà, nshapità wa 1. Mpindyewu, dyàmbedi, ndi muswe kubala mvensa yìsàtù yà kumpàla yà Bwàkabuulwibwà.

Dibuulula dyà Yesù Kilistò, dìdì Nzambì mumupe, bwà kuleeja musadidi wendè maalu àdi ne cyà kukumbana mu cikòsò; nènku wàkatuma ne kuwùmwiijila kùdì mwanjèlo kùdì musadidi wendè Yone:

Yéyè udi ufila bujaadiki bwà dîyì dyà Nzambì, ne bwà bujaadiki bwà Yesù Kilistò, ne bwà byônsò . . . bwà bintu byônsò byàkamònaye abi.

Wa disànkà ng’ewu udi ubala, ne aba bâdì buumvwa mèyì à cipròfetà eci, ne balama maalu àdì mafundamù: bwalu cikondo cikaadi pabwîpì.

⁶⁷ Ànu muumvwa mwambe kumpàla, mpindyewu, mu eci netùteetè bwà kwenza ditaata dikesé dyà Mukàndà mpindyewu, bilondeshile maalu-malonda ne bikwàbò. Nènku musangu wônsò panùdì nummònà ntapa dísù ku mabeji ândì mufunde apa aa, ncintu cîndì mwangacile mu nsèke myela ne bikwàbò.

⁶⁸ Mpindyewu, mufundi wa Mukàndà ewu n'Yone, Yone Munsantu wa Nzambì, wàkafundila lukòngò lùcilwalwà (A). (B) Kutumina banjèlo mwandamutekète bàà bipungu mwandamutekète bisunguluke byà cikondo cyà beena Kilistò, cikondo cyà kuumukila ànu ku matùkù à bapostòlò too ne ku Dilwa dyà Mukalenge. Nènku...mpindyewu, bikondo bìdi bimweneka mu dilondangana, cikondo ne cikondo, kuumukila ku dibànda dyà Mukalenge wetù too ne ku Dilwa Dyèndè cyàkàbìdì. Cikondo ne cikondo cyà èkèleeyìyà ncileejìibwe ku ngiikadilu wacì wa nyumà. (E) Cikondo ne cikondo cyônsò cyà èkèleeyìyà cidi mwà kudimweneshila ku ngààkwilu wacì wa mu Mifundi ne wa nyumà. Pàdì Nyumà wakula, cikondo cyônsò cidi cidìmwenesha. Cikondo cyônsò cidi citwala Mvinyo mulelèlà wa Kilistò, virgo wa Meeji awu's. Nènku cikondo cyônsò cidi citwtwàla mvinyo musomeka, virgo mukùtakane awu's.

⁶⁹ Bafundi bàà maalu-malonda bàdi biitabuua ne, eci ki nsòmbelu wa Yone. Yone uvwa musòmbele munda mwà bidimu byèndè byà ndekeelu mu cimenga cyà Efeso ne wàkafwilamu. Yéyè uvwa mu cisanga cyà Patèmò, díbà dìvwàye ufunda Mukàndà, wà Bwàkabuulwibwà. Kacivwa bwalu-bulonda bwà nsòmbelu wendè to, kàdi bwalu-bulonda bwà Kilistò mu bikondo bìcivwà bilwa. Nwamònou anyi? Civwa ncipròfetà. Kí nnsòmbelu wa Yone to, kí nnsòmbelu wa Kilistò to, kadi kwamba kwà cipròfetà cyà cikondo kampànda ciciwvà cilwa. Kacivwa mèyi èndè à cipròfetà to; kàdi, makùmbù à Mukalenge, à ne dísù dikolè. Kacivwa Dibuulula dyà Yone Munsantu wa Nzambì to, kàdi Dibuulula dyà Kilistò Mukalenge.

⁷⁰ S'ki Mukàndà wà ndekeelu wà Dipungila Dipyadìpyà's, kadi ùdi wàmba bwà mbangilu ne ndekeelu wa cipungu cyà Èvànjeelìyò. Bamanyi bàà mabàlà bàà Bible bàtu biitaba aci.

⁷¹ Mikàndà mifundiwa bikondo mwandamutekète byà èkèleeyìyà yàkafundiibwa, mu cipròfetà, bwà bikondo bìcivwà bilwa abi. Pòlò ngwâkafunda bwà mwoyi ne butumbi bwà èkèleeyìyà mwandamutekète yìvvàpu mu ditùkù dyèndè ayi. Yone wàkafunda bwà mwoyi ne butumbi bwà èkèleeyìyà mwandamutekète mu matùkù àcìvwà alwa, ne Yone ùvwa wàmbila bampaasàtà anyì misànjeelà mwandamutekète kàbìdì buludi beena Kilistò bàvvà mwinshi mwà banjèlo mwandamutekète bashììleshììlàngàne aba.

⁷² Mpindyewu, Mukàndà wà Bwàkabuulwibwà, mpindyewu netwàngate, bu mutùdì tusunsula cyòcì eci mu dìndà emu ne mu diloòlò edi. Nènku netùteete bwà kupàtuka lwà pa díbà dikumi ne dìmwè jaajaaja anyì díbà dikumi ne dìmwè ne tusunsa makumi asatu, cintu bu nànkú awu, ne pashiìshe kubanga cyàkàbìdì diloòlò edi pa díbà mwandamutekète.

⁷³ Mpindyewu bìdì byakula mu nshapità 1 ewu. Mvensa wa 1 ewu, ùdi—ùdi cyà bushùwà wàmба patòòke cidiYe,

bwalu n'Dibuulula dyà Yesù Kilistò. mvensa mwi², Munsantu Yone wa Nzambì ki mufundi ne musadidi. Mvensa mwi³, mabeneshaa mmambìibwe. Mvensa mwi⁴ too ne ku mwi⁶, ndyela dyà èkèleeziyà mwoyi. Mvensa wa 7, dimanyisha. Mvensa wa 8, Bunzambì bwà kumutu kwà bwônsò bwà Yesù Kilistò. Kuumukila ku mvensa wa 9 too ne ku wa 20, ncikèènà-kumònà cyà Patèmò.

⁷⁴ Nènku, kàbìdì, mvensa wa 14 ne wa 15 ayi yìdi yileeja butùmbi Bwèndè misangu mwandamutekète bwà Mupersona Wèndè. Kaa, s'mbilenga kumònà patùdì tumònà Kilistò mu bantu Bèndè misangu mwandamutekète bàà wènd-... ngiikadilu misangu mwandamutekète yà bantu Bèndè, mu dibìiishiibwa Dyèndè dyà butùmbì.

⁷⁵ Mpindyewu, myanzu yìdi yileeja ngiikadilu.

Dibuulula dyà Yesù Kilistò, . . .

⁷⁶ Kî ndibuulula dyà Yone Munsantu wa Nzambì to, kàdi Dibuulula dyà Yesù Kilistò, Mwânà wa Nzambì.

⁷⁷ Mpindyewu, mwaku wa cyena Ngelika bwà *dibuulula m'bwàkabuulwibà*, cìdì cyumvwija ne “divùngùlula.” Nènku mvwa ngàngata mwaku awu ngenda ngukenketa. Ùdi umvwija, bwàkabuulwibwà awu, ùdi bwà... Mbyenze bu mùdì musongi wa mpìngù, mwenze lupìngù kampànda lunène, kàdi kacya wàshààla mululame lubwikila ne cibwikilu kampànda. Nènku pashiìshe uya kapanda cibwikilu aci ne ùbuulula civwaye naaci paanyimà pàà cibwikilu aci. Aci's ndyumusha dyà cibwikilu's.

⁷⁸ Kàdi Mukàndà ewu kî ndyumusha dyà cibwikilu, mu mùshindù awu, dyà Mupersona wà Yesù Kilistò to. Nànsha nànkù, ncyà bushùwà ne cìdi cyàkula bwà Bunzambì Bwèndè ne bwà misangu mwandamutekète yà buntu Bwèndè, ne kàbìdì bwà bintu bìdiYe, bu mùdì Mwakwidi, Mfùmù, ne bikwàbò. Kàdi ndibuulula dyà byenzedi Byèndè mu matùkù àcìlwàlwa mu bikondo mwandamutekète byà èkèleeziyà bìdi bilwa. Cìdi . . .

⁷⁹ Pàvvà Mukalenge wetù pa buloba, bayiidi kuMukonkabo, bàmba ne: “Mulongeshi, newikalè mu cikondo eci mwà kwalujulula bukalenge kùdì Izàlèèlà anyì?”

⁸⁰ Ki Yesù kwamba ne: “Ki mbwalu bwènù bwà kumanya díbà adi anyì cikondo to.” Nènku muntu nànsha umwe kî mmufwànyìne kumanya to. Yéyè ne: “Nànsha Mwânà mwine,” kàbìdì, “kàvwa mumanye to.”

⁸¹ Kàdi paanyimà pàà lufù Lwèndè, dijiikiibwa, ne dibìika dyà ku lufù, ne dibànda dyà mu Butùmbì, Wàkaketela kùdì Mukalenge maalu àcìlwàlwa à Èkèleeziyà. Pashiìshe kwalukilaYe, bwà kutwàdila Èkèleeziyà Mukenji ewu, ne Mukenji wà dilwa Dyèndè ewu ne ngiikadilu wa èkèleeziyà Yèndè munda mwà Cikondo.

⁸² Kàvwa mwà kucyènza kumpàla kwà lufù Lwèndè, dijiikiibwa, ne dibìika dyà ku lufù to, bwalu Yéyè kàvwa mwanji kucimanya to. Kàdi nuvvaku bamòne mùdì Mufundu wàmba mwab'ewu anyì?

Dibuulula dyà Yesù Kilistò, dyàkamupa Nzambì (Kilistò), . . .

⁸³ Mùshindù mwine wàkafilà Nzambì Taatù Dibuulula kùdì Mwân'Èndè Yesù Kilistò. Nènku kutùmaYe mwanjèlo Wèndè kùdì Yone, bwà kuumvwija maalu aa àvvàku; àvvàku, àdiku, ne ikàlaku. Kaa, mbileejìlbwe mu mùshindù mulenga wà dikema's wè!

⁸⁴ Mpindyewu, mu cikondo cinène cìcìlwalwà cìvwà Yone mumònè eci's! Mpindyewu, aa, Dibuulula edi dìvwa dimupèèbwe, menemene, bwà kubuulula kiipacila kasungùlùke kàà Kilistò, civwaYe mwà kwikalà ne muvwaYe mwà kwikalà, mu cikondo ne cikondo cyônsò. Ki bwà cinyi mvwa mwambe, mu dìndà emu ne, lamààyì meeji ènù pa Èkèleeziyà mulelèlè. Èkèleeziyà mulelèlè wàkabanga mu Ditùkù dyà Mpenta.

⁸⁵ Kakwenaku mwena tèòlòji nànsha umwe, mumanyi wa dibàla wa Bible, anyì mumanyi wa maalu malonda, ùdi mwà kwamba ne wàkabanga mu matùkù à Martin Luther, à Wesley, mu cikondo cyà Kàtòlikè, anyì mu cikondo cikwàbò kanà cyônsò eci to. Wàkabanga ku Mpenta. Aci's ke cìvwà dibanjija dyà Èkèleeziyà. Aci's ke cìvwà ntwadijilu's. Nànku, ki bwà cinyi, mu muyiiki wa dipiyangana ne muntu kanà yônsò, imannyina wêwè ku ciibi cyà Mpenta aci, nènku kabeena ne kukwàbò kwà kuya to.

⁸⁶ Mbyenze bu kutèèka kalulù mu budimi kampànda. Wêwè's udi mumanye mwaba ônsò ùdi masoso ônsò, nànku wêwè muajìke. Nebikèngèle bwà kwalukidilaku ànu mwaba ûmwèùmwè uvwaku kalwile awu.

⁸⁷ Èè, s'ki mùshindù ngwôwò awu, muntu kanà yônsò udi wakula bwà maèkèleeziyà ne bikondo byà èkèleeziyà, ne byenzedi byà Nyumà Mwímpè, nebikèngèle bwà nwénù kwalukila ku mbangilu, ku cibangidilu. Nebikèngèle bwà kwalukila kwôkò aku bwalu Nzambì kêna ne mikalu to, ne Yéyè ngwa bukolè bwônsò. Ki bwà cinyi, Yéyè bu mùdiye kàyi mikàlu, Yéyè kêna mwà kwenza cintu kampànda *kaaba aka*, ne kwenza cintu kampànda cya cibengangana naaci, *mwab'ewu* to. Bikèngela bwà Yéyè kwenza musangu wônsò mwàkenzaYe musangu wa kumpàla awu.

⁸⁸ Bu mwàkambà Peetèlo, mu ditùkù dyà . . . pààkapetà bàà Bisàmbà byà bendè Nyumà Mwímpè apu, yéyè ne: "Tudi mwà kubàkandika mâyì, bu mudibi ne mbapete Nyumà Mwímpè bu mutwàkapeta ku cibangidilu anyì?"

Yesù, pàvvàYe pa buloba, wàkaakula wàmba ne: "Bìdi . . ."

⁸⁹ Muntu kampànda kulwa kwamba ne: “Mikenji yìdi yitwànyishila bwà kwipata bakàjì bëètù, bwà bwalu kanà bwônsò ebu anyì?”

⁹⁰ Yesù wàkamba ne: “Ewu wâkenza muntu mulùme, ngwâkenza mukàjì. Bwà bwalu ebu muntu mulùme neikale...”

Yéyè ne: “Kàdi Môsà wàkatwànyishila bwà kufunda mukàndà wà kushipa naawu dibàkà.”

Yesù wàkamba ne: “Kabìvwa nànku ku cibangidilu to.”

⁹¹ Alùkilaayi ku cibangidilu. Ki bwà cinyi, twêtù baswè kwakula pa cikondo cyà ekèleeyiyà, bìdi bikèngela bwà twêtù kwalukila ku cibangidilu, kutèèka ku luseke díyì dyônsò dìdì muntu kanà yônsò mwakùle munda mwà cikondo.

⁹² Ewu m’Mukàndà wà bukenji kutàmbe Mukàndà kanà wônsò wà mu Bible. Ewu ki Mukàndà umwèpelè ùdi Kilistò mutwèpù citampì Cyèndè. Ùdi ùbunga ne dibènesha ne ùdi ùjika ne mulawu. “Wa disànkà ng’ewu udi ubala.” Ne: “Wa dyàkabi nguumusha nî ncinyì cyônsò mu Wôwò awu.”

⁹³ Ke Mukàndà umwèpelè wàkafundà Kilistò, Yéyè mwine, wà mu Bible mujimà. Mikenji Dikumi, Yéyè ngwâkafunda ne munu Wèndè. Ncyà bushùwà. Beena Yuda bààkatungunuka ànu ne kwikala bakwàtekù. Nènku, leelù ewu, cintu’s n’-n’Dibuulula.

⁹⁴ Nènku pìikalaku kùtuku Mukàndà ùtu Sàtaanà mukine mu Bible, ngwà Bwàkabuulwibwà. Kùdi yìbìdì... Ùtu mukine Mufundù ônsò, nènku ôwò’s nsangilu yônsò nkông wa Mifundu. Kàdi, pìikalaku cintu kampànda, cìdiye mutàmbe kukina, m’Bwàkabuulwibwà ne Genèsè. Bwalu, Genèsè ùdi wàmba cibangidilu. Bwàkabuulwibwà bùdi bùbuulula cììkalà mwà kumwenzekela mu ditùkù dyà ndekeelu. Neàswikiibwe munda mwà bidimu cinunu; pashiishe yéyè, ne mupròfetà wa mashimi, ne nyama wa Iwonji, nebiimanshiibwe, ne mwoyi, mu Dijiba dyà Kapyà.

⁹⁵ Nènku yéyè neàlwishe Mukàndà wà Genèsè pa ne ùdi—ùdi mwikale wà bushùwà. Neàmbè, ne: “Ki ngwà cyà bushùwà to.” Nènku yéyè neàsalakajè meeji à bantu. Tàngilààyì mwaba wùdì dyabulu ùsanganyiibwa, Mukàndà wà Genèsè awu anyì Mukàndà wà Bwàkabuulwibwà, wà kumpàla ne wà ndekeelu.

⁹⁶ Ne Mukàndà wà Bwàkabuulwibwà ùdi ne bimfwànyì bipite bûngì mu ôwò kutàmbe ne Mikàndà mikwàbò yônsò yà mu Bible. Ùdi ne bimfwànyì bipite bûngì bwalu m’Mukàndà wà cipròfetà. M’Mukàndà wà cipròfetà. Ki bwà cinyi bìdi bikèngela bwà kuumvwibwawu kùdi kasùmbù kàà bantu kàà cipròfetà. Ewu Mukàndà kî mmwenzela bantu bwônsò to. Kakwena muntu nànsha umwe udi mwà kuwùmvwa to, nànsha kakesè. Mukàndà ewu mmwenzela kasùmbù kampànda kàà bantu. Lwà mu Dutèlònòma amu, Mbambe ne: “Bintu bisokoka bìdì byà—byà—

byà Mukalenge." Ncyà bushùwà. Ne Yéyè ùdi ùtùbuulwila twêtù, bânà Bèndè, bintu bisokoka. Pa nànkú kabyena byenda . . .

⁹⁷ Meeji à musunya kaènakù mwà kuumvwa maalu manène à mu Mifündu aa to, bwalu mmakutakane bwàbò bôbò. Kàdi kùdì aba bâdì banangi bàà Dìyì dyà Nzambì, ki bâdì Mukàndà mufündila, kùdì Èkèleeyiyà. Dibuulula dyà Yesù Kilistò: "Kùdì èkèleeyiyà ku Efèso, kùdì èkèleeyiyà wa Seemùnà, kùdì èkèleeyiyà, kùdì maèkèleeyiyà," ànu nànkú. Dibuulula dyà Yesù Kilistò kùdì Èkèleeyiyà. Mêmè ntú munange aci.

⁹⁸ Ne mònayi, cidi kàbìdì dikùmbana dyônsò dyà Mifündu, dikùmbana dyà maalu ônsò mu kaabujimà. Nènku ncitèèkiibwe pa mwaba mwîmpè, ku ndekeelu kwà Bible. Dibuulula dyà cintu cyônsò mu kaabujimà nditèèka paanyimà apa ne dibènesha kùdì udi uCibala ne ùCítèèleja, ne mulawu kùdì aba bâdì bâsàkidilaku anyì buumushilakù. Ki nsangilu ônsò mu kaabujimà, kaa, cyeyemenu aci. Cintu nànsha cìmwè kacyèna mwà kusàkidiibwaKù to. Nènku pàdì muntu uteeta kuumushilaKù cintu kampànda, anyì kusakidilaKù cintu kampànda, Nzambì mmwambe ne Yéyè ûwwa mwà kuumusha citùpà cìmwècìmwè aci mu Mukàndà wà Mwoyi. Nwamònu anyì? Üvwa mwà kuumusha citùpà cyèndè mu Mukàndà awu, bu yéyè mwà kusàkidilaKù.

⁹⁹ Ki bwà cinyi, patùdì tumòna mìshindù yà Dibuulula dyà Mukalenge wetù, mùdìYe, cidiYe, muntu nànsha bamwamba ne nganyi wadidingga kusàkidila ku Aci anyì kuumushilaKù kantu kampànda, ncipròfetà cyà mashimi. Bâàbûngì bakaadi bateetètèete kwamba ne bâvwa ne cintu kampànda paanyimà pàà Cyôcì aci. Kàdi Aci ki Dibuulula mu kaabujimà dyà Mukalenge Yesù mu cikondo Cyèndè cyà èkèleeyiyà ne mu Ditùkù Dyèndè, Dibuulula dyà Mukalenge wetù.

¹⁰⁰ Mpindyewu—mpindyewu, *kubuulula*, mwaku wa cyena Ngelika, cintu kampànda citu cisokoka, kaciyi cibuul—... "cibuulula" Kilistò.

Mpindyewu, mvensa udi ulonda awu, tudi tusangana, mu mvensa mwi2.

¹⁰¹ Mvensa wa 1 udi ubuulula Kilistò, Dibuulula, anyì dibuuludiibwa. Kaa! Mùshindù mwine wùvvà cikondo cyà ndekeelu ne Dilwa dyà Mukalenge biikale kabìy-... bibwikila, kùdì bapostòlo's wè! Bâàkeela lukonko alu, kàdi umwèpelè ngwakashààla ne mwoyi bwà kupeta Dibuulula adi's. Nènku kàbìdì, kàvwa nànsha mucyuvwé to, bwalu bwalu-bulonda abu kabuvwa bwanji kwenjibwa to.

¹⁰² Mpindyewu, bwalu-bulonda bwà Mukàndà ewu, anyì dyu-dyuvwija dyà Mukàndà ewu, bìvwa byambilà èkèleeyiyà mwandamutekète mu Asie Mineure, yìvvàku mu ciine cikondo aci's. Bìvwa byambilà èkèleeyiyà mwandamutekète ayi. Kuwva èkèleeyiyà mipite kutàmba mwandamutekète ayi, mu ditùkù adi.

Kàdi dînà yônsò wa ku èkèleeziyà ayi uvwa mukumbanangane ne ngiikadilu wa mu èkèleeziyà awu amu, aci ncifwànyìne kumulondesha mu cikondo cyônsò, ngiikadilu wa èkèleeziyà awu. Bu mùdì wa Efèso, ûvwa ne ngiikadilu kampànda. Seemùnà, Peegàmò, ànu nànku, Filàdèlèfiyà, yônsò wa ku èkèleeziyà ayi ûvwa ne ngiikadilu munda mwèndè amu, aci ncifwànyìne kumweneka cyàkàbìdì mu bikondo bìcìvwà bilwa. Kaa! Bu wêwè ànu mwà . . .

¹⁰³ Muntu kanà yônsò ewu ùdi mwà kumònà ngangàcìlù wa—wa mu nyumà wa Mifùndu ne mufwànyìne kwamba ne bôbò kabàvwa basonsòlibwe to anyì? Cyenzedi cyèbè wêwè mwine, kabingila kiine, twipàcìlà mene twà bantu atu, mònà's, s'bìdì bijaadika ne Mufùndu mmusonsola, pa kumònà mùshindù ùdi Nzambì ukumbaja bintu abi. Cinùdì ànu nwenza, *apa* eci, ncimfwànyì cyà cintu kampànda.

¹⁰⁴ Bu mùdì Abraham ùlambula Izàkà, mwanèndè umwèpelè wa balùme; cimfwànyì cyà Nzambì ùfila Mwân'Èndè, nkama yà bidimu mimane kupita. Mùshindù ûvwa Yòzefù musùmbishìibwe ne mwedìibwe mu buloko, mukinyìibwe kùdi bânà bààbo ne munangiibwe kùdi tatwèndè; Yesù's, mu cimfwànyì. Muvwa Nyumà mukwate mudimu munda mwà Yòzefù, muntu wetù ewu, kàdi mwikàle uléeja cimfwànyì cyà nsòmbelu wa Kilistò, ànu menemene. Mùshindù, Davìdì, ûvwa Mwânà wa Davìdì musòmbe pa mukùnà ùmwèùmwè awu's. Pààkabèngiibwa Davìdì bu mfùmù ne pààkabàndàye pa kakùnà aku, Mukùnà wà Olevà, kutàngila paanyimà, ùdila, bu mfùmù mubèngìibwe; nkama yà bidimu ndambù paanyimà pàà aci, Mwânà wa Davìdì wàkabànda kakùnà kôkò kàmwèkàmwè aku, bu Mfùmù mubèngìibwe, ne wàkadidila Yélusàlèmà. Nyumà mu cimfwànyì ne mu mmwenekelu. Kaa!

¹⁰⁵ Dîbà adi nudi mwà kumònà Èkèleeziyà munène wa mpenta awu mu ditùkù dyà ndekeelu edi anyì? Nudikù mwà kumònà mùvwà Nzambì mumubanjije mu Ditùkù dyà Mpenta anyì? Bivwa bìkèngela bwà Nyumà awu kushààlayè mu Èkèleeziyà munda mwà bikondo byônsò.

¹⁰⁶ Bakaadi ne bintu byà kwîsùkwîsù ne kabàyi bacyùka maalu to. Byàkakèngela biikale ne dingumba. Byàkakèngela bwà bôbò kusangisha èkèleeziyà ne mbùlàmàtadì pàmwè, ne ndekeelu wa byônsò bààkacyènza ne bààkatwala nkàmà yà bidimu byà dikengeshiibwa. Pashiishe, Dilongolola, bààkapàtuka. Nénku cidimu cyônsò, bâvwa benda buumusha byà Nyumà ne bàsàkidilakù byà mubidi, bâkose byà Nyumà ne bàsàkidilaku byà mubidi, mu mùshindù wà ne mpindyewu bakaadi pabwípi ne kucyenza cyàkàbìdì. Tudi ne mwoyi mu mêbà à ndekeelu aa, à dyoya edi, dikùmbana dyà maalu ônsò à èkèleeziyà. Tudi mu Filàdelefìyà . . . anyi mu Cikondo cyà Èkèleeziyà wa Laòdikìyà.

¹⁰⁷ Mpindyewu, nshapita wa 1, mvensa wa 1, wàkafidiibwa kùdì—kùdì Yone. Mpindyewu, mufundi nganyì? Yone. Yone. Kacìvwa dibuulula dyà Yone to, ne tudi bamanye ne kabivwa nànkú to, bwalu civwa n'Dibuulula dyà Mukalenge Yesù Kilistò. Yéyè ùwwa eci, yéyè wàkasungudiibwa bu muyiidi. Ne Mukàndà Wòwò mwine ùdi ùbuulula cintu cìvwàku, Yesù Kilistò, kuvwa Ye ùbuulula.

¹⁰⁸ Nènku wàkatùmiiibwa kùdì... “Ne wàkamanyisha eci kùdì mwanjèlo wendè kùdì Yone.” Katwèna bamanye ne mwanjèlo awu uvwa nganyì to. Bible kêna wamba ne mwanjèlo awu uvwa nganyì to. Kàdi tudi bamanye ne ùwwa mmupròfetà, bwalu Bible mmwambe pashiishe, ne: “Mêmè Yesù ndi mutùme mwanjèlo wanyì bwà kufila bujaadiki bwà maalu àdi ne cyà kukùmbana mu citùpà ciipi eci’s.”

¹⁰⁹ Pashiishe tudi tujandula ne pàakaavwà Yone ukeba kukuukwila mwanjèlo awu, mwanjèlo wàkamba ne: “Mòna ne kwenji nànkú to.” Bwàkabuulwibwà 22, ngeela meeji ne mmwòmò. Ki yéyè ne: “Bwalu mêmè ndi musadidi neebè ne umwe wa ku bâñà bëènù bapròfetà.” Ùvwa mufwànyìne kwikalà Eliyà. Ùvwa mufwànyìne kwikalà umwe wa ku bapròfetà. Yone uvwa mùpostòlò. Kàdi mupròfetà ewu uvwa mutumiìbwé.

¹¹⁰ Nènku Yone, bu mùvvwàye mùpostòlò, tàngilààyì ngiikadilu wa mikàndà yèndè mifundilangana ayi, yìjaadika ne kawwa n'Yone wâkayìfunda to, bwalu kayìvwa ne ngiikadilu bu wa Yone to. Angataayi Yone wa Kumpàla, Yone Mwibidì, ne bikwàbò, nuyibale. Nènku tàngilààyì ngiikadilu waayi, pashiishe tàngilààyì ngiikadilu wa eci. Yone ùvwa mufundi ne ùvwa mùpostòlò, kàdi eci nnyumà wa mupròfetà. Mmuntu mushììlàngànè, ànu byà menemene. Nwamònù anyì? Kacìvwa mifundi yà Yone to. Kacìvwa dibuulula dyà Yone to. Civwa n'Dibuulula dyà Nzambi dyà Yesù Kilistò kùdì maèkèleeziyà. Nènku cìvwa ne... Yone ùvwa ànu mufundi cyanàànà, mufundi's, ne—ne Mukàndà ùdi wàmba cintu cìmwècìmwè aci.

¹¹¹ Mpindyewu, kabìvwa bitùmina Yone to. Bìvwa bitùmina Èkèleeziyà. Èyo. Yone, pa diine díbà adi, ùvwa mpaasàtà wa èkèleeziyà wa Efèso. Nènku mpindyewu Mukàndà mmutùmina Yone... anyì mutùmina èkèleeziyà, kí n'Yone to.

¹¹² Mpindyewu mvensa mwi3, Ùdi ùmányisha dibèènesha. Tèlejààyaaku eci núnku.

*Wa disànkà ng'ewu udi ubala, ne aba bàdì buumvwa
meyì à ciprófetà eci, ne balama maalu àdi mafundamù:
bwalu cikondo cikaadi pabwípì.*

¹¹³ Ncikondo kaayi cikààdi pabwípì? Cikondo cìdì bintu ebi byenzeka, pàdì Dibuulula dyà Yesù Kilistò edi dijikijiibwa mu cikondo ne cikondo cyônsò cyà èkèleeziyà.

¹¹⁴ Mpindyewu cìdì Ye mucifündile mùshindù ewu. Bu yéyè mwambe ne: “Èè, mpindyewu, Yéyè...” Bavwa baMwindile;

bu ne cìvwa cìbuulùdìibwe, bu Yéyè . . . nùnku's ncibuulùdìibwe kùdì Yone, bwà ne Ùvwa ne cyà kulwa ànu pàvwà èkèleeziyà ne yájìkièè. Ki mwàkadyàmbidilaci Yone's. Kàdi bu byôbì nánku, èkèleeziyà ayi, pavwayi ànu ne yájikì, yìvwa yilwa . . . Bu yéyè mumanye, bu byôbì bimubuulwila ne kùvwa ne cyà kwikala bikondo mwandamutekète bileebilè byà èkèleeziyà, bidimu binunu byàbûngì, anyì nkàmà ya bidimu bûngì cyanàànà, díbà adi kakuvwa kufwànyinekù kwikala kabingila nànsha kàmwè kàà dindila to. Bôbò's bàvwa bafwànyìne ànu kwikala benze maalu à cyàbo cikondo cyà èkèleeziyà.

¹¹⁵ Ki bwà cinyi, Nzambì ùwwa mucyàmbè, kàdi kacìvwa cibuulùdìibwe kùdibò to. Kacìvwa cibuulùdìibwe kùdì Martin Luther to, bintu bìvvà John Wesley mumanye pa Mifùndu abi's. Ki mbìbuulùdìibwe kùdì ba-Baptistes, bìdi beena Mpenta bamanye pa Mifùndu to, bwalu bìdi mu cikondo cishìllàngàne. Ncikondo cishìllàngàne. Ne Nzambì ùtu ùbuulula maalu Èndè ànu mu muvù wààwù. Kaa!

¹¹⁶ Kwêna mwà kukuna matalà mu muvù wa bintu bitoloka ne kunowa ànu musangu ùmwèùmwè awu to. Udi ukuna dimiinu ne didi ditòloka too ne ku diboba. Nzambì ùdi ùkùna Dîyì Dyèndè ne pashiìshe Dìdi ditòloka. Ne pashiìshe tudi tutàngila paanyimà twamba ne: “Dìvwa aci.” Mònà's, cyà bushùwà, tudi tuDimònà paanyimà pàà Dimane kubuuludiibwa.

¹¹⁷ Mpindyewu: “Babènèshiìbwe,” Dîyì, dimanyisha dyà dibènesha, pa mvensa mwi3 ne: “kùdì aba bàdì babala anyì batèèleja maalu masokoka ààdi.”

¹¹⁸ Enza . . . meeji à musunya acyèpuka, bwalu meeji à musunya kí mmamanye kantu nànsha kàmwè pa bwalu abu to. Kabyena bìkèmesha to pàdì meeji à musunya kaàyì macimanyè to, bwalu n'Sàtaanà mu meeji à musunya awu. Nènku Sàtaanà mmwedìibwe patòòke, ne Sàtaanà kàtu muswè bwà kwediibwaye patòòke.

¹¹⁹ Nudi numònà mùdìbi byenza Sàtaanà bwôwà pàdìye wela meeji ne neèdiibwè patòòke anyì? Tàngilààyì mu dimwè dyà ku masangisha. Tàngilààyì numònà cyenzedi cyà bantu. Tàngilààyì pambelu, mu disangisha amu. Pabwípì menemene ne Sàtaanà kwedibwayè patòòke, pa muntu kampànda, s'nudi mwà kumònà mùdì kwisù kwèndè kùshintuluka's. Nudi numònà's, kí mbamanye cyà kwela meeji to. Dyàkàmwè, Nyumà Mwímpè ùdi ùpweka ne ùtandula démon awu. Kaa! Yéyè's ùtu ukina disangisha dyà mùshindù awu's. Ki bwà cinyi tudi bapetè mvità yà mùshindù awu's, mbwalu Dîyì dyà Nzambì didi ditandula dyabùlù. Nwamònà anyì? Dyôdì ndìdì dyàmba cidiye.

¹²⁰ Bu mùdì wamba ne: “Mukàjì udi musòmbe apa ewu,” ku disonsodiibwa dyà Nyumà Mwímpè, wamba ne: “dínà dyèndè m'Mandemwanzele Jones. Mmufùmine ku Mwaba kampànda.”

Aci cìdi cyènza cinyì? Cìdi cibakula nyumà wendè, cimufikisha mu mwaba kampànda.

¹²¹ “Wämmanyì munyì? Muntu awu kî mmumanyà mêmè to, nànkú’s cìdi ne cyà kwikala nyumà kampànda. Nnyumà wa mùshindù kaayi?”

“N’Nyumà wa Nzambi’s.”

“Mmunyi? Mbwalu kaayi ebu kündì?”

¹²² “Udi ne dísaaamà dyà cyâdì, kansérè,” nànsha ciikàle cinyì, “kadi EMU MMÙDI MUKALENGE WÀMBA . . .”

“Kaa!” Kaa, mùshindù mwine ùdi Sàtaanà ukina ciine aci’s, bwalu Cìdi cimutandula.

¹²³ Mpindyewu, meeji a musunya’s adi àtàngila, àmba ne: “Ndibala dyà meeji à mu mutù, lubuku.” Ki mbamanyè to. Ncikutakane bwábo bôbô.

¹²⁴ Kàdi bwà aba bàdì bamanyè Cìdici, kaa, dibènesha kaayi’s wè! Ncinyì ciine aci? Dibuulula. Dibuulula dyà nganyì? Dyà muntu udi ku cyambilu anyì? Dyà Yesù Kilistò mu cikondo cyà ndekeelu cyà èkèleeziyà eci, mwikale uDibuulula yéyè mwine mùvwà Ye mulaye ne Neénzè. Nwamònù anyì?

¹²⁵ Ndibuulula, nwamònù’s, ne Sàtaanà ùtu ukina aci. Ekèlekèle, mùshindù mwine udiye ùcikina’s wè! Yéyè mmutandùdiwbwe, cítandula ndongamu wendè. Sàtaanà ùtu ûkina Bwàkabuulwibwà ne Genèsè, ndi mufunde kaaba aka. Ncyà bushuwà menemene.

¹²⁶ Mpindyewu, yéyè ùdi ukina dibuulula bwà cinyì? Bwà cinyì yéyè ùdi ubèngangana ne dibuulula’s? Mbwalu kakùyi tuseku to nsangilu yônsò nkòòng wa Dîyì dyà Nzambi ne Èkèleeziyà wa Nzambi mbiibakila pa dibuulula.

¹²⁷ Kabyàkwikalà ku dilonga dyà—dyà tùlaasà, nànsha twêtù biikale ne sémìnérè milenga ya bishi. Mbaalukile kule be mu cikondo cyà mifitù. Kakùyi mpatà to Bible ne Èkèleeziyà n’dibuulula.

¹²⁸ Tubuululààyi, ndi ne ndambù wa Mifùndu mifùnda kaaba aka, Maatààyi, nshapità wa—wa 16 ku mvensa wa 18. Tùtapààyi ànu dísù kakesè—kakesè cyanàànà mu Maatààyi 16:18, tumône mwaba udi Mifùndu ayi, mwaba ùdì dibuulula. Ùpweka ûfùmina ku mukuna, ku mvensa wa 17.

Ki Yesù kwandamuna ne kumwambila ne: Udi mubènèshììbwé, Simona wa Bàà-Yona: bwalu kî mmunyiinyì ne mashì bìdì bìkubuulwileci to, kàdi Taatù wanyì udi mu dyulu.

Nènku ndi nkawambila... wêwè ne,... wêwè udi Peetèlo, kàdi pa lubwebwe elu mêmè nèngììbakilepu èkèleeziyà wanyì; ne biibi byà iferno kabyàkumutàmba bukolè to.

¹²⁹ Mpindyewu, èkèleeziyà wa Kàtòlikè ùdi wàmba ne: “Yéyè mumwibakile pa Peetèlo.” Èè, aci, ncyà bushùwà ne aci’s ngeelelu wa meeji wa mu musunya’s. Kwena mwà kudifwànyìkijilaku bwà ne ngeelèlu wa meeji wa nyumà ùdi mwà kuumvwa cintu bu nànku to; mùdì Nzambì, ne Mwân’Èndè Sungasunga mwimane mwaba awu, kàdi mufwànyìne ànu kwibakila Èkèleeziyà Wendè pa muntu wetu wa patupù, bu bantu bônsò, mulela mu mpèkaatù ewu. Muntu awu kucijaadikaye. Yéyè, mwikàle ne nyumà ùmwèùmwè awu pambidi pèndè, wàkeela Yesù mulawu ne kuMuvilayè ànu mwîsù Mwèndè amu’s. Kacìvwa Peetèlo to.

¹³⁰ Anyì, kacìvwa nànsha mene lu—lubwebwe kampànda lùvvù lusanganyiibwa mwaba awu, bu mùdì èkèleeziyà mikwàbò yàmba ne ki mùvwàbi to. Kacìvwa lubwebwe to. Bwalu, Peetèlo . . .

¹³¹ Lubwebwe lùvvàYe wàmba mwaba awu alu, kalùvvwa Peetèlo nànsha, anyì Yéyè mwine to.

¹³² Mpindyewu, bantu bààbûngì bàà mu beena Mishòonyì bâdì bâteeeta kwamba ne: “Cìvwa n’Yesù. Cìvwa mpa Yéyè pààkiibakila Yé Èkèleeziyà awu. Yéyè!” To, aci’s cìcìdi ànu ntùpàkànyì. Nwénù bamònè, kacìvwa Yesù to, anyì kacìvwa nànsha Peetèlo to. Cìvwa ndibuulula.

. . . *ki mmunyiinyi ne mashi bìdì bikubuulwile* eci to,
kàdi Taatù wanyì udi mu dyulu ngudi mufile dibuulula
edi.

¹³³ Tàngilààyì. Ndi muswè kunùkonka. Mu budimi bwà Edènà, kamùvvwa Mifùndu mifùnda to. Nènku pashìishe ke bâna bâà balùme bâbidi abu, Kaayina ne Abèlè, ne bônsò bâbidi bâvwa baginga kufila mulambu bwà kwanyishiibwa kùdì Nzambì. Pâàkenzabo nànku, Kaayina wàkalwa ne kwibakayè cyoshelu; Abèlè wàkiibaka cyoshelu. Èè, piìkalabi ne aci ki cyônsò cìdì Nzambì ûlòmба, Nzambi’s mmufwànyìne kwikala ne kànsungànsùngà bwà kupiìsha Kaayina. Èyo. Pashìishe Kaayina kufilaye mulàmbù; ki mwakenza Abèlè. Bônsò bâbidi bâàkafila mulàmbù. Kaayina kukuukwilaye, ne ke mwà kenza Abèlè pèndè. Kaayina wàkenza cyônsò cyàkenzà Abèlè aci.

¹³⁴ Nànku awu piìkala kuya kwà mu èkèleeziyà, kushààla wa mu èkèleeziyà, kufila milàmbù, ne kusambilà, ne kukuukwila Nzambì, ki cyônsò cìdì Nzambì ûlòmба, dîbà adi Nzambì mmufwànyìne kwikala ne kànsungànsùngà bwà kupiìsha Kaayina bwalu wàkenza ànu menemene byàkambaYe bwà kwenza abi.

¹³⁵ Kàdi, nudi numònà’s, Abèlè, ku dibuulula, wàkamanya ne kacìvwa mamuma àvvà mabàpàtule mu budimi bwà Edènà to, bu mùdì meeji à musunya àbûngì enza leelù ewu. Abèlè kulwaye ne kulàmbula mamuma à mu buloba abu, kàdi Nzambì kubìbengaye, kàdi cyàkabuuludiibwa . . . Ndi muswè

kwamba ne, Kaayina ngwâkacyenza, nùmfwileku luse. Kaayina wàkalàmbula mamuma à mu buloba bwalu yéyè wàkadyelela meeji ne ki cyàkabàpàtulà mu budimi bwà Edènà's. Tàngilààyì dibuulula adi's. Tàngilààyì dipangilangana dyàdì. Tàngilààyì mùdìdi dyenza bibì leelù ewu's. Kàdi kabivwa bimuma bìvvà bibàpàtule to. Evà kààkadyaku bimuma byà pomme to. Cyà bushùwà's. Mmunyì mwàkafikàye ku dimanya ne ùvwa butakà, piìkalabi ne ndidyà dyà pomme? Cìvwa nku disangila dyà mulùme ne mukàjì. Ki civwàci ne cyà kwikalà!

¹³⁶ Mpindyewu, tudi twangata aci bu dilonga, nènku tudi ne, twalukilamù. Kabeena ne Mufundu nànsha wùmwè to.

¹³⁷ Bàmwè bàà kudibo bàdi bàmba ne: “Èè, yéyè's mmwâmbe ne: ‘Ndi mupete mwânà wa balùme wa kùdì Mukalenge.’” Èyowà's, mukalenge. Ki mùdì ndumbà wàmба pèndè. Nzambì ke udi ne cyà kufla mwoyi wônsò ewu's.

¹³⁸ Kàdi's mmwoyi munyangakaja. Tàngilààyì ngiikadilu wa mwânà wa balùme awu. Ùvwa wa tatwèndè, dyabùlu awu's; mwena lukinu, mwena lwonji, mushipyanganyi. Nwamònù anyi?

¹³⁹ Nènku pashìishe mmunyi muvwabi ne, Abèlè, pàvvàbo... baledi bëndè bàvwa pàmwàpa bamwambile ne—ne micì yikaavwa mikwame bimuma, ne bikwàbò. Kàdi, cyàkabuuludiibwa kùdì Abèlè. Abèlè wàkaya kangata mwânà wa mùkòòkò, bwà mashi, wangata mwoyi. Kî mmucì wà bimuma, ukwama pomme ne bibote ne bilòwalowa to. “Kàdi Abèlè, ku dibuulula dyà nyumà,” Ebèlu 11, “wàkalaàmbula Nzambì mulàmbu mwímpè mutàmbe. Nzambì mwikàle úwùfidila bujaadiki, bwalu wàkabuuludiibwa kùdiye ku diitabuua.”

¹⁴⁰ Ki mwaba wàkiibakila Nzambì Èkèleeziyà Wendè awu. “Bwalu kî mmusunya ne mashi bìdì bikubuulwile eci to.” Kacya kùtu muCilonge mu sèminérè to. Muntu kî mmukulongesheCi mu mwaba kampànda to. “Kàdi Taatù wanyì udi mu dyulu ngudi mukubuulwileCi.” Mwaba awu, cintu cyônsò mu kaabujimà cìdi mu dibuulula, Èkèleeziyà mujimà, “Pa lubwebwe elu lwà Dibuulula dyà Yesù Kilistò, Nêngìibakilèpu èkèleeziyà wanyì.”

¹⁴¹ Udi mufwànyìne kwangata cìdì mpaasàtà wàmba. Udi mufwànyìne kwangata cìdì sèmìnérè ùlongesha. Udi mufwànyìne kwangata cìdì èkèleeziyà wàmba. Ne kî mbyanjì ànu kukumbana to, nànsha nànnku. Udi mufwànyìne kwikalà mukumbane mwà kucyùmvwija ne ngààkwilu wa kapelu. Kàdi pàdì ànu Nzambì kàyì mukubuulwile ne Yesù Kilistò m'Mwân'Endè, ne wêwè musùngidìlbwe ku Mashì Endè; pa dibuulula adi, dyà ne: “Yéyè ki Musùngidi wanyì.”

¹⁴² “Pa lubwebwe elu Nêngìibakilèpu Èkèleeziyà Wanyì, ne biibi byà iferno kabyèna mwà kumutàmba bukolè to.”

¹⁴³ Pa nànnku nudi numònà bwà cinyì Sàtaanà ùdi ùbengangana ne Mukàndà wà Bwàkabuulwibwà. Cyônsò cìdì cibuulùdiibwe,

dibuulula dyà nyumà, Sàtaanà ùdi ùbengangana naaci. Ki bwà cinyi yéyè udi ulwishangana ne mudimu wà bwambi leelù ewu. Bwalu, ncinyì ciine aci? Dibuuludiibwa dyà Kilistò.

¹⁴⁴ Èkèleeziyà àtùngunukè ànu ne màngumba èndè manène awu ne malongolodi awu, ne tuumayiisha twèndè tukesè tulengeja ne bikwàbò. Bàlekelaayi bátùngunuке, Sàtaanà kààkubàtacishaku to. Kabeena ne ntatu to. Bantu bônsò's bàdi bàbàtuuta tuumapi paanyimà.

¹⁴⁵ Pàdìku kulwa cikondo cìdì Nzambì, ku Nyumà Mwîmpè, ùbuulula Kilistò mu Èkèleeziyà amu, ne bukolè ne dileeja dyà patòòke dyà dyondopiibwa dyà babèdì, ne wenza bwà bimanyinu byàkamba Ye ne bìvwa mwà kulonda beena kwitabuuja, kwenzekabi, díbà adi Sàtaanà ùdi ùbinduluka's. Yéyè ùdi wenza cintu kampànda pa bwalu abu. Too ne pa diine díbà adi, Sàtaanà kénà ucyùka èkèleeziyà kûdì mudiswike to. Nànscha wêwè mudileeje wa bishi. Kàdi pàdì Kilistò ukubuulwila ne Yéyè ùdi Mwânà wa Nzambì, ne byenzedi byàkenzaYe udi ubyènza pèèbè; kaciyi byenzedi bikwàbò to, kàdi byenzedi bìmwèbìmwè abi.

¹⁴⁶ “Ewu udi ungiitabuuja mêmè...” Yone Munsantu 14:7. “Ewu udi ungiitabuuja mêmè, byenzedi bîndì Mêmè ngènza neàbyènzè pèndè. Wenza byenzedi bìmwèbìmwè abi, ne binène bipite ebi.” Bwalu, Kilistò kàvwa mufwànyineku kuyiisha dibatiiza dyà Nyumà Mwîmpè to, mbifwànyìne kwikala bitàmbe bunène. Kavwa mwà kubatwadilaci to, bwalu Nyumà Mwîmpè kàvwa mwanji kwikala mufidùlbwe to. Kàdi pààkalwà Yesù ne kufilayè Mwoyi Wèndè, ki Nyumà Mwîmpè kwalukilayè, díbà adi bâvwa mwà kufila Mwoyi wà Cyendèleélè kûdì bantu. Ke “citàmbe bunène ncyàcì”.

¹⁴⁷ Kàdi bimanyinu ne maalu à kukema, Yesù wàkamba bitòòke tòò, mu Maako 16 ne: “Ndàayi pa buloba bujimà, nùkayiishè cifùkìibwà cyônsò èvànjeeliyò.” Too ne penyi? Pa buloba bujimà. Mbanganyì? Cifùkìibwa cyônsò. Pàcìdi ànu Èvànjeeliyò uyiishiibwa, bimanyinu ebi nebìfile bàdi biitabuuja. Nènku pàdì aci cilwa dibuulula, mwanètù, wêwè udi pabwípì ne Bukalenge díbà adi. “Pa lubwebwe elu Nêngìibakilèpu Èkèleeziyà Wanyì, ne biibi byà iferno kabyèna mwà kumutàmba bukolè to.”

¹⁴⁸ Bwalu, mulùme anyìi mukàjì ukààdikù mu cipèèlà cyà kale cyácyà nkààyende, bu mùvwà Môsà amu, ne dibuulula dyà Nzambì dimwènèshìlbwe kûdiye ku Nyumà Mwîmpè, kakwèna cìdì mwà kumunyungisha to. Yéyè mmushindame ne mukolakane ànu ne mwèndè mwônsò.

Sàtaanà ùtu ukina Dibuulula. Kàtu mudìnange to, nànscha kakesè; dìdi dinyangakaja ndongamu yèndè.

¹⁴⁹ Ngiikadilu wa Mukàndà ùdi ùleeja ne Yone kî nguvwa muwûfunde to. Ncyà bushùwà. Bwalu yìdi—yìdi bwà bakwàbò... Mmifundu yèndè, kàdi kî ndisonsodiibwa dyèndè

nànscha. Ndisonsodiibwa dyà Nzambì dìdì difùnde Mukàndà. Èyo.

¹⁵⁰ Tumònààyibi cìdìwu wàmба mpindyewu's.

*Wa disànkà ng'ewu udi ubala, ne aba bàdì bumvwa...
cipròfetà eci, ne bálama maalu àdì mafundamù: bwalu
cikondo cikaadi pabwípi.*

¹⁵¹ Mpindyewu: "Cikondo cikaadi pabwípi." Cinyì? Pàdì Dibuulula mu kaabujimà dyà Yesù Kilistò dimanyìshìibwe kùdì èkèleeziyà Yèndè's. Nènku bu mùdì bikondo byènda bitungunuka, dìdi ànu dibuulùdìibwe kudibo.

¹⁵² Mpindyewu tukaadi ku cikondo cyà nshììkidilu, nènku mpindyewu tukaadi bulelèlè ku nshììkidilu wa buloba. Tudi ku dikùmbana dyà maalu ônsò dyà maalu-malonda àà buloba. Nènku kumpàla kwà lumingu elu kujikalù, ne bu Nzambì mwà kwikala neetù, mwà kutùkwacisha, netùjaadike ne tudi ku dikùmbana dyà maalu ônsò dyà bikondo byà èkèleeziyà. Tudi mu Filàdèl... anyì mu Cikondo cyà Èkèleeziyà wa Laòdikiyà, dikùmbana dyà maalu ônsò dyà bikondo byônsò. Tudi ku dikùmbana dyà maalu ônsò bwà maalu àà cìdììdì cyà buloba. Tudi ku dikùmbana dyà maalu ônsò dyà—dyà buloba bwêtù ebu. Tudi ku dikùmbana dyà maalu ônsò dyà bintu byônsò. Tudi ku ndekeelu wa cintu cyônsò cyà mu bufùki, badilongòlole bwà kubwelamù.

¹⁵³ Ditùkù dikwàbò ngènda ndwa, ngeela meeji ne mvwa munkaci mwà kuya ku Shreveport, anyì kulwila mwaba kampànda. Mêmè kutàngila. Mêmè ne: "Mici's ki kufwayi eku. Mashinde's ki kufwawù eku. Bilòngò ki kufwàbi eku's. Ndi munkaci mwà kupùnga ne lufù. Buloba bùdi munkaci mwà kupùnga ne lufù. Byônsò bìdi munkaci mwà kupùnga ne lufù. Bintu byônsò pa buloba ebu bìdi munkaci mwà kupùnga ne lufù." Tudi basòmbe mwab'ewu mu dìndà emu, munkaci mwà kupùnga ne lufù.

¹⁵⁴ Ncyà bushùwà ne kudi buloba mwaba kampànda, mùdì bintu byônsò kabiyì bifwa to. Piìkalaku buloba mwaba ùdì bintu byônsò bipùnga ne lufù, kùdì ne cyà kwikala bùmwè mwaba ùdì bintu byônsò ne mwoyi. Ki citùdì tujinga ncyòcì aci, bwà kufika mwaba mu awu mùdì... micì yìdì yishààla kayìyi yìfwakù to. Kaa, mwaba ùdì bintu byônsò kabiyì bifwakù to kàdì biimane mu—mu butùmbi bwà Nzambì.

¹⁵⁵ Mpindyewu, mpindyewu, myensa yìsatu yà kumpàla yitùvwà naayi mpindyewu ayi, mmitèèke mwaba wa kushindamijila bitùdì twamba. Wa 1 ne: "Dibuulula dyà Yesù Kilistò." Mwi2 ne: "Dyàkafidiibwa kùdì Yone kùdì mwanjèlo." Ne mwi3, ùdì ne: "Wa disànkà, dibènesha kùdì aba bàdì babala, ne," pawìkala kùyi mwà kubala to, "wa disànkà ng'ewu udi umvwa." Kwêna mwà kubala anyì? Udi uCítèèleja ànu cyanàànà. Kwajiki. "Wa disànkà ng'ewu udi ubala, ne," pawìkala kùyi mwà kubala

to, “wa disànkà ng’ewu udi umvwa, bwalu cikondo cikaadi pabwîpì.”

¹⁵⁶ Mpindyewu, cinkaayibi cìdì nsangilu wa eci umvwija, ngwa ne, Yone, mufundi awu, mudicifunda, uvwa... *Ewu* n’Yone mwaba ewu, wàmба ànu “mabènesha” ne bikwàbò. Mpindyewu, cíndì ngeela meeji ne civwa, mu Dipungila Dikulukulu, mmwakwidi ùvwa wìlmana mu dindà ne ùbala Mifundu. Disangisha dìvwa dítèèleja. Bààbûngì kabàvwa mwà kubala to. Pa nànku kwambàye ne: “Wa disànkà ng’ewu udi ubala, ne ewu udi umvwa.” Nwamònú anyi? Mubadi ne muumvu; ewu udi ubala, ne uumvwa, mmubènèshìibwe. Pa nànku wêwè ànu musòmbe ne mucítèèleje, udi mubènèshìibwe. “Wa disànkà ng’ewu udi ubala, ne ewu udi umvwa, bwalu cikondo cikaadi pabwîpì.”

¹⁵⁷ Mpindyewu, kuumukila ku 4 too ne ku 6 ndyela dyà Èkèleeziyà mwoyi. Mpindyewu tudi baswè kwangata mwi4 ne mwi6 ewu.

¹⁵⁸ Mpindyewu, kumpàla kwà twêtù kumulenga, ndi muswè bwà muntu ne muntu ateete bwà kwela meeji bikolè mpindyewu. Ncinyì ciine aci mpindyewu? Ndibuulula dyà Yesù Kilistò, mwaba wàkuumusha Nzambì cibwikilu cyà cikondo. Ki cikondo ncyôcì *eci*, civwa Yesù kàyi mwà kumònà pàvwàYe pa búloba apa, bikondo byà èkèleeziyà, cìvwà mwà kwenzeka. Pa nànku, Nzambì kuumushaye cibwikilu aci, kucipulumuna, kàdi kulekela Yone utàngilamu bwà kumònà civwa cikondo cyônsò cyà èkèleeziyà ne cyà kwenza, ne kucifunda mu mukàndà ne kucitùminaye èkèleeziyà mwandamutekète.

¹⁵⁹ Ncinyì ciine aci? Kilistò mubuulùdìibwe mu matùkù à cyenzedi Cyèndè—Cyèndè. Mmûle tente ne cyenzedi, Mukàndà awu’s. Nènku m’Mukàndà wà—wà cipròfetà ùdì Kilistò mufile, Nzambì mmutùpèèle kùdì mwanjèlo Wendè, mufunda kùdì Yone. Ne dibènesha kùdì muntu yónsò wìkala mwà kuWùbala anyì kuumvwa bàWùbala, bwalu—bwalu cikondo cikaadi pabwîpì pàdì eci cyônsò cìkùmbana.

¹⁶⁰ Tudi ne nshindameenu mwîmpè mpindyewu. Kàdi vùlukààyì ne, tudi balame Èkèleeziyà mu meeji. Ku luseke lùmwè, Èkèleeziyà kubangayè; ku lukwàbò luseke, èkèleeziyà ùdì ùjika. Netùtambe kubwelamu, mu dìmwè dilòòlò, patwàlenga bikondo byà èkèleeziyà.

Yone kùdì èkèleeziyà mwandamutekète yìdì mu Asie: Ngâsà ikale kunùdì, ne ditalala, byà kùdì ewu udiku, . . . uvwaku, ne udi ne cyà kulwa; ne byà kùdì Nyumà mwandamutekète yìdì kumpàla kwà nkwaswa wa butumbi ayi.

¹⁶¹ Mpindyewu tudi tubwela mu bitùpà bìdì kabiyì byùmvwika ne byà ndondo byà bimfwànyì abi. Mbambila èkèleeziyà mwandamutekète yìdì mu Asie Mineure. Bavwa ne—bavwa

ne... Bi—bikondo, pa diine dîbà adi, bivwa ne cyà kulwa mu matùkù àcìvwà alwa. Ki kubazàngikaye ne—ne kubatumbisha bwà mudimu wabo ne byàkenzàbo. Kàdi, mpindyewu, mbambila èkèleeziyà ayi's, èkèleeziyà mwandamutekète yìdì mu Asie Mineure ayi's.

¹⁶² Mpindyewu, Asie Mineure kàvwa Asie musanga ntete nànsha, cipaapu cyà buloba cyà Asie. Civwa ànu citùpà cikesè cyanàànà. Bàdi bàmba ne, mmwaba wa bunène bwipacila Ètat wa Pennsylvania ewu, nwamònù's, anyì cintu bu nànkú awu, anyì Indiana; ànu kaaba kakesè cyanàànà kàdi èkèleeziyà mwandamutekète eyi misòmbele. Kuvwa èkèleeziyà mipite ayi cikondo aci's. Nènku, kàdi, cyàkabuulula ngiikadilu wayi. Mpindyewu ndi mbala kaaba aka cìndì mupete ku dibala dyànyì dyà maalu malonda a cyôcì aci.

¹⁶³ “Nènku ùdi... Mwedìibwe mulawu ng'ewu udi uumvwa ne, anyì, ne udi kàyi uCítèèleja to.”

¹⁶⁴ Nènku—nènku mpindyewu, cìdi cìpweka ne mu cikondo cyà mvensa mwi4 utùdì baswè kuumvwija cintu kampànda mwab'ewu ewu. “Byà kùdì Ewu uvwakù, ne udikù, ne udi ne cyà kulwa, ne udi ne Nyumà mwandamutekète; byà kùdì Nyumà mwandamutekète yìdì kumpàla kwà nkwasà Wendè wa butùmbi ayi.” Mpindyewu: “Nyumà,” netùfike kudiyi aku pashìishe.

¹⁶⁵ Mpindyewu, mwab'ewu cìdi cileeja patòòke ne, bu nwènù mwà kumóna mwômò—mwômò amu. Kàbìdì mu mvensa wa 7, anyì mvensa wa 8, Yéyè udi ulwa cyàkàbìdì ne wàmба, kàbìdì patòòke. Mpindyewu tàngilààyi. Mbambila Èkèleeziyà mwandamutekète's. “Kùdì Ewu udiku, uvwaku, ne udi ne cyà kulwa. Úvwaku, musangu kampànda; udiku mpindyewu; ne udi ne cyà kulwa awu.” Mpindyewu, Ùdì uleeja patòòke mwab'ewu mishindù Yèndè yìsàtù, mishindù Yèndè yìsàtù yà dimwenesha patòòke dyà mudimu Wèndè.

¹⁶⁶ Mpindyewu bu nwènù mwà kwangata mvensa wa 8. Netùkafikeku, ànu mu katancì kakesè emu. Netwàngatè mvensa wa 8.

Mémè ndi Alpha ne Omega, cibangidilu ne ndekeelu, mùdì Mukalenge wàmба, udiku, . . . uvwaku, ne udi ne cyà kulwa, wa Bukolè bwônsò.

¹⁶⁷ Mpindyewu tudi tukwàta mvensa mwi4 ne mwi6 eyi's, yônsò yìbìdì yìdi cintu cimwè. Mu umwe, Yéyè ùdi wàmба ne: “Kùdì Ewu uvwakù, udiku, udi ne cyà kulwa.” Cìdì Ye uteeta kutèèka kumpàla kwà Èkèleeziyà ncinyì? Bunzambì Bwèndè. Leelù ewu, bantu bàdi bateeta kuMuvwija mu—mupròfetà. Yéyè's ùdi mutàmbe ne mupròfetà. Ne bàmwè bantu bàdi bateeta kuMuvwija Nzambì yìsàtù. Yéyè kénéa Nzambì yìsàtù to. Yéyè ùdi Nzambì umwèpelè uvwa musòmbèle mu midimu yìsàtù, didimwenesha mishindù yìsàtù yà Nzambì umwèumwè awu.

¹⁶⁸ Mpindyewu, vùlukààyì ne, eci ki Dibuulula ne: “Ne ewu yônsò udi udyùmvwa kàdi kàyì ulama mèyì à mukàndà ewu to, cyèndè citùpà necyùmushiibwe mu mukàndà wà mwoyi.” Yesù kéné uDibuulula bu Nzambì yìsàtu to, kàdi Nzambì umwèpelè ne midimu yìsàtu. Kaa! Nebìikale mwà kubanjika paanyimà pàà katancì kakesè, patùdì tubwela mu bikondo byà èkèleeziyà abi bwà kumònà ne mmwaba kaayi ùdìbo bajimije cyòcì aci. Cyàkafikisha dipanduluka dinène ku Nsangilu wa Nicée. Bùbìdì bwàbò bàkaya kwa nàka.

¹⁶⁹ Ne bààkenza cyàkàbìdì cintu cìmwècìmwè aci mu matùkù à ndekeelu aa, ànu bu Nsangilu wa kumpàla kwà Nicée kàbìdì, bwalu nekwìkale mukwàbò. Cyà bushùwù ùnu mündi mwimane kaaba aka emu, èkèleeziyà yà Kàtòlikè ne yà Mishòonyì neyìikale mwà kudisanga mu cintu kampàndà, anyi kwitabangana muntu ne mukwèndè. Tàngilààyì mwepiskòpo wa mutambidile wa ku Canterbury udi lwà kwàka mpindyewu awu. Byônsò bìdi munkacì mwà kudisanga pàmwè. Ne kakwenaku dilongesha dyà Nzambì yìsatu mu umwe mu Bible to. Kudi Nzambì umwèpelè.

¹⁷⁰ Ne ncibuulùdìibwe mwaba ewu mu Mukàndà wà Bwàkabuulwibwà, ne nsangilu mujimà wa Mifùndu mmufwànyìne kwikalà mujaadikiibwe mwab’ewu, ne Kilistò mmutèèkepu citampi Cyèndè. Eci’s ki Cyòcì. Muntu yéyè muumushe anyì musakidile, cintu cìmwècìmwè aci necyùmushiibwe ku Mukàndà wà Mwoyi, bwèndè yéyè. Pa nànkú tuseemenààyi ku eci kabiyi byà citù to, semenaayi ku eci ne mwoyi mukangula ne meeji munzulula.

¹⁷¹ Mpindyewu, ku Nsangilu wa Nicée, bààkafika ku mapàngadika manène àbìdì. Pa... Kaa, bààbûngì bàà kùdibo mu ditùkù adi dyà baataatù bàà èkèleeziyà wa ku cibangidilu, bavwa ne mmwenenu yìbìdì mishìllàngànè kule ne kule. Umwe wa ku yóyì uvwa Nzambì yìsàtù mu umwe, mwena busàtù. Ne mukwàbò uvwa—n’Nzambì umwèpelè. Nènku yônsò yìbìdì kupatukilayi patòoke ne kuyayi pa matàmbà àbìdì mapanduluke, mipatuke mûshindù *awu’s*. Bunzambì busatù mu umwe abu kushààlabu mwaba wà muntu umwe mulwè nzambì yìsàtù. Ci-unitaire kulwaci bwena Nzambì umwe, ànu mu cilema menemene muvwa cikwàbò aci amu’s. Pa nànkú bùbìdì bwàbò kutùngùnukabò pa matàmbà, kàdi ànu mwômò *Emu* mmubuulule Bulelèlè.

¹⁷² Yesù kavwa mwà kwikalà Tatwèndè Yéyè mwine to. Nànsha, bu ne Yéyè ûvwa ne taatù pa kuumusha Nyumà Mwîmpè, díbà adi Yéyè’s mmwàna mulela mu masandi. Nènku kéné... Nyumà Mwîmpè ngwàkaMwimita, ne Yéyè wàkamba ne Nzambì ngùvwa Taatwèndè Yéyè. Pa nànkú Nyumà Mwîmpè ne Nzambì... Ki Maataààyì 1:18 awu’s. Byôbì ne... Bìdi bikèngela bwà Nyumà Mwîmpè ne Nzambì bìikale Muntu umweumwe awu, cyanàànà Yéyè ûvwa ne baataatù bàbìdì’s. Ne Yéyè wàkabìikidiibwa ne

Emanùwèle, bwena kwamba ne: “Nzambì neetù.” Ùvwwa wàmba, pàvwà Ye pa buloba apa ne, Yéyé ne Taatù bàvwa Umwe.

¹⁷³ Ndi ne Mifùndu yônsò mifùnda mwab’ewu bwà nupete mìshindù wa kupeta, bu twêtù mwà kupeta lukonko elu—elu, anyì cintu kampànda.

¹⁷⁴ Mpindyewu, pààkamwèneshiibwà Ye kaaba aka, bu mìshindù yisatu yà mudimu yà bumùntù Bèndè abu, “Ewu uvwakù, Ewu udiku, Ewu wâlwa awu, wa Bukolè bwônsò,” mpindyewu, kakwèna Nzambì yisatu mwaba awu to; kùdi Nzambì umwèpelè.

¹⁷⁵ Kàdi mu Nsangilu wa Nicée, bwà kwenza cyôci eci, bwà kwenzabo ciine eci, byàkakèngela bwà kwangatabò bùsàtù, bwalu mu beena Loomo bàvwa ne nzambì bûngì cyanàànà. Bavwa bàsambilà bankambwa bààbo bafwè. Ndi ne bwalubulonda abu apa mene mwaba utùdì mwa kucyàngacila. Nwamònù anyi? Bâvwa bàsambilà bankambwà bààbo bafwè abu’s. Ki bwà cinyì bàdi ne Cecilia Munsantu, ne Markus Munsantu, ne munsantu, munsantu, munsantu, munsantu, munsantu, munsantu.

¹⁷⁶ Piine apu, mpààkamba mupostòlò Peetèlo ne: “Kakwèna mutwangaji mukwàbò pankaci pàà Nzambì ne bantu to, pakuumusha Muntu awu Kilistò Yesù.” Umwe.

¹⁷⁷ Byàkakèngela bwà kwikalabo ne nzambì wa bùsàtù. Pa nànkù, bôbò—bôbò bavwa ne Jupiter, Mars, Venus. “Kàdi kacivwa cijaalame to, kucîteeka cyônsò pa Nzambì umwèpelè,” ki kucikosololabo ànu mu tutùpà, ne kuvwija midimu yisàtù yà Nzambì ayi bwà kwikalayi Nzambì yisàtù mishìllangàne.

¹⁷⁸ Kàdi Yéyé ùdi wàmba patòòke mwab’ewu, mu Bwàkabuulwibwà ne, Yéyé ùdi Nganyì. “Mêmè ndi Ewu wàkadiku, Ewu udiku, ne Ewu udi ne cyà kulwa, wa Bukolè bwônsò.” NetùlikeKu pashìishe ndambù mwab’ewu, Yéyé mmwambe ne: “Mêmè ndi Alpha ne Omega,” A ne ku Z, cyônsò nkòòng, alphabet wa cyena Ngelika awu. “Mbata wa mu Cibanda, Rose wa Shalonà; Taatù, Mwânà, Nyumà Mwîmpè; Ewu wàkadiku, udiku, ne wâlwa awu; Muji ne Mütòlokù wà Davìd.” Yéyé udi Nzambì, Nzambì’s. “Kakù—...” Timòtè wa Kumpàla 3:16, “Kakùyi dipangakanangana to, bwalu busokoka bwà difwànà dyà Nzambì mbunène: bwalu Nzambì wàkamwèneshiibwa mu mubidi, mumònà kùdi Banjèlo, mwitàbùùjìlbwe pa buloba, mwakidila mu Butùmbi.” Nzambì’s wè! Kî mmupersona mwisàtù anyi mupròfetà to, kàdi Nzambì Yéyé mwine, mumwènèshiibwe mu mmwenekelu wa buntu. Mpindyewu, eci ndibuulula, nwavùlukaayi’s.

¹⁷⁹ Mpindyewu, Nzambì, ku cibangidilu, ùvwa Yéhowàh munène uvwa musòmbèle mu Dikunji dyà Kapyà awu, mulembèlè kumutù kwà Izàlèlè, e kubàlombolayè. Awu ùvwa n’Nzambì, Mwanjèlo wa Cipungidi. Wakatùùluka pa mukùnà;

mukùnà mujimà kukwàtawù Kapyà. Kapyà kutùùka ku mukùnà aku, ne kufunda Mèyì matùma Dikumi. Yéyè wàkabììkidiibwa ne “Buutaatù bwà Nzambi,” bwà bânà Bèndè, cisà Cyèndè cisungula cyà bantu, beena Yuda.

¹⁸⁰ Pashiishe Nzambi umweumwe awu kumwèneshiibwaye mu mubidi mulediibwe kùdi virgo wàkafukaYe munda mwà Mâriyà, ne kusòmba ne kuvwàngala ne kwasaYe ntentà, mutùdì mwa kwamba's, munkaci mwà bantu. Ne Nzambi umweumwe awu wàkavwijiibwa mubidi ne wàkasòmbela munkaci mwètù. Bible ngudi mwambe nànnku. “Nzambi uvwa munda mwà Kilistò.” Mubidi awu uvwa n’Yesù. Yesù ne: “Munda Mwèndè muvwa musòmbèle kaabujimà kàà Bunzambi mu mmwenekelu wa mubidi.” Mpindyewu, kanwèna mwà kuMuvwija bantu bàsàtù to. Kanùbatiji mu Nzambi yìsàtù to. Kùdi Nzambi umwèpelè. Nwamònou anyi? Nzambi umwèpelè. Mpindyewu, Nzambi umweumwe ewu wàkavwijiibwa mubidi.

Wàkamba ne: “Ndi mufûme ku Nzambi, ne Ndi nya ku Nzambi.”

¹⁸¹ Paanyimà pàà Yéyè mumane kuumuka pa buloba, ku lufù Lwèndè, dijiikiibwa, ne dibìika dyà ku lufù, ne dibànda, Pôlò wàkatuutakeena Nendè mu njila wa ku Damásèkà, pacicìvwaye ànu ubììkidiibwa ne “Shawùlà.” Ki Dîyì kampànda kulwadi, dyàmba ne: “Shawùlà, Shawùlà, udi uNkengesha bwà cinyi?”

Yéyè ne: “Wêwè udi nganyi?”

Yéyè ne: “Ndi Yesù.”

¹⁸² Nènku Yéyè uvwa Dikunji dyà Kapyà, Bukènkè bwàkafofomija mèsù à mupostòlò awu abu. Ùkaavwa mwalùkilekù. Yesù umwèumwe awu ukaavwa mwalukile ku Nzambi, Taatù awu, cyàkàbìdì. Ki bwà cinyi Yéyè mmwambe kaaba aka ne: “Mêmè ndi wa Bukolè bwônsò,” mu mmwenekelu umwèumwè uvwaYe kumpàla kwà kuvwijiibwaYe mubidi awu; ne mubidi Wèndè ùvvàYe musòmbèlemù, ùdibo babiìkila ne n’Yesù awu, Muntu utùdì bamanye awu, Yesù.

¹⁸³ Mpindyewu, ànu mùdì bâàbûngì bâà kunùdì nwénù ba-unitaires bananga nubatiiza mu: “Dînà dyà Yesù,” amu nudi bapiile. Kùdi nkamà yà ba-Yesù pa buloba leelù ewu, kàdi kùdi Mukalenge Yesù Kilistò ànu umwèpelè. Wàkalediibwa Kilistò. Ba-Yesù bûngì cyanàànà. Nkaatu mutwiletwilangane ne bâàbûngì bâàbo. Kàdi kùdi Mukalenge Yesù Kilistò umwèpelè, Yéyè udi Nzambi.

¹⁸⁴ Nènku Taatù, Mwânà, ne Nyumà Mwîmpè kî mménà to. Mmyânzù yidi yikumbanyina Dînà dîmwèpelè. Bâdi bâbâtiiza ne: “Dînà dyà ‘Taatù, Mwânà, Nyumà Mwîmpè.’” Taatù kî ndînà to, ne Mwânà kî ndînà to, ne Nyumà Mwîmpè kî ndînà to. Mmwânzù, bu mùdì “muntu.” Ki cidìku aci, Nyumà Mwîmpè. Muntu... Anyì, nyumà, Nyumà Mwîmpè. Pashiishe kwamba ne: “Mu dînà dyà ‘Taatù.’” Tàngilààyì baataatù, ne bânà bâà

bânà bèènù bàà balùme. Tàngilààyì bantu bàdì muneemu aba. Nwamònù anyì? “Taatù, Mwânà, ne Nyumà Mwîmpè” kí ndinà to. Mmwânzù ùdi wenda ne Dînà dyà “Mukalenge Yesù Kilistò.”

¹⁸⁵ Mùshindù awu ke ûwwa Èkèleeyiyà wa bapostòlò ùbatiiza, ku cibangidilu. Nènku nêndombèku muntu nànsha umwe bwà kupatula mufundu nànsha ùmwè, anyì musangu ùmwè mu maalu malonda, ukààdikù muntu nànsha umwe mubâtìjìibwe mu Èkèleeyiyà wa beena Kilistò mu mùshindù mukwàbò kanà wônsò pa kuumusha mu...pakuumusha mu Dînà dyà “Yesù Kilistò” too ne pààkabangabo èkèleeyiyà wa Kàtòlikè. Nènku ke kwangatabò “Taatù, Mwânà, ne Nyumà Mwîmpè” bu twitabààyì kampàndà. Mpindyewu twalaayaaku bwalubulonda bwènù abu, bàmwè, bafundi bàà maalu-malonda. Èyowà. Cintu bu nànkú kacítukù to. Paanyimà pàà cidimu cyà 304 paanyimà pàà Kilistò, 304, ki kulwaku dibatiiza dyà pasatu bwà Nzambi yísàtù: “Nzambi Taatù, Nzambi Mwânà, Nzambi Nyumà Mwîmpè.” Aci’s mbumpàngaanù.

¹⁸⁶ Kumpàla kwà lumingu elu kujika, nêncibadilè mu mikàndà bwà kunuleejila ku Bible. Tudi twakula mu dindà emu pa Dibuulula, ne tujaadika mwaba ùdidi dìbwela, ne mwàkabangadi kwikalaku. Alukila ku Bulelèlè, mwanèètù! Tudi mu ditùkù dyà ndekeelu.

¹⁸⁷ Indilaayi too ne patwafika ku èkèleeyiyà wa Efèso awu ne kumufwànyìki ja ne wa Laòdikiyà, ne kutàngila cyàkenzekà pankaci pààyì. Nénùmòne mùshindù wàkadifinda cintu aci’s. Kubwela mu eikondo cyà Luther, kwamba ne: “Udi ne dînà dyà ne udi ‘ne mwoyi,’ kàdi udi mufwè.” Mwaku mene Saàdì udi wumvwija ne “mufwè.” Bôbò kucijimija mu bidimu cinunu ne nkamà yitaanu byà Bikondo byà Mídímà. Yônsò wa ku èkèleeyiyà ayi wàkalama aci too ne pa diine dîbà adi. Pashìlshe pààkenzàbo Nsangilu wa Nicée mu cidimu cyà 606, ki dîbà adi kushimbulabo Dînà adi ne kuDyenzabù Nzambi yísàtù.

¹⁸⁸ Wàkamba mwab’ewu ne: “Mêmè ki Ewu wàkadiku, Ewu udiku, ne wâlwa awu, wa Bukolè bwônsò.” Bushùwà’s.

¹⁸⁹ Ùwwa ne Kampànda wa pàsàtu pa buloba apa. Pàvvà Ye pa buloba, Ùwwa Kampànda wa pàsàtu. Pa buloba, Yéyè uvwa Mupròfetà. Ùdi kàbìdì Mwakwidi, mu Dyulu’s. Nènku pààlukilà Ye cyàkàbìdì pa buloba, Yéyè neikale Mfùmù. Mupròfetà, Mwakwidi, ne Mfùmù. Ewu wakadiku, udiku, ne wâlwa awu’s. “Ewu wakadiku,” uvwa n’Yesù, mupròfetà. “Ewu wakadiku mpindyewu,” m’Mwakwidi, ûfila milàmbu yà nyumà, Mwakwidi Munène udi mwà kulengiibwa kùdì njiya yà mateketa ètù, kàdi kuDisokolola ne kujaadika ne Ùdi munkaci mwètù. Mupròfetà, Mwakwidi, ne Mfùmù, kàdi Nzambi Umwèpelè.

¹⁹⁰ Pàvvà Ye pa buloba, Ùwwa Mupròfetà, Dîyì adi. “Ntèmù wa lulamatu,” müdì Bible ùMubiikila, paanyimà ndambù. Ntèmù wa lulamatu, mmupròfetà awu. Yéyè uvwa Mwakwidi, nènku

pavwa... Yéyè ùdi Mwakwidi mpindyewu, ne pààlwà Ye, Yéyè neikale Mfùmù.

¹⁹¹ Nwêñù bafikeku, babale Bwàkabuulwibwà 15:3, nudi mwà kumònà mu Bwàkabuulwibwà 15:3. Tubuululààyaaaku mwab'ewu bwà kumònà cìdì Ye... pìíkalàYe Mfùmù, neWikala Mfùmù pààlwàYe. Mpindyewu netùfikè ku Bwàkabuulwibwà, nshapità wa 15 ne ku—ku mvensa mwì3.

Nènku bavva bìmba musambu wa Môsà musadidi wa Nzambì, ne musambu wa Mwânà wa mùkòòkò, bàmba ne: Byenzedi byèbè mbinène ne byà dikema, Mukalenge Nzambì wa Bukolè bwônsò; njila yèbè myakane ne milelèlè, wêwè Mfùmù wa bansantu.

¹⁹² CivwaYè ncinyì pa buloba? Mupròfetà. Mmunyì mwàkamanya bantu ne Yéyè ùvwa Mupròfetà? Wàkenza cimanyinu cyà Maasiyà, uvwa Mupròfetà awu. Kaa, Dínà dyà Mukalenge dibènèshiibwè's wè! Mmunyì mwàkapangilabo kuMujingulula? Bwalu bavva bindile cintu kampànda cikwàbò. Ne Yéyè wàkenza cimanyinu cyà Maasiyà, kàdi bôbò kabàyi baswè kucitéèleja to. Ùvwa Mupròfetà.

¹⁹³ Môsà wàkamba ne: "Mukalenge Nzambì webè neàjuule Mupròfetà mufwànàngane naanyi. Nebyènzeke ne bôbò kabàyi batèèlèje Mupròfetà ewu to, nebuumushìlbwe munkaci mwà cisàmbà."

¹⁹⁴ Yéyè ùvwa Mupròfetà pa buloba apa, mpindyewu, bwalu Yéyè ùvwa cinyì? "Ntèmù wa lulamatu wa Dîyì dyà Nzambì." Amen. Yéyè uvwa Dîyì dyà Nzambì dimwènèshiìlbwe patòoke.

¹⁹⁵ Yone Munsantu, nshapità wa 1.

Ku cibangidilu kwàkadi Dîyì, ne Dîyì dyàkadi ne Nzambì, ne Dîyì dyàkadi Nzambì.

Ne Dîyì dyàkavwijiibwa mubidi, ne dyàkasòmbela munkaci mwétù, . . .

¹⁹⁶ Yéyè ùvwa ntèmù mulelèlè ne wa lulamatu ku Dîyì dyà Cyendèlèlè dyà Nzambì. Yéyè ùvwa Dîyì, ùvwa Dîyì dyà Nzambì. Nènku, bu mùvvwàye Dîyì, Yéyè ùvwa Mupròfetà. Bwalu Dîyì dyà Nzambì divwa dituuta nkòkà munda Mwèndè. Ùvwa ne cyà kwamba ànu Cintu címwèpelè aci. "Ncyéna mwà kwenza cintu nàンsha címwè mu Mémè to, ànu cìdì Taatù uNdeejia bwà kwenza aci. Ki m'Mémè udi wenza byenzedi to. Kàdi Taatù udi musòmbèle munda Mwànyì, Yéyè ngudi wenza byenzedi. Mémè ne Taatù Wanyì tudi Umwe. Taatù Wanyì udi munda Mwànyì," mwàkamba Yesù, Muntu awu, Tabernacle awu.

¹⁹⁷ Nzambì ùdi ne myânzù yàbûngì: Yéhowàh, Yéhowàh-Yilè, -Laafa, -Manassé. Kaa, ààbûngì! Ùdi ne ménà mwandamutekète mambakaja, à bupikudi. Ùdi ne myânzù yàbûngì: Rose wa Shalòna, Mbata wa mu Cibanda, Mùtootò wa mu Dindà; Taatù, Mwânà, Nyumà Mwîmpè. Byônsò abi. Kàdi Yéyè ùdi ne Dínà

dyà buntu dìmwèpelè. Nzambì ùvwa ne Dînà ànu dìmwèpelè, ne diine adi dìvwa “Mukalenge Yesù Kilistò.”

¹⁹⁸ PààkalediibwaYe, Kilistò, Mukalenge awu. Paanyimà pàà matùkù mwandamukùlù, Nyumà Mwímpè kumwinyika Dînà Dyèndè ne “Yesù.” Mamwéndè ùvwa muMutengwishe, ne kuMwinyika ne “Yesù.” Ùvwa muledìibwe Kilistò.

¹⁹⁹ Byenze bu ne, ndi muledìibwe Branham. Mvwa Branham pangààkalediibwa, kulwabò kumpa dînà dyà “William.”

²⁰⁰ Amen. Ne Yéyè wàkalediibwa Kilistò, Musùngidi. Nènku pààkakùmbajaYe matùkù mwandamukùlù, BààkaMupèèsha Dînà dyà “Yesù.” Ne Yéyè ùvwa Mukalenge wa Butùmbi, mumwènèshìibwe. Pa nànkú, Yéyè ùdi Mukalenge Yesù Kilistò, Nzambì wa Butùmbi mumwènèshìibwe munkaci mwètù. Kaa, s’ki Yéyè awu!

²⁰¹ Pa buloba apa, Yéyè ùvwa Mupròfetà. Mu Butùmbi, Yéyè ùdi Mwakwidi. PààlwàYè, Ùdi Mfùmù. Kaa! Mêmè ntu munange aci’s.

Mupròfetà: “Ntèmù wa lulamatu wa Dîyì.”

Mwakwidi: “Ne Mashì Èndè Yéyè mwine kumpàla kwà Nzambì.”

Mfùmù: “Mfùmù wa bansantu.” Kí m’mfùmù wa buloba to, mpindywè. Yéyè ùdi Mfùmù wa bansantu. Tudi ne bamfùmù bàà pa buloba pa bantu abu. Kàdi tudi ne Mfùmù, kàbìdì, ne Bukalenge. Ki bwà cinyì tudi twenza maalu bishìllàngàne.

²⁰² Ànu mûmvwà mwambe matùkù mashààle aa, bwà mukàjànyì, tuwwa tuya ku makàjiinyì muneemu ki twêtù kumònà cishìmà, bu nànkú awu’s. Kuvwa mmu cikondo cyà muvù wa luuya, mukàjì kampànda ùvwa muvwale nkanzu. Ki mêmè kwamba ne: “Aci’s ncintu cyà dikèma’s.” Mêmè ne: “Bu ne mvwa ne cyamu cyànyì cyà fôtô, nùnkú’s ndi mukwateku fôtô wa inâbànzà ewu’s.” Nwamònù anyì? Bwalu twêtù... Awu’s ùvwa mukàjì wa kumpàla utwàkamònà muvwale jipè, nudi bamanye’s, muvwale ànu mutùbi bìkèngela bwà inâbànzà kwikalaye muvwale’s, bakàjì bônsò mene’s.

²⁰³ Kwambaye ne: “Èè, Bill, mbwà cinyì cisàmbà cyètù cìdì civwala nànkú, kàdi twêtù mbatufundile nànkú awu anyì’s?”

²⁰⁴ Mêmè ne: “Ki ncisàmbà cyètù to. Mbantu bàà Nzambì. Bantu bàà Nzambì, mbalòmbiìibwe cijila.”

Yéyè ne: “Èè, kabàtu bàya mu èkèleeyìà anyi?”

²⁰⁵ Mêmè ne: “Kudi inâbànzà mwaba awu mene, utu wimba mu korale mu èkèleeyìà kampànda mwab’ewu.”

“Èè, dîbà adi, mbwà cinyì ciine aci?”

²⁰⁶ Mêmè ne: “Bwalu yéyè kí mmulongèshìibwe mùshindù mushìllàngàne to.” Ncyà bushùwà menemene.

²⁰⁷ S'ki èkèleeziyà wa musunya awu, netùbwewelemu lumingu elu; Èkèleeziyà wa nyumà, èkèleeziyà wa musunya. Yídi yónsò yàlukila kùdì èkèleeziyà uvwa tuyilelè, bu mùdì Bible mwambe, mu Bwàkabuulwibwà 17, ne bàvwa mwa kucyenzo. Yídi munkaci mwà kwalukila patùdì twakula apa, yónsò ayi, yenza maalu ànu bu yéyè, yìdìvvija bulongolodi. “Èè, twétu's tudi cikampànda... Tudi tudivwija bulongolodi. Tudi cikampànda ne tudi cikansanga.” Kabìvwa nànku ku cibangidilu to. Bànyenga èkèleeziyà bukolè bwônsò bàbùtèèka pa mwepiskopo anyì paapà. Nzambì ùdi mu Èkèleeziyà Wendè, munkaci mwà cisàmbà Cyèndè, ùDìmwèneshila mu beena kwitabuuja ne mu myaba yónsò, mpindyewu. Kàdi mu ditùkù edi...

Yéyè ne: “Èè, twétu katwèna beena Àmèrikè anyì?”

²⁰⁸ Mémè ne: “To. Twétu tudi basòmbèla apa, kàdi katwèna beena Àmèrikè to. Twétu tudi beena Kilistò. Bukalenge bwètu mbwà ku Dyulu.”

²⁰⁹ Nènku pììkalabi ne nsòmbelu yètù mmifùmìne kuulu Kwàka, díbà adi's tudi twenza maalu mùshindù awu. Bwalu, tudi tulwa... Mwoyi wètù ngwà ku Mwaba wa cijila. Mbishiìlàngàne. Mbyà mvwadilu mushììlàngàne. Bakàjì bàà kuulu Kwàka bátù ne nsuki mile. Ne bóbò kabátù balaaba bilaabu kwísù to. Ne—ne kabátù bàvwàla tùpùtulù to. Bóbò—bóbò bátù bàvwàla njipè, ne nkanzu mileemilè ne nkanzu. Ne bádi ne nsuki mile, ne bikwàbò. Pa nànku—ngiikadilu awu, wa kuulu Kwàka awu, ùdi ùdileejila pambidi pèètù.

²¹⁰ Balùme kabátù bànwà mfwanka, bàcyànkunya mfwanka, bashima, anyi biiba to. Bàdi bafùma, yàbo nyumà, mmifùmìne mu Mwaba wa cijila, yìbenzeja maalu à cijila, bajingululangana muntu ne mukwende bu bâñà bàà muntu. Uh-huh. Kí cyôci aci's.

²¹¹ Twétu tudi bàà mu Bukalenge kampànda, ne tudi ne Mfùmù. Ne Yéyè ùdi Mfùmù wa bansantu. Né mwaku munsantu ùdi ùfùmina ku mwaku wà “bajidiìbwé.” Díbà adi pàdì muntu mujidiìbwé, Kilistò, Nyumà Mwímpè ùdi ùbwela mu mwoyi ne ùlwa Mfùmù pambidi pèndè. Kaa, ekèlekekè! Aci's civwa ne cyà kubwela kuya mu ndòndò. Kaa! Pàdì lupànzà lujidila lwà Nzambì... Kilistò, Mfùmù, Nyumà Mwímpè, ùbwela munda. Ne Yéyè... Mfùmù's ùtu ne citùpà cyà buloba Bwèndè. Amen. Nènku buumùntù bwèbè bwônsò mu kaabujimà mbukòòkesha kùdì Mfùmù wa bansantu. Bukalenge's! Bukalenge bwônsò bwà pa buloba nebùkankishiibwe, bùsùnsudiibwe ku bukolè bwà bombes. Kàdi Bible ùdi wàmба ne: “Twétu tudi twakidila Bukalenge bùdì kabùyi mwà kunyungishiibwa to.” Amen. S'ki Yéyè awu, Mfùmù wa bansantu.

²¹² Ndi muswè bwà nwénù kumònà bimfwànyì byà Kilistò, kàbìdì, mu Bible ne panu pa buloba apa. Pa buloba apa, Yéyè uvwa Mupròfetà. Nudi nwítabuuja aci anyì? Mupròfetà n'Díyì. Aci kaayi tudi bamanye. Mwaku ewu mupròfetà ùdi ùmvwija

ne “muumvwiji wa Dìyì wa kùdì Nzambì.” Dìyì dyà Nzambì ndifundiibwe, ne mupròfetà ùdi ne Nyumà wa Nzambì munda mwèndè. Nènku, nudi bamanye’s, mupròfetà mu Dipungila Dikulukulu ùvwa ubiikidiibwa ne “nzambì.” Mbanganyì bàvwa bamanyè aci?

²¹³ Yesù wàkamba ne: “Piìkalabi ne bààkabàbìikila ne mbanzambì... Ki mbifundiibweku mu mikenji yènù ayi, ne bádi... ‘Nudi banzambì’ anyì? Nènku piìkalabi ne bààkabàbìikila ne ‘banzambì,’ aba bàvvà Dìyì dyà Nzambì dilwila kudibò abu, mupròfetà, mmunyi munwàmpìisha Mémè pâNdì ngàmba ne Ndi Mwânà wa Nzambì?”

²¹⁴ Bwalu, yéyè wàkabìikidiibwa ne “nzambì,” bwalu yéyè wàkambula munda mwèndè Dìyì dyà Nzambì, EMU MMÙDI MUKALENGE WÀMBA. Ki bwà cinyì, mwaku ewu mupròfetà ùdi ùmvwiya ne: “dyèndè—dyènde dyumvwija kí ndyà kusambakaja ne cintu to.” Nwamònù anyì? Piìkala Nzambì... Yéyè ùdi wàmba ne: “Kwôkò kwikale muntu munkaci mwènù, udi wa nyumà, anyì mupròfetà, Mémè Mukalenge nêngààkulangane nendè. Cìdiye wàmba cyòcì cyènzeke, díbà adi numutèèleje, bwalu Mémè ndi nendè. Kàdi cyòcì kaciyi cyenzèke to, díbà adi kanùmutèèleji to; Mémè ncýéna mumutume to.” Ki mùshindù wunùdi nucimanya awu’s. Nènku díbà adi, nudi numònà’s, Dyumvwija dyà kùdì Nzambì dyà Dìyì dìdi ne cyà kukùmbanangana ne dibuulula dyà ndekeelù kùdì èkèleeziyà.

²¹⁵ Yéyè ùdi Nzambì, wa Bukolè bwônsò. Pa buloba apa, Yéyè ùvwa Mupròfetà, cìdì cyumvwija ne mukanku. Mbanganyì bádi bamanye ne mupròfetà ùtu ùbadiibwa bu mukanku?

²¹⁶ Mukanku ke nyuunyi mutàmbe bukolè udiku, wa bukolè butàmbidile. Yìmwè yìdi ne mapwâpwà pàdìwu mwolola afika ku metre anaayi ne citùpà, ku ntengu ne ntengu mukwàbò. Ùdi mwà kujuuka ne kubùùka muulu menemene mu mùshindù wa ne nyuunyi mukwàbò yônsò ewu mudìdìngé ànu mutèète kumulonda, mmufwànyìne kusùnsuluka, masàlà mmafwànyìne kumupòòpoka ne mmufwànyìne kutaayika. Bwà bwalu kaayi? Mmwibakiibwe mu mùshindù wà pabwàwù. Nènku nebìmwambulwishe ku cinyì bwà kubanda muulu bulemu piìkalaye kàyì mwà kumònà cìdiye wenza padiye muulu amu apu? Udi wakula bwà dísù dyà kabemba anyi? S’bìvwa bikèngela wêwè kumònà dísù dyà mukanku’s.

²¹⁷ Kabemba kàdi mwà, nkafwànyìne kumònà nzòòlo. Ncyà bushùwà. S’ki lutatù lùdìku leelù ewu ne tûmwè twà ku tubemba etu’s. Uh-huh. Kàdi, ndi nnwambila ne, mukanku ùtu üya bikolè mu mùshindù wà ne, kabemba kôkò kadidìngé kuwùlonda, nkafwànyìne kufwà’s. Mweyelu newùkashìikile. Kakèèna mwà kubwela mu bipaapu bìdì mukanku wubwela abi to.

²¹⁸ Nènku díbà adi ùdi ne dísù, mu mùshindù wa ne ùdi mwà kumònà kule, pàdìwu ufika muulu mwàmwa. Pa nànku ki bwà

cinyì Nzambì wàkabììkila *baprofetà* Bèndè ne: “mikanku.” Ùdi ubànda muulu amu, ne yêye’s mmukanku. Ùdi mwà kumònà, kule menemene.

²¹⁹ Ne Kilistò pèndè, pa buloba apa, ùvwa Mukanku. PààkafwàYe, Úvwa Mwakwidi, nènku aci cyàkaMuvwija Mwânà wa mùkòòkò. Ncyà bushùwà anyì? Nènku pààlwàYe cyàkàbidì, Yéye ùdi Mfùmù, pa nànku Yéye neikale Ntambwe, amen, Ntambwe wa cisàmbà cyà Yuda. Amen. Yéye m’Mukanku, Mwânà wa mùkòòkò, ne Ntambwe; amen; Taatù, Mwânà, ne Nyumà Mwîmpè; Mupròfetà, Mwakwidi, ne Mfùmù; Ewu wakadiku, udiku, ne wâlwa awu; wa Bukole bwônsò; Alpha ne Omega, kuumukila ku cibangidilu too ne ku ndekeelu, Nzambì wa Cyendèlèlèlè.

²²⁰ Ndi muswe kunukonka, bàmwè bàà ku nwénù beena Kàtòlikè bàà mushinga mukolè, bàdì bàbììkila aci ne: “Buumwânà bwà Cyendèlèlèlè bwà Nzambì; Nzambì, buumwânà bwà Cyendèlèlèlè bwà Yesù Kilistò ne Nzambi.” Mmunyi mûdì mwà kwamba mwaku wa mùshindù awu? Mémè ewu cimbùlùntùntù, cyà mu kàlaasà kàà mwandamutekête, kàdi mêmè’s ndi mumanye cìdì cîmpè kutàmba aci. Mwaku mwânà ùdi ne cyà kwikala ne mbangilu. Pa nànku mmunyi mûdìYe mwà kwikala wa Cyendèlèlèlè cikolè mwikale mwânà? Cyendèlèlèlè kacyènaku ne ntwadijilu anyì ne ndekeelu to. Pa nànku, Yéye kénéa mwà kwikala mwânà, mwânà wa Cyendèlèlèlè, kàdi pashiishe kwikala ne mbangilu to, bwalu cintu pààcì ne m’mwânà wa Cyendèlèlèlè kacitukù to. Mwânà ùvwa ne mbangilu, nànku awu kénéa mwà kwikala wa Cyendèlèlèlè to.

²²¹ Nudi numònà’s, Yéye udi Nzambì wa Cyendèlèlèlè, kî mmwânà wa Cyendèlèlèlè to. Butùmbi’s wè! Wa Bukolè bwônsò, Yehowàh-yile, Yehowàh-laafà, mumwènèshiibwe mu mubidi: “Munda Mwèndè mùvwa musòmbèle kaabujimà kàà Bunzambì mu mùshindù wà mubidi.”

²²² Nènku mu Ditùkù dyà Mpenta, pààkapwekà Dikunji dyà Kapyà adi pa bantu, nuvwaku bamònè ne, DyàkaDyàbanya anyì? Ne ndimi yà Kapyà yàkasòomba pamutù pàà muntu ne muntu wa kudibo. Kapyà, bu ndimi, kusòomba pamutù pàà muntu ne muntu. Civwa Nzambì wenza ncinyì? ÙDyàbanya Yéye mwine mu Èkèleeziyà, kùdì muntu ne muntu, úpèésha bakàjì, balùme, ne bônsò bàà kudibo abu; civwa bitùpà byà Nyumà Wendè, ùDipandulula munkaci mwà Èkèleeziyà Wendè.

²²³ Mmunyi mûdì muntu mwà kulwa apa ne kwamba ne: “Muntu wa cijila’s m’paapà. Muntu wa cijila’s m’mwepiskòpò?” Muntu wa Cijila n’Kilistò, Nyumà Mwîmpè munda mwètù. Mmunyi mûdì mwà kwamba ne mwena kwitabuuja kénéa ne dîyì nànsha dimwè dyà kwamba? Muntu ne muntu wa kunùdì ùdi ne cyà dyamba. Muntu ne muntu wa kunùdì ùdi ne mudimu wa kwenza.

Muntu ne muntu wa kunùdì ùdi ne cyà kutwàla Mukenji. Butùmbi's wè!

²²⁴ Nyumà Mwîmpè wàkaDyàbanya mu Ditùkù dyà Mpenta. Nzambì, ùDyàbanya. “Mu ditùkù adi nenúmanyé ne Mémè ndi munda mwà Taatù, Taatù munda Mwànyì; Mémè munda mwènù, ne nwènù munda Mwànyì.”

²²⁵ “Ditùkù adi,” Nyumà Mwîmpè, “kumutù kwà bônsò, munda mwà bônsò, mu bônsò.” Amen. Ke cyôcì aci’s. Nyumà Mwîmpè ùdi ne bukenji bwà kuya mwaba kanà wônsò wùdìYe muswè kuya awu, pa muntu kanà yônsò udiYe muswè kuyapu awu. Kabyèna bikèngela bwà wêwè kwangata cidi mwepiskòpò kampànda anyì nsaserdosè kampànda wàmبا to. Yéyè ki Mwakwidi wetù umwèpelè, cyà bushùwà, Mwakwidi Munene. Mpindyewu: Mupròfetà, Mwakwidi, ne Mfùmù.

²²⁶ Mpindyewu:

Nenku... Yesù Kilistò, yéyè udi ntèmù wa lulamatu awu,... mwân’à-butè wa bafwè,... (Netùbwele mu cyôcì aci.) ...ne mfùmù wa bamfùmù bàà pa buloba. Kùdì ewu wàkatùnanga, ne kutùsukula ku mpèkaatù yètù mu mashi èndè yéyè mwine,

²²⁷ Mwaku awu *musukula* mwaba awu, mu bushùwà bwà bwalu, mu cyena Ngelika, mbwena kwamba ne “kusùùlula.” Yéyè wàkatùsùlula ku yètù... Twêtù tuvwa baswikila ku buloba, kùdì mpèkaatù wetù. Katùvwakù mwà kumònà to, katùvwakù mwà kuumvwa nànsha, katùvwawa nànsha ne cingenyingenyi cyà Dyulu anyi nî ncinyì to. Kàdi pààkalwà Mashi panshi, Akakòsa munyololo ne twêtù kusùùludiibwa. Kaa!

²²⁸ Ngâkabala bwalu bulonda kampànda musangu mukwàbò, cidi... cidi mwà kukùmbana mwab’ewu mene. Cidime kampànda wàkakwàta cikololò kàdi yéyè kucìswika ku mwonji. Ki kwambayè ne: “Némpeeshè bikololò bikwàbò dileesònà.” Ki kuswikaye cikololò cya kale aci, lwà ku mukòlò, ne nshinga kampànda, ne cikwàcikwètù aci kwamba kufwà lwà nzala’s. Kucyòkaci éyo, kaciciyi mwà kunyunguluka mwab’awu to.

²²⁹ Aci’s ki cidi, àmwè à ku malongolodi aa ne èkèleeziyà eyi myenze, mmiswikile bantu panshi ku myonjì. “Ànu ne kwéna mwà! Èè, *ebu* ke bule bwônsò bûdì mwà kwendela. Matùkù à bishima akaadi mamane kupita.” Èyowà. Udi ànu muswikiibwe’s. Kwajiki. “Cintu pààci ne n’Nyumà Mwîmpè kacitukù to. Yéyè kàtu wàkula mu myakulu muvwaYe ne ciibidilu cyà kwakula amu to.”

²³⁰ Yéyè’s ùdi Nzambì. “Yéyè ùdi ànu umwèumwè awu makèèlèlè, leelù, too ne kashidi,” Ebèlu 13:8, mwikale ne mwoyi mu èkèleeziyà yônsò. Netùkùfikè paanyimà pàà dishindamija dyà mu dindà emu edi. Nwamònà anyi? Yéyè’s ùdi Nzambì, udi ne mwoyi mu cikondo cyônsò cyà èkèleeziyà. Neikale ne mwoyi mu cikondo cyônsò cyà èkèleeziyà, ne neikale ne mwoyi

munda mwà bantu Bèndè bu...bwà Cyendèlèlè. Bwalu tudi mpindyewu, munda mwètù, ne Mwoyi wà Cyendèlèlè.

²³¹ Pa nànkù, dingumba edi divwa dimuswikile pansi, nwamònou's, "Èè, matükù à bishimà àkaadi mamane kupita. Cintu pàaci ne ndyondopa dyà kùdì Nzambì kacitukù to." Cikwacikwètù cikulakaji cikwàte ne byà luse aci kutètukaci mu mùshindù wà ne cïkaavwa cicyòke menemene kàciciyi ne mùshindù wà kwenda to.

²³² Ke dîngà ditükù kupìcilaku muntu mwímpè mwaba awu, e kwambaye ne: "Udi bamanye's, cikòlolò cyà kale cikwàte luse aci, ndi ncyümvwila luse be. Ndekeelu wa byônsò, cïvwa cïfwànyïne kwikalà cidya matalà èndè awu, kàdi's ke mùshindù umwèpelè ùdici cishàala ne mwoyi. Bikèngela ciikaleku ne cintu cyà kudyà's. Pa nànkù kacivwa ne cikwàbò cyà dyenza to, cidi ànu cipatuka mwaba awu bwà kuperetaku matalà. Pa nànkù piìkala..." Pashiishe kwangatayè wendè...kwangatayè keele kèndè ne kukòsa myonji yà cikòlolò cyà kale aci kucilekelela.

²³³ Nènku nudi bamanye's, ki bikòlolò bikwàbò bìlwawà ebi, bilwa mwab'awu, byàmba ne: "Lwâku kunu, Johnny Cikòlolò. Lwa tuye ku Sud. Cipeepèlè cyà mashika cilwalwa."

²³⁴ Nudi bamanyè mùdì bwalu anyì? Cikòlolò aci cïvwa ànu cïfwànyïne kuya mu ntàntà ùvwaci paaci mwà kuya kashììkidila awu's. Cyôci ne: "Ncyêna mwà kukòòkeshaku to. Kabyàkukumbanaku to, kabyena ànu bwètù twètù mu ditükù edi to. Katwèna—katwèna ànu mwà kucyènza to." Nwamònou anyì? Cikaavwa ciswikiìbwé ntàntà mule menemene, mu mùshindù wa ne cikaavwa ànu cyèla meeji ne cìcidi ànu ciswiìkbwe. Nwamònou anyì?

²³⁵ Nènku mùshindù awu ke ùdi bantu bàbûngì, nudi baswikila pansi ne twìtabààyi ne màngumba, kubangila ànu ku maamù ndumba wa kale kwàka, ùnwàmbila, ne: "Yesù Kilistò këna umwèumwè awu to. Ne cintu pàaci ne ndyondopa kacitukù to. Dibatiiza dyà Nyumà Mwímpè kaditukù to. Kakwènakù nànsha cìmwè cyà ku bintu bu nànkù to." Ùteeta kukwambilabi. Nudi baswiìkbwe ntàntà mule be mu mùshindù wà ne nucidi ànu nwela meeji ne nudi baswiìkbwe's.

²³⁶ Muntu mwímpè, Kilistò, wàkafila Mashi Èndè bwà Wàmònà mwà kutùsukula ne kutùsùlula ku mpèkaatù wetù. Mpèkaatù ncinyì? Ndi ndomba muntu kanà yônsò bwà kungambilà. Mpèkaatù ncinyi? *Mpèkaatù* "mbupidya." Ncyà bushùwà. "Ewu udi kàyì witabuuja mmumane kipiìshiibwa."

²³⁷ Nènku mpèkaatù webè ki cintu cìmwèpelè cidi cikupangisha bwà kwikalà mudishikamine. Ànu bwalu Nzambì mmunùsùlule ku bupidyà bwènù, kàdi nudi baswiìkbwe bikole ne twìtabààyi mu mùshindù wà ne nucidi ànu nwela meeji ne nudi baswiìkbwe's. Biikale ànu bafwa ne nzala, nwamònou's, batètukangana ne: "Mêmè ndi Presbytérien. Ndi Méthodiste.

Ndi Baptiste. Bàdi bàngambila ne (Mêmè ndi Église de Christ) ne: ‘Matùkù à bishìmà akaadi mamane kupìta. Cintu bu nànku kacitukù to.’’

²³⁸ Wêwè cikòlolò cikwàte ne luse wè! Cyûdi kùyi ulwilà mu dìndà emu mbwà cinyì’s? Bwà cinyì kwêna ubùuka uya’s? Àlèluuyàh! “Juuka ne mapwâpwà à dìndà, bùùka uye mutangile ku Dîbà dyà Bwakàne, ne dyondopa mu mapwâpwà Ààdì.” Amen. Ki cyôcì aci. Ki cyôcì aci, mwanèètù wa balùme, mwanèètù wa bakàjì. Kaa! “Ewu udi Mwânà mupe budishikaminyi, mmushààle mudishikàmine ànu byà menemene ebi.” Èyowà’s, mukalenge!

²³⁹ “Èè, mpaasàtà wanyi...” Aci ncyêna naaci bwalu nànsha bùmwè to. Bible mmwambe ne: “Udi mudishikàmine.” Ncyà bushùwà. Udi mudishikàmine.

“Èkèleeziyà wanyi...”

²⁴⁰ Èè, sùùlukààyi. “Wàkatùsukula ne kutùsùùlula ku mangumba etù, mu Mashi Èndè Yéyè mwine,” ne mutùvwije badishikàmine mu mùshindù wà bafwànyine kudyèlala meeji, ne kudyenzela, ne kudyakwila, ne kudyenzela maalu.

²⁴¹ “Èè, bu mêmè mwà kwalukila ne kwambila mpaasàtà ne bivwa bìkèngela bwà mêmè kubatijiibwa cyàkàbidi, nùnku yéyè’s...”

²⁴² Kàdi bishi bwà ne: “Udi mudishikàmine”? Eci ndibuulula, nudi bamanye’s. Èyo. Udi mudishikàmine.

²⁴³ Pawìkala mumyamina mâyì pamutù à mu kààsù kàà mukele mùshindù ewu, mu dînà dyà “Taatù, Mwânà, ne Nyumà Mwímpè,” ciinà cyà mâyì ncyôcì eci citèèka mwab’ewu, cilongolola mu dìndà emu, ciikàle ne mâyì munda. Nwamònú anyì? Èyowà’s, mukalenge. Ki mmwômò to.

²⁴⁴ Pa nànku, kwêna kàbidi muswìkìlbwe to. Udi mudishikàmine, kàdi pàmwâpa kwêna mucìmanyé to. Kàdi lekelaayi nnwàmbilè mu dìndà emu, Bible mmwambe ne: “Yéyè mmutùsùùlule ku mpèkaatù yetù, ku bupidyà bwètù, bwà twàmòna mwà kupeta Dibuulula dyà Yesù Kilistò.” Umuka uye, mudishikàmine!... bikaadi bìkèngela kwangata cìdì èkèleeziyà kanà yónsò wamba pa Bwalu abu. Angata cìdì Nzambì mwambe pa Bwalu abu. Dibuulula Dyèndè ndyôdì edi munkaci mwà kubuulula Cìdì Ye Yéyè aci’s.

²⁴⁵ “Mvwa misangu yónsò ànu mwitabuuje ne Nzambì Taatù ùvwa ne mwedi mule, mutòòke, ne nsuki mitòòke; ne Mwânà awu uvwa muntu mushìndame; ne Nyumà Mwímpè uvwa mwânà wa balùme wa kutuma wa majimbu.” Mwanèètù, aci’s mbumpangaanu. Aci’s mbumpangaanu pawìkala witabuuja Nzambì yìsàtù.

²⁴⁶ Dîyì ditùma dyà kumpàla, Dîyì ditùma dyà kumpàla ncinyì? “Teelejààyi, Éyi Izàlèèlè: Mêmè ndi MUKALENGE Nzambì webè, Nzambì umwèpelè.” Ki cyôcì aci.

²⁴⁷ Yéyè udi Nzambì umwèpelè, kî nzambì yìsatù to. Ùvwa musòmbèle mu midimu yìsatu, mukwacile mudimu mu myaba yìsatu. Yéyè ùdi Mupròfetà, Mwakwidi, ne Mfùmù. Yéyè ùdi Mukanku, Mwânà wa mùkòòkò, ne—ne Ntambwe. Yéyè ùdi Mbata wa mu Cibanda, Rose wa Shalòna, Mbata wa mu Cibanda, ne Mutòòtò wà mu Dindà, Muji ne Mütoloku wà Davidì. Yéyè ùdi kuumikila ku A too ne ku Z. Yéyè ùdi Taatù, Mwânà, ne Nyumà Mwímpè. Yéyè ùdi byônsò abi, kàdi Yéyè ùdi Umwe. Yéyè ùdi Nzambì umwèpelè. Ayi mmyânzù Yèndè yìdì miMukùmbanyine, kàdi kùdi Nzambì umwèpelè.

²⁴⁸ Kacya muntu nànscha umwe, dibeji nànscha dìmwè dyà mu Bible anyì mu maalu-malonda, too ne ku èkèleeziyà wa Kâtòlikè, katuku mubàtiìjìibwe mu diinyijiibwa mu mâyì mu dînà dyà “Taatù, Mwânà, Nyumà Mwímpè to.”

²⁴⁹ Nwêñù mwà kundeeja dibeji anyì cintu nànscha cìmwè, ucifunde, ucinshiile mwab’ewu, dilòòlò edi, nènku nêmpatukè mu èkèleeziyà emu, ngàmba ne: “Mêmè ndi mwena lubombo; ndi mulongeshe bantu mashimi.” Nwêñù mwà kundeeja mufundi umwèpelè wà Mifundi, anyì nuntwadileku bwalu-bulonda bumwèpelè, bwalu-bulonda bwena dìinà, bwìkala mwà kundeeja ne mmwaba kaayi ukaadiku bantu babàtiìjìibwe, mu Bible emu, mu dînà dyà “Taatù, Mwânà, Nyumà Mwímpè.” Anyi, ntwadilaayi Mufundu umw... anyì, mukàndà wà maalu-malonda umwèpelè, dibeji dìmwèpelè, dìyì dyamba dìmwèpelè mu maalu-malonda, mùdìku muntu nànscha umwe mubàtiìjìibwe mu dînà dyà “Taatù, Mwânà, Nyumà Mwímpè,” too ne ku Nsangilu wa Nicée wa èkèleeziyà wa Kâtòlikè. Lwâyi, nucintwàdileku; nènku nêndamike citaata paanyimà pàànyì apa ne kwenda mu Jeffersonville mujimà emu, ne nwêñù munyimà mwànyì ne mpungi, nwenda nwela. Nêmfundepù ne: “Mupròfetà wa mashimi, ùpambwisha bantu.”

²⁵⁰ Nènku, mpaasàtà, pawìkala kaaba aka mu dìndà emu, udi mufwànyìne kwenza nànkü, bìvwa bìkèngela bwà wêwè kungiitabila bwà kukwenzela nànkü’s. Nwamònu anyì? Lwâku, undeeje. Kàdi’s ngwêwè awu uciina.

²⁵¹ Mpindyewu, ncinyì aci? Eci s’ki Dibuulula. Eci s’ki Dibuulula. Nènku eci s’ki Nyumà Mwímpè, Kilistò, munkaci mwà kutùma Mukenji Wèndè kùdi maékèleeziyà. Ùtèèlejaayi. Utèèlejaayi. Ki cidi Bible ulongesha.

²⁵² Cyàkabwelela penyi? Bu nwêñù ànu kanùyì mwà kufiika munda to, kanùyì batentemukeku, munda mwà lumingu elu, nudi—nudi nupeta Nsangilu yà Nicée ayi’s. Angataayi mukàndà wà Baabùlònà Yibidì wà Hislop. Angataayi... .

²⁵³ Mpindyewu, bwalu-bulonda bwà Josèphe mbulelèlà, kàdi yéyè wàkafunda ànu kasaka kàmwèpelè bwà Kilistò, wàmба ne: “Kuvwa muntu dínà dyèndè Yesù uvwa wendakana eku ne eku, wòndopa bantu. Ne—ne yéyè wàkafwà, anyì, to, Pilaatù wàkamushebeya, ne—ne, anyì Helòode, anyì wàkamushebeya. Ki pashiishe bayiidi kuyabo kwiba mubidi wèndè, ne kuwúsokokabò. Nènku pashiishe dilòòlò dyônsò bàyaaya kàdi kukosa katùpà kàwù ne bàkadya.” Yéyè ne: “Bavwa badì bàà munyiinyì wà bantu’s.” Kàdi pààbi’s, bavwa bangata mèssà à Mukalenge, nudi numònà’s. Meeji à musunya! Josèphe awu kî mmuntu wa kutèèlejakù to.

²⁵⁴ Kàdi angataayi *Mukàndà Wà Bafwile Diitabuuja Wà Foxe*. Ke mwímpè ùdiku ne wà bushùwà’s. *Mukàndà Wà Bafwile Diitabuuja Wà Foxe*, mbanganyì bákààdiku bawùbale? Bushùwà. *Bikondo Byà Mbangilu* byà Pember, anyì—anyì *Baabùlònà Yibidì* yà Hislop, anyì—anyì ùmwè munène wà mujaadikìibwe. Anyì, mutàmbe—mutàmbe bunène utùdì nawu s’ke Nsangilu wa Nicée, Nsangilu mudyanjidile Nicée ne Nsangilu wa Nicée. Nènku nénùsanganemu ne, aci kacya kacyàkatèèdiibwaku to, kùdì muntu nànsha umwe.

²⁵⁵ Angataayi Mifùndu Minsantu bwà numònè ní kùkaatukù muntu kampànda mu Bible emu ukààdikù mubatiìjìlbwe, bákwàta mudimù ne myànzù ayi, dínà dyà “Taatù, Mwánà, ne Nyumà Mwímpè.” Bìdi byàmba nzambi yisàtù. Abi mbwà dyenza dyà mushìngà wà bampangaanu. Nènku cyena Kàtòlikè kí cîngà cintu pa buloba to ànu mmwè—mmwènekelu wa cimpangaanu wa bwena Kilistò. Nènku ku èkèleeyìà wa Kàtòlikè kulwakù Martin Luther, John Wesley, Baptiste, ba-Presbytériens, ne bakwàbò.

²⁵⁶ Kàdi mu matùkù à ndekeelu kuvwa ciibi citèèkììbwe pankaci apu, cyòcì ke cyàkakàngulà Bulelèlà cyàkàbìdì, ne: “Bible ngudi mwambe nànku,” ne mupròfetà munène uvwa ne cyà kulwa pa buloba mu matùkù à ndekeelu. Nènku tudi twitabuuja ne yéyè ulwalwa. Tangilààyì. Nènku yéyè neikale ne Èkèleeyìà. Mpindyewu, netùmònè cyòcì eci.

²⁵⁷ Mpindyewu—mpindyewu, vùlukààyi ne, eci n’Dibuulula. Kwéna mwà kuumushilaKu to. Mpindyewu, nkadyombo kaayi aka’s wé! Petààyi muntu umwèpelè mu Bible, mwaba nànsha ùmwè ukaadibuku babàtiìzè muntu mu dínà dyà “Taatù, Mwánà, Nyumà Mwímpè,” anyi mene bamyamineku muntu kampànda mâyi pa mutù, petààyiku aci mu Bible, bwà dilekelediibwa dyà mpèkaatù yààbo. Kacya kabàtukù banji kucyènza to. Nènku muntu yônsò, nànsha bôbò bamubàtiìzè bishi, ùvwa ne cyà kulwa e kubatiijiibwa, cyàkàbìdì, mu Dínà dyà “Yesù Kilistò,” bwà kupetaye Nyumà Mwímpè.

²⁵⁸ Byenzedi 19: “Pôlò kuplicilaye ku nseke mitùmbuke yà ku Efèso, kusanganaye bayiidi kampànda.” Yéyè ne... Bayiidi,

bavwa munkacì mwà kwenza disangisha dinène. Bavwa benda balonda muntu kampànda dînà dyèndè Apòlò, uvwa mwakwidyanganyi mukùdimune mucima; Baptiste uvwa mwitabuuje Yone Mubatiji, ne mwikale ujaadika ku Mifùndu ne Yesù nguvwa Kilistò awu.

²⁵⁹ Pôlò kuplicilaye mwaba awu e kumònaye Akùlà ne Piisìkìlà, mu nshapità wa 18 wa Byenzedi. Ki pashìishe kuyaye bwà kudya cyàkudya cyà mundaamuunya, anyì cintu kampànda cikwàbò, ne Akùlà ne Piisìkìlà. Kumwambilabò bwà mwine muntu munène ewu. Kuyabò bwà kamutèèleja. Yéyè kumutèèleja dilòlò adi. Yéyè ne: “Udi bîmpè be. Abi’s mbilenga be. Abi’s mbîmpè. Kàdi,” yéyè ne, “nukààdi bapete Nyumà Mwîmpè kacya nwîtabuuja anyì?”

²⁶⁰ Kàdi nwêñù ba-Baptistes bakwàtè ne byà luse bàdì pààpa baba, bàdì nwela meeji ne nudi bapete Nyumà Mwîmpè *panûdì* nwîtabuuja apu?

Yéyè ne: “Nwàkapeta Nyumà Mwîmpè *kacya* nwîtabuuja anyì?”

Muntu kampànda kwamba ne: “Aci kacìvwa cifùnda amu to.”

²⁶¹ Ndi ngeela aci kadyòmbò. Ndi ne nkudimwinu wà cyena Ngelika mujaadika mwab’ewu mene’s, ne cyena Ebèlu, kàbìdì. Bible ùdi wàmба mu cyena Ngelika, ne byônsò bibidì, cyena Ebèlu, ne kàbìdì mu ci-Alàmàyìkà. Mu byôbì byônsò bìsàtù abi, ndi naabi mwab’ewu mene, mbâmbe ne: “Nwakapeta Nyumà Mwîmpè *kacya* nwîtabuuja anyì?” Neyà bushuwà. “Nwakapeta Nyumà Mwîmpè *kacya* nwîtabuuja anyì?”

²⁶² Mpindyewu, yéyè ne: “Katwèna bamanyeku ne Nyumà Mwîmpè útukù to.”

Ki yéyè ne: “Nwâkabàtijiibwa mu dibatiiza kaayi?”

²⁶³ Bôbò ne: “Twêtù tukaadi bamane kubatiijiibwa kùdì muntu wâkabàtiiiza Mukalenge Yesù Kilistò awu. Twêtù tudi babàtiijiibwe mu dibatiiza dyà Yone,” mu ciinà cìmwècìmwè cyà mâyì aci, pàmwâpa, “muntu umweumwe awu.”

²⁶⁴ Pôlò wàkamba ne: “Aci kacyàkukùmbanakù to. Wàkabatiiza ànu bwà kanyinganyinga cyanàànà, kacìvwa bwà dilekelediibwa dyà mpèkaatù nànsha.”

²⁶⁵ Mpindyewu, bàmwè bàà ku nwêñù ba-Unitaires bàdì balwa mwab’awu ne—ne babatiize nàñku, bibì. Nudi nubatiiza nàñku, bwà lupandu. Mâyì kaëna asungila muntu to; m’Mashi, kanyinganyinga. Kí mmu dibatiiza bwà difùkùludiibwa to. To, mukalenge. Difùkùludiibwa dilwalwa ku Nyumà. Dibatiiza dìdi—didi ncyenzedi cyà patòòke cyà mudimu wà difùkùludiibwa udi wenzeka munda. Nwamònú anyì? Èyo. Mònaayi.

²⁶⁶ Yéyè ne: “Nwakapeta Nyumà Mwîmpè kacya nwîtabuuja anyì?” Bôbò ne . . .

Yéyè ne: “Katwèna bamanye ne Nyumà Mwîmpè ùtukù to.”

Yéyè kwamba ne: “Nwênu nwâkabâtijiibwa bishi?”

Bwôbò ne: “Twêtù tudi babâtijiibwe mu Yone.”

²⁶⁷ Wàkamba ne: “Bulelèlà Yone wàkabâtiiiza bwà kanyinganyinga, bwà kanyinganyinga, wàmba ne ‘bivva bikengela bwà nwênu kuMwitabuuja Yéyè,’ Mwânà wa mùkòòkò awu, Mulàmbu ùvwa ne cyà kulwa, Mukalenge Yesù Kilistò.” Nènku pààkumvwabo cyôcì eci, bààkabatijiibwa cyàkàbìdì mu Dînà dyà Yesù Kilistò. Ki Pôlò kubâtentekelayé byanza ne kupetabò Nyumà Mwîmpè, ne kwakulabò mu myakulu ne kwambabò ciprófetà.

²⁶⁸ Ngambilaayaaku aci ne kî m’Mufündu to, ne nundeeje mwaba kampàndu mukwàbò, ùkààtùku muntu kanà yônsò ewu mubâtijiibwe mûngà mishindù mu Dipungila Dipyadipyà pa kuumusha mu Dînà dyà Mukalenge Yesù Kilistò. Ndeejaayi.

²⁶⁹ Munsantu Agàbò ne bààbúngi, kùvwa bakwàbò, bààkabâtijiibwa too ne ku cikondo cyà—cyà Nsangilu wa Nicée, ne yônsò wa kùdibo wàkabâtijiibwa mu Dînà dyà Yesù Kilistò. Ba-missionnaires bààkabundulula madimi à bwambi ne Dînà dyà Yesù Kilistò.

²⁷⁰ Kàdi pààkalwa Nsangilu wa Nicée, byàkakèngela biìkale ne nzambì yisàtù. Kuumushabò Pôlò . . . anyì kuumushabò Jupiter, kàdi kwalujabò Pôlò pa kaaba kèndè aku. Kuumushabò Venus, ne kutèekabò Mariyà pa kaaba kèndè aku’s. Bavwa ne nzambì yà mishindù yônsò, bansantu bàà mishindù yônsò ne bikwàbò byônsò, ne kwenza dibatiiza dyà busatu ne kudidiìsha beena Mishòonyì. Ne bacìdi ànu batungunuka ne kucisùkumina.

²⁷¹ Kàdi Makénkè à dilòòlò àfikì mpindyewu. Mupròfetà wàkamba ne: “Nekwikalè Bukénkè ku ibaamulòòlò.”

Nekwikalè—nekwikalè ibaamulòòlò,	Bukénkè	ku
Kajila kàà ku Butumbi nenùkàpetè bushùwà;		
Mu njila wa mâyì, ki Bukénkè leelù ewu,		
Bajiika mu Dînà dyà mushinga dyà Yesù.		
Bânà ne bakolè, nyìngàlalaayi ku mpèkaatù yènù yônsò,		
Nyumà Mwîmpè neàbwelè bushùwà;		
Makénkè à dilòòlò àfikì,		
Mbulelèlà ne Nzambì ne Kilistò bâdi Umwe.		

²⁷² Nudi nuCìtabuuja anyì? Peetèlo wàkamba, mu Ditùkù dyà Mpenta ne: “Eci cìmanyiibwè, kunùdì nwênu, nzùbu wa Izàlèlèlà, ne Nzambì mmwenze Yesù umwèumwè ewu, Unùdì bapoopèle pa nkùruse ewu, byônsò bibidì Mukalenge ne Kilistò;” mvensa wa 16 wa nshapità mwi2. Èyowà. “Nzambì mmwenze Yesù

umwèumwe ewu, Unùdì bapoopèlè pa nkùruse ewu, byônsò bìbìdì Mukalenge ne Kilstò. Nzùbu mujimà wa Izàlèèlè amanye, ne ditwishiibwa dyônsò.”

²⁷³ Mvwa nyikila ne mwena Yuda kampànda ànu àbìdì àdì pansi aa, mu Nzùbu wa Davìdì emu, kwambaye ne: “Nwêñù bantu bàà Bisàmbà byà bendè kanwèna mwà kukosolola Nzambi mu bitùpà bìsàtu kàdi kuMupa mwena Yuda to. Twêtù tudi bamanye bîmpè bipite abi.”

²⁷⁴ Mêmè ne: “Cìdi ànu aci, Laabì. Katwèna tukosa Nzambi mu bitùpà bìsàtu to.” Mêmè ne: “Utu witabuuja baprófetà anyì?”

Yéyè ne: “Cyà bushùwà’s.”

Mêmè ne: “Udi witabuuja Yeshààyi 9:6 anyi?”

Yéyè ne: “Èyowà.”

Mêmè ne: “Uvwa muprófetà wàmaba awu nganyì?”

“Maasiyà.”

Mêmè ne: “Mbulelà kaayi bwìkalà Maasiyà naabu ne Nzambi?”

Yéyè ne: “Yéyè neìkalè Nzambi.”

Mêmè ne: “Aci ncyà bushùwà.” Amen.

Nwamònú’s, s’ki bwalu abu’s. Nwamònú’s, kanwèna mwà kuMukòsa mu bitùpà bìsàtu to.

²⁷⁵ Nwêñù ba-missionnaires bâdi mwaba ewu aba... Umwe wa kudibo ùyaaya kùdì beena Yuda, ngeela meeji, muntu udi musòmbe apa ewu. Kudidikingu bwà kupèèsha mwena Yuda nànsha umwe “Taatù, Mwânà, ne Nyumà Mwímpè to”. Neàkwàmbilè ne lukasa lwônsò ne, mmumanye kùdici cifumina ne: “Nsangilu wa Nicee.” Yéyè kààkutèèlejakù aci to. Kàdi mufikishe ku dimòna mwaba ùvwa Nzambi muvwijìlbwe mubidi, ne Yéyè ke Nzambi umwèpelè udiku. Nzambi, muvwijìlbwe mubidi mu mmwenekelu wa buntu ne musòmbèlè munkaci mwètù, bwà kutujidila; kuumusha, bwà Yéyè mwine Wàmòna mwà kulwa mu mmwenekelu wa Nyumà Mwímpè. Nzambi, Taatù, Nyumà Mwímpè, m’Mupérsona umwèumwè awu.

²⁷⁶ Bible mmwambe mu—mu dilondangana dyà bankambwa bàà Yesù Kilstò, mu nshapità wa 1 wa Maatààyi, Mmwambe ne: “Abraham wàkalela Izàkà. Izàkà wàkalela Yakòbò.” Wenda utungunuka ànu nànku, wamba, ne pashiìshe mu... Nganjìbi kucibala tûng, nènku dìbà adi mpindyewu nénushiishè kumanya cîndi munkaci mwà kwakula. Maatààyi, nshapità wa 1. Nènku netwikalè... Mpindyewu tubangilaayi ku mvensa wa 18.

Mpindyewu dilediibwa dyà Yesù Kilistò dyàkenzeka mùshindù ewu: Pàvvà... mamw'Endè Mariyà mubangila kùdi Yòzeffù, kumpàla kwà kushààlabo pàmwè, wàkasanganyiibwa ne difù...

²⁷⁷ ““Nzambi Taatù anyi”? Aci cìdi cìbàdiibwa mùshindù awu anyi? [Disangisha dìdi dyàmba ne: “To.”—Muf.] Musangana ne Difù dyà Nganyì? [“Nyumà Mwímpè.”] Kùdì...[Katùpà kàà mukàbà wà mèyì munda mutupu.] S’mvwa ngeela meeji ne Nzambì Taatù ki Tatw’Èndè? Dìbà adi, Nzambì, Taatù ne Nyumà Mwímpè, bàdi Nyumà umweumwe awu, anyi Ùvwa ne Baataatù bàbidì.

Pashìishe Yòzefù bàyendè, bu mìvvwàye muntu mujaalàme, . . . kabiyì ku budìswile bwà kumufwìshaye bundu, ùvwa wela meeji . . . kumubengaye mu musokoko.

Kàdi pàcìvwàye wèlangana meeji pa maalu aa, mònayi ne, mwanjèlò wa Mukalenge wàkamumwènekela mu cilòötà, wàmba ne: Yòzefù, wèwè mwânà wa Davìd, kuciinyi nànsha . . . angatà Màriyà mukàjèebè, bwalu udi mwimita munda mwèndè awu ngwa kùdì . . .

²⁷⁸ ““Nzambì Taatù anyi”? Huh? [Disangisha dìdi dyàmba ne: “To. ‘Nyumà Mwímpè.’”—Muf.] “Nyumà Mwímpè.” Dìbà adi Nganyì uvwa Tatw’Èndè wa Yesù Kilistò? [“Nyumà Mwímpè.”] Nyumà Mwímpè. Ncinyì cìdi munda mwèbè? [“Nyumà Mwímpè.”] Èè, aci’s n’Nzambì, Taatù awu, kàbìdì’s. Ki mmwômò anyi? Bushùwà’s.

Nènku yéyè neàlelè mwânà wa balùme, nènku wêwè neùmwinyike dînà dyèndè YESÙ: . . .

²⁷⁹ Nzambì Taatù nyéyè ewu, Nzambì Nyumà Mwímpè nyéyè ewu, ne ki Nzambì Mwânà nyéyè ewu, nwamònus, ki Nzambì yìsatù nyòyi ayi’s. Bible kéné wàmba nànkü to. Bikèngela bàbìdì aba biikale bàà mwomùmwè, cyanàànà Yéyè uvwa ne baataatù bàbìdì. Nwamònus anyi? Yéyè kéné mwà kwikala ne baataatù bàbìdì to. Aci kaayi nudi bamanye.

Mpindyewu, yéyè neàlelè mwânà wa balùme, nènku bôbò nebàmwinyike dînà ne YESÙ: bwalu yéyè ki wàsùngila cisàmbà cyéndè ku mpekaatù yàbò.

Mpindyewu byônsò ebi byàkenzeka, bwà kumònabi mwà kuuja civwà cyakula kùdì Mukalenge ku mupròfetà, wàmba ne:

. . . virgo neimite, ne neàlelè mwânà wa balùme, ne nebàmwinyike dînà ne Emanùwèlè, cìdì ku dyumvwija cyàmبا ne, Nzambì neetù.

²⁸⁰ Ki nshapità wa 1 wa Maatààyì nyéyè awu’s.

²⁸¹ Maatààyì 28:19, mùdì Yesù mwambe ne: “Ndaayi, nubatiize mu Dînà dyà Taatù, Mwânà, ne Nyumà Mwímpè” Dînà dyà Taatù, Mwânà, Nyumà Mwímpè ncinyì? Yesù Kilistò, mu bushùwà bwà bwalu’s.

²⁸² Udi ubala bwalu bulonda bwà dinanga, bwàmba ne: “John ne Marie bavwa ne nsòmbelu wa disànkà pashiishe.” John ne Marie mbanganyì? Alùkila ku mbangilu wa bwalu-bulonda abu, bwà ucijandule’s.

²⁸³ Kôkù kakùyi cintu bu nànku to, kakùyi dînà dyà: “Taatù, Mwânà, anyì Nyumà Mwîmpè,” dîbà adi Nganyì, Dînà adi ndyà Nganyì? Alùkila, ku mbangilu wa bwalu-bulonda abu, bwà umònè ne Mwena bwalu bùvvwàbò bààkula Nganyi.

²⁸⁴ Peetêlo, mu Ditùkù dyà Mpenta, wàkamba ne: “Nyingàlalaayi, muntu ne muntu wa kunùdì, nubatijiibwe mu Dînà dyà ‘Yesù Kilistò’ bwà dilekelediibwa dyà mpèkaatù.” Ùvwa ne dibuulula.

Yone uvwa ne dibuulula.

²⁸⁵ Yesù *uvwa* Dibuulula adi, Yéyè wàkaDipatula mwab’ewu mene mu Mifùndu ne: “Mêmè ki Ewu wàkadiku, udiku, ne wâlwa, wa Bukolè bwônsò.” Yoyoyò! Èyo.

²⁸⁶ Mpindyewu, twàngatàayi mvensa wa 7, ne lukasalukasa mpindyewu, kumpàla kwà twêtù kupatuka, ne lukasa ne mwètù mwônsò. Wa Bukolè bwônsò.

...*bukòòkes-... butùmbi ne bukòòkeshi bwà kashidi ne kashidi.* Amen.

Ne...mmutuwije bamfùmù ne baakwidi bwà Nzambì... Tatwèndè; ne kùdiye kwikale butùmbi ne bukòòkeshi bwà kashidi ne kashidi. Amen.

²⁸⁷ Nudi numòna dibuulula adi mwaba awu, mùdìDi dibuulùdùibwe anyì? Mûshindù ùdi Nzambì...Bantu bàdikoonya mu mitù ne bàdítuula nsukì, ne bikwàbò, bâteeta bwà kujandula cidi “Taatù, Mwânà, Nyumà Mwîmpè” ne ncinyi, benza yisàtu, mu umwe.

Kwikadi wàdítùùla nsuki ne wàdikoonya mu mutù to. Banduluka cyanàànà. Dibuulula’s dìdi difumina mu Dyulu. Nènku aci’s ncÿà bushùwà. Yéyè neàbuulule ne, kí “n’Taatù, Mwânà, ne Nyumà Mwîmpè to.” Mmidimu yisàtu yìdì Nzambì musòmbèlemu.

²⁸⁸ Yéyè uvwa mu mudimu wà, “Nyumà,” ku Yéyè nkààyende, bwalu muntu wetù ewu awu ùdi wenza bu udi ùdipwekesha milongo, pashiishe Yéyè kuDyenzela mubidi, kusòmbelamù, bwà kupatula Mashi Èndè Yéyè sungasunga; kabiyi ku disangila dyà mulùme ne mukàjì to, bu mwàkadibi mu budimi bwà Edènà amu to, kàdi kupatula mubidi wa mufuka. Nènku ku mubidi mulela kudi virgo awu, Yéyè wàkafila Mashi àwwa matujidile ne matùsùlule ku bupidyà bwètù, bwà kumwitabuua. Dîbà adi, tudi twenza nànku, tudi tuMupeta mu mwoyi wètù, aci’s n’Nzambì munda mwètù; Nzambì: Taatù, Mwânà, ne Nyumà Mwîmpè. Nwamònu anyì? Ànu bu Mupròfetà, Mwakwidi, ne Mfùmù, ki cintu cìmwècimwè aci. Èyo.

²⁸⁹ Mpindyewu, mvensa wa 7, eci ndimanyisha. Dimanyisha dìdi ne:

Mònaayi, yéyè ùdi ùlwa ne matutu; ne dísù dyônsò nedimumònè, . . . aba kàbìdì bâàkamutwà difumà abu: ne bifuku byônsò byà pa buloba nebídile mwadi bwà bwalu bwèndè.

²⁹⁰ Kaa! Tudi ne dîbà bûngì kaayi? Abi's mbilenga be mwab'awu. Nudiku mwà kulama tukwàbò tusunsa makumi àsàt- . . . makumi àbìdì anyì? [Disangisha dìdi dyàmba ne: "Èyowà."—Muf.] Nudiku bafwànyìne kwenza nânku anyì? ["Amen."] Èyo. Mpindyewu, dîbà adi, mààlabà . . . Dilòòlò edi, netûteetè bwà kwangatakù bikwàbò byà ku *Cisanga Cyà Paatémò* abi, dilòòlò edi. Leelù ewu, netùjikije ne mamanyisha.

²⁹¹ Kaa! Nudi badyúmvwè bîmpè anyì? [Disangisha dìdi dyàmba ne: "Amen."—Muf.] Nudi banange Bible wa kale ewu anyì? ["Amen."] N'Dibuulula. Ncinyì, ncinyì ciine aci? Nzambì utùùluka, mu Mukàndà ewu, ne wumusha cibwikilu aci, wàmba ne: "S'ki Yéyè awu: Mupròfetà, Mwakwidi, Mfùmù; Taatù, Mwânà, Nyumà Mwímpè; Èwu wàkadiku, udiku, ne wâlwa awu. Bintu byônsò ebi, Yéyè ùdi Nzambì."

²⁹² Mpindyewu, twânjì tuumushaayi cibwikilu aci, ànu bwà tusunsa tukesè cyanàànà mpindyewu, bu Mukalenge mwà kutùkwacisha, kuumusha cibwikilu aci ku mêsù kwètù. Ne kupeta . . .

Mònaayi, yéyè ùdi ùlwa ne matutu; . . .

²⁹³ Mpindyewu, Yéyè ulwalwa bishi? "Ne matutu." Ditutu dyà mùshindù kaayi? Matutu à butùmbi. Ki ndimwè dyà ku mavuba mafìkuluke à citwàla-mvula awu, divuba dyà mvula to, kàdi mmatutu à butùmbi.

²⁹⁴ Nêñùmòne ne nditutu dyà mùshindù kaayi muvwa Ye muDijìngìle pààkamònà Peetèlo ne bakwàbò abu cìkèènà-kumònà Cyèndè pa Mukùnà wà Dikudimuka dyà mpala, ditutu dyàkaMubwikila. Bilùlù Byèndè kubàlakanabi. Uvwa mujingila kùdì ditutu, bukolè bwà Nzambì.

²⁹⁵ Kaa, tudi tukafika ku cyôcì aci, apa mu bikondo byà èkèleziyà ebi's. Ndi nnwambila ne, bìdi ànu—bìdi ànu bingoosha ku muntu wànyì wa munda awu, pândì ngeelaku meeji's. Civwa dilwa Dyèndè . . . Ndi mmòna ditùkù ditùdimu ne mwoyi edi, mùdì kamùyi mushààle kantu nànsha kàmwè, ditekemena nànsha dyà kânà, pa kuumusha Dilwa Dyèndè.

²⁹⁶ Mpindyewu netùfike ku cyôcì eci ne lukasa lwônsò. Mpindyewu vùlukààyi.

. . . dísù dyônsò nedimumònè, . . .

²⁹⁷ Mpindyewu, nènku aci kacìvwa Dyambwibwa to, mmwômò anyì? [Disangisha dìdi dyàmba ne: "To."—Muf.] Nwamònù anyì?

Kacìvwa Dyambwibwa to. Kacìvwa Dyambwibwa to. Civwa Yè wakwila aci cinyì? Dilwa dyà cyàkàbìdì.

... ne aba kàbìdì bâàkamutwa difùmà abu: ne bifuku byônsò byà pa buloba nêbìdile mwadi bwà bwalu bwèndè.

²⁹⁸ Mpindyewu netwàlukile bwà kwangata bùmwè bwalu-bulonda. Twàlukilààyi mu Zekààyì, bwà twàngate nshapità wa 12 wa Zekààyì. Zekààyì's. Èyo.

²⁹⁹ “Nènku Mukalenge ùvvà ûsàkidila ku èkèleeyiyà ku ditùkù ne ku ditùkù aba bavwà mwà kusÙngidiibwa abu.” Mûshindù mwine wutùdì ne kusàkidila bwà dibuulula dîmpè dyà Yesù Kilistò's wè! Kwêñàku ne disànkà bwà bwalu Bwèndè anyì? Mpindyewu, netwèlè eci mu mmwenekelu wa mukàndà ànu ne lukasa ne mwètù mwônsò, bwà bantu, nènku dîbà adi nudi mwà kucipeta, bwà kucibala mu cinyàànya cyà mu cibambalu cyènù amu ne bikwàbò, kàdi kucilonga, wêwè mwine. Èyo.

³⁰⁰ Zekààyì, Zekààyì awu, nshapità wa 12 mpindyewu wa Zekààyì. Nènku tudi baswè, kwangata eci munkaci mwà disambila mpindyewu. Nènku ndi muswè kwangata eci bwà butùmbi bwà Nzambì. Mpindyewu, Zekààyì 12, tubangilààyi ku mvensa wa 9. Teelejààyaaku ne ntéma mpindyewu. Üdi wakula bwà Dilwa. Zekààyì 12, nènku netùbangile ku mvensa wa 9, mu mvensa wa 9.

Nènku nebyènzeke ne . . .

Zekààyì, wàmба cipròfetà, bidimu nkàmà yinaayi ne makumi mwandamukùlù ne mwandamutekète kumpàlà kwa dilwa dyà Kilistò.

Nènku nebyènzeke mu ditùkù adi ne, nénkèbe mwà kubutula ônsò . . . matùnga àlwà kulwisha Yélusàlèmà.
(Anji elààyibi meeji pa bwalu abu's.)

Nènku mêmè nêngììcikijè pa nzùbu wa Davìdì, ne pa bantu bâdì basòmbèlé mu Yélusàlèmà, nyumà wa ngâsà ne wa misèngèleelu, ne bôbò nebâtàngijè mêsù kündì mêmè wàkatwabò difùmà, . . .

³⁰¹ Mpindyewu, ndîbà kaayi dyàlukila Èvànjeelìyò kùdì beena Yuda? Pìkala ditùkù dyà bâà Bisàmbà byà bendè dijike, Èvànjeelìyò úkaadi pabwípì, bwà kuya kùdì beena Yuda. Kaa, mvwa mufwànyìne, bu mêmè mwà kudyanjila kunwambila kaacintu kampànda kàdi kàmba kwenzeka ànu mwab'ewu mene, nwamònu's, mu ditùkù edi mene. Nudi numònà anyì? Cidi pabwípì ne kwenzeka. Tudi bacyúmvwè mu Cikondo cyà Èkèleeyiyà. Nènku cintu cinène eci cidi pabwípì ne kwenzeka, necìkwobèkè too ne ku Bwàkabuulwibwà 11 ne cyàngata bapròfetà bâbìdì abu, Eliyà ne Môsà bâàlukila cyàkàbìdì bwà beena Yuda. Tudi badilongòlòle bwà cyôcì aci. Byônsò mbitéèka mu bulongame, mbimana kulongolola. Mukenji wa bâà Bisàmbà

byà bendè ewu, ànu mùvwà beena Yuda bawùtwadila bàà Bisàmbà byà bendè amu, bàà Bisàmbà byà bendè nebàwälùje cyàkàbìdì kùdì beena Yuda. Nènku Dyambwibwa nedìlwe.

³⁰² Mpindyewu vùlkààyi ne, eci cilwalwà eci, paanyimà pàà Dikenga dinène... Èkèleeziyà kéné ùpicila mu Dikenga dinène to. Tudi bamanye aci. Bible ngudi mwambe nàndu. Nwamònou anyì? Èyo.

³⁰³ Mpindyewu, Yéyè neàpòngololè pa nzùbu wa Izàlèèlè, (cinyì?) Nyumà Mwímpè umwèumwè awu, nwamònou's, paanyimà pàà Èkèleeziyà wa bàà Bisàmbà byà bendè mumane kuya.

...nènku bôbò kutangija mésù kündì mêmè wakatùbulabò ne difùmà awu, ne bôbò nebàmudilè, mùdì muntu udi udila mwanèndè umwèpelè wa balume, ne nebiìkalè mu kanyinganyinga bwà bwalu bwèndè, mùdì muntu mu kanyinganyinga bwà mwanààbutè wendè.

Nènku mu ditùkù adi nekwìkalè... madilu manène mu Yélusàlémà, ... ne madilu... mu—mu cibandabanda cyà Meegidòònà.

Ne—ne ditùnga nedìdile, dìkù ne dìkù dyônsò pa bwàdì; dìkù dyà nzùbu wa Davìdì pa bwàdì, ne... dìkù dyà nzùbu wa Natànà pa bwàdì, ne umwe ne umwe wa ku nzùbu pa bwèndè; (pààmònabo, cyenzeka aci, cyenzeka pààlwàYe mu matutu à butùmbi, ku dimwènéka Dyèndè diibidì.)

³⁰⁴ Nènku piìkala beena Yuda bààka Mutwà difùmà abu... Nudi bamanye's, Mufundi mukwàbò ùdi wàmba ne nebàMukonke, mwaba ûvwà Ye mupetèle mputà eyi's.

Yéyè ne: "Mu nzùbu wa mulunda Wanyì."

³⁰⁵ Nènku kacyàkwikala ànu cikondo cyà madilu bwà beena Yuda nkàyaabò bààkaMubenga, bu Maasiyà abu to, kàdi necììkalè cikondo cyà madilu bwà bàà Bisàmbà byà bendè biìkala bashààle paanyimà apa abu, bàdì biitâbe... bàdì baMubènge bu Maasiyà wabò wa ditùkù edi abu. Nebiìkalè munkaci mwà kudila mwadi ne kudila. Virgo mukùtákàne neïkalè munkaci mwà kudila mwadi. Ki èkèleeziyà wâkabèngà kwikala ne Maanyì mu bukènkè bwèndè awu. Kuvwa bavirgo dikumi bàkapatuka, bônsò bantu bímpè, kàdi bataañu bà ku bôwò bavwa ne Maanyì mu myêndù yàbò. Bakwàbò bataanu bàvwa bantu bímpè, bantu bímpè, kàdi bapangile bwà kwangata Maanyì mu myêndù yàbò. "Nènku bàkiipaciibwa mu mídimà yà pambelu mwikala myadi, ditwà dyà mikemu, ne disumakaja dyà ménù."

³⁰⁶ S’ki cyôcì eci ne: “Bôbò nebììkalè mu didila dyà mwadi.” Bible mmwambe apa ne: “Bôbò nebììkalè mu didila dyà mwadi, ne myoyi micibùlùke be, mu mùshindù wà ne nànsha . . .”

³⁰⁷ Mwab’ewu, nênnùpèèshèku mukwàbò, Genèsè 45, panwìkalà bàswè kufika ku cyôcì aci. Tuyaayiku ànu bwà katancì kakesè cyanàànà bwà kubala kàbìdì cyôcì aci mu Genèsè, kùdì . . . ngeela meeji, ku nshapità wa 45 wa Genèsè. Ndi muswè kwangata eci kaaba aka, Yòzefù ùdìmanyisha kùdì bàà-bàà kwàbò. Nènku netùpetè eci, ànu kuleeja bi—bimfwìnyì byà cílikalà mwà kwenzeka mu ditùkù adi aci, dîbà adi netùciséwíkè pàmwè.

Dîbà adi Yòzefù kàvvwa mwà kudìkànda yéyè mwine kumpàla kwà . . . aba bàvvà biimane nendè abu to; ne kuboobolayè mwadi, Enzaayi bwà muntu yônsò aye . . . kule naanyi.

³⁰⁸ Mpindyewu vùlukààyi ne, Yòzefù, ùdìmanyisha, kwelaye lubila ne: “Muntu yônsò ùmuke kumpàla kwànyì.”

Nènku kakwàkashààlakù muntu nànsha umwe mwimàne pàmwè nendè to, pàvvà Yòzefù ùdìmanyisha kùdì bânà bààbò apu.

Ki kwelayè cibòòbò wa mwadi, ne beena Ejiipitu ne bàà mu nzùbu wa Pâlò kumutèèlejabo. (Ùvwa ne cyà kwikala mwele mbilà mikolè.)

Ki Yòzefù kwambilaye bânà bààbò ne: Mêmè ndi Yòzefù; taatù wanyi ùcidi ne mwoyi anyì? Kàdi bânà bààbò kabààkapeta mùshindù wa kumwandamuna to; bwalu bavva batàcishìbwé mu bwikadi bwèndè.

Ki Yòzefù kwambilaye bânà bààbò ne: Seemenaayi pabwípi . . . naanyi, ndi nnùsèngeléela. Ki kuseemenabo pabwípi. Ki yéyè ne: Mêmè ndi Yòzefù mwanèènù, udi . . . unùvvwà—unùvvwà basùmbishe mu Ejiipitu.

Ki bwà cinyi mpindyewu kanwikadi nwàbungamijibwa to, anyì kudìkwàcila ciiji, bwà ne nuvwa bansùmbishe bwà kuluwa muneemu nànsha, bwalu Nzambì ngwàkantuma kumpàla kwènù bwà kunupàndisha. (Kaa, bilenga kaayipu’s we!)

Bwalu mu bidimu bìbìdì ebi kùdì . . . ciyòòle cìdi mu ditùnga, ne . . . mwikala, kakwàkwikala ní mmwepu ní dinowa nànsha.

Nènku Nzambì ngwàkantuma kumpàla kwènù bwà kusùngidila ndelanganyì mu buloba, ne bwà kupandisha myoyi yènù ku dipikudiibwa dinène.

³⁰⁹ Nganjìbi kwangata mpindyewu ne kucìpalakaja ne Zekààyi, wa 12, ànu bwà katancì cyanàànà. Mpindyewu, tudi bamanye aci, mu cifwànyìkijilu. Nwènù balongeshe bifwànyìkijilu, dîbà

adi nenùcìpetè misangu yônsò ànu mu cyôcì, ngeela meeji, mu—mu cifwànyìkijilu.

³¹⁰ Mpindyewu, Yòzefù, pààkalediibwaye, ùvwà mukinyììbwé kùdì bânà bààbò. Ncyà bushuwà anyì? Mpindyewu ndi muswè kunuleeja ne, Yòzefù udi uléeja Èkèleeziyà mûle tente ne Nyumà. Yòzefù ùvwa mukinyììbwé kùdì bânà bààbò. Bwà cinyì? Bwalu yêyè ùvwa wa nyumà. Yòzefù kàvwa ne cìvwàye mwà kwenza to bwalu ùvwa mwà kumònà cikèènà-kumònà. Kàvwa ne cìvwàye mwà kwenza to bwalu ùvwa uloota bilòòta, nwamònù's, ne ùvwa mwà kuumvwija bilòòta. Yêyè, ke cìvwà munda mwèndè ncyòcì aci. Kàvwa mwà kuleeja cintu cikwàbò nànsha cìmwè cìvwà kaciyi mu yêyè to. Èè, ki dîbà adi, bânà bààbò kumukinabo, kakuyi bwalu to. Kàdi tatwèndè ùvwa mumunange, bwalu tatwèndè ùvwa mupròfetà.

³¹¹ Nudi numònà muvwabi ne Yesù anyì? Nzambì ùvwa munange Mwân'Èndè. Kàdi bânà bààbò, Bafaalèsà ne Basadoka, bààkaMukina, bwalu Yêyè ùvwa mwà kwondopa babèdì, ne kudyanjila kwamba maalu, ne kumònà bìkèènà-kumònà, kuumvwija. Nudi bumvwe cíndì muswè kwamba aci anyì? "BààkaMukina, kakuyi bwalu to."

³¹² Kàdi cyàkenzelàbo Yòzefù ncinyì? Bààkadyambidila ne mmufwè, ne kumwelabò mu mukidi. Kwàngatabo cinkutu cyà mashi, cyà meekala mwandamutekète, cìvwà tatwèndè . . .

³¹³ Kùdi ànu meekala mwandamutekète mu mwanzankòngòlò. Ne mwanzankòngòlò, tudi bamanye ne ncinyì, bwà ne netùkafikekù pashìishe ndambu, ngeela meeji, dildòòlò edi. Mwanzankòngòlò kumutù Kwèndè eku, Yesù, mwaba udi ne: "Bikèngela Yêyè ikale ne mmwenekelu wa dibwe dyà jaspe ne sardoine, ne mwanzankòngòlò." Mwanzankòngòlò ncipungidi.

³¹⁴ Ne aci cìvwa cipungidi cyà Nzambì pa Yòzefù. Ki pashìishe kulaababò mashi pa cinkutu cyèndè, ne kwalukilabo naaci kùdì taatù. Nènku bààkacinkila ne yêyè ùvwa mufwè. Nènku . . .

³¹⁵ Kàdi wàkabiishiibwa kupatudiibwa mu mùkidi amu ne kutèèkibwa mu—mu . . . kupanyishiibwa kùdì Pâlò, muntu kampànda mu Ejiipitu amu's, ke ka—kalààlà kàà masàalaayi kampànda kumulama. Nènku pààkenzabo nànku, yêyè, cintu cibì kumufuikilaci, ne kumwelabò mu bùlokò. Nènku mwômò amu kwambaye cipròfetà, ne kwambila bantu bàbìdì kùvwà umwe mwà kuya ne kùvwà mukwàbò ne cyà kuya; mufidi wa mvinyo ne mu—ne mufidi wa mâmpà, bilondeshile bilòòtà byàbò.

³¹⁶ Ki pashìishe kubandishiibwaye kubangila ànu mwaba awu, too ne ku dyàbalùme dyà Pâlò. Ne muntu nânsha umwe kàvvaku mwà kulenga Pâlò to, ànu mupicile kùdì Yòzefù. [Katùpà kàà mukàbà wà mèyì munda mutupu—Muf.]

³¹⁷ Cinyì eci. Mpindyewu, kùdì . . . dîbà adi pààkasùmbishiibwà Yòzefù mu beena Ejiipitu. Nènku, tàngilààyì, cintu cyônsò

cyàkenzaye cìvwa cimfwànyì cyà Kilistò. Tàngilààyì mufidi wa mvinyo ewu ne mufidi wa mâmpà ewu muntwamu, ne bùbìdì bwàbò bàvwa ne bilòòta. Nènku Yesù, pàvvà Ye mu nzùbu Wendè wa lukanu. Vùlukààyi ne, Yòzefù uvwa mu bùlokò. Nènku pàvwa Yesù mu Bwèndè bùlokò, (mùshindù kaayi?) mupoopela ku nkùruse, kwàkasùngidiibwa muntu umwèpelè ne umwe kujiminaye. Yòzefù, pàvvàye mu bwèndè buloko, umwe wàkapànda, umwe wàkajìmina.

³¹⁸ Kàdi mònaayi. Pashiìshe paanyimà pàà Yesù mumane kuumushiiibwa ku nkùruse, Yéyè wàkazànjikiibwa mu Dyulu, ne mmusòmbe ku dyàbalùme dyà Nyumà munène, Yèhowàh. “Muntu nànscha umwe kêna mwà kulwa kùdi Nzambì kàyi mùpicile kûNdì nànscha.” Kakwèna byà *Mwoyi Mariyà* to, kakwèna byà ne wa dyàkalenga *kampànda* anyì wa dyàkalenga *kansanga* to. Kàdi, ku Yesù Kilistò: “Mutwangaji umwèpelè udiku pankaci pàà Nzambì ne bantu,” mubidi wà mushinga mukolè ùvwa Nzambì musòmbèlemù, munkaci mwètù awu, wàkangata Dínà dyà Nzambì. Ki Nzambì kwangata dínà dyà buntu. Nzambì kwangata . . .

³¹⁹ Tàngilààyì kuneeku. Ku cibangidilu, pàvvà Adàmà . . . Ncyêna ànu mwà kuumuka ku aci to. Mbimweneke ànu bu ne muntu kampànda kêna ùCyùmvwa to, mwaba kampànda. Tàngilààyì. Ku cibangidilu . . . Lekelaayi nnùleeje cyàkàbìdì cintu kampànda. Nyumà Mwímpè ùdi undimwija bwà mêmè kwenza cyôcì eci. Ndi nshiyaku cyena-bwalu cyànyì bwà katancì kakesè. Pààkafika luumu lwà kumpàla mu Butùmbi, bwà ne mwânà wa balùme ùvwa mujimine, Adàmà, Nzambì wàkatuma Mwanjèlo anyì? Wàkatùma mwânà wa balùme anyì? Wàkatùma muntu mukwàbò anyì? Wàkalwa, Yéyè mwine, bwà kupikula mwân’Èndè wa balùme mujimine awu. Àlèluuyàh! Nzambi kààkacyèyemeja kùdi muntu nànscha umwe to pa kuumusha Yéyè mwine. Nzambì wàkavwijiibwa mubidi ne wàkasòmbela munkaci mwètù, ne wàkapikula muntu, Yéyè mwine. Bidi ne . . . “Tudi basùngidììbwé,” mùdì Bible mwambe, “ku Mashi à Nzambì.” Cyà cifwàka, Nzambì uvwa . . . Nzambì uvwa kàyi ufwu awu wàkavwijiibwa wa cifwàka, bwà kuumusha mpèkaatù, bwà kwikala Mwânà wa mùkòòkò, Yéyè mwine; bwà kubwela mu Butùmbi, mubwikila, ne Mashi Èndè Yéyè mwine kumpàla Kwèndè, dyàmwàmwa dyà cilàmbà cikudika.

³²⁰ Mpindyewu, ki Yòzefù, uyààya mu Ejiipitu wàwa’s. Nènku mwômò amu kuzanjikiibwaye kuumukila ku bùlokò bwèndè aku, too ne ku dyàbalùme dyà Pâlò, ne kuvwijijiibwaye mulami wa bintu byônsò. Nènku bintu byônsò kutantabì mu matükù à Yòzefù.

³²¹ Mpindyewu, pààlukilà Yesù, nànscha cipèèla ciine necìsasè bu cilòngo cyà rose. Yéyè m’Mwânà wa ditanta, cifwànyìkijilu cyà Yòzefù.

³²² Bààkateèka Yòzefù mu . . . Kalààlà kàà màsàlaayi awu uvwa nendè mwèndè mu nzùbu; byônsò bivwàye wènza, wàkatanta. Kumwelabo mu bùlokò, ne bùlokò bujimà kutantabù. Byônsò byàkenzabo, yéyè wàkatanta. Ne pààkabàndishiwbàye, mutàmbe kutùmbuka, wa Pálò, cìndondà cyà Pálò, bintu byônsò mu Ejiipitu kutantabi kumutù kwà ní ncinyì cyônsò pa buloba apa.

³²³ PààlukilàYe, nekwìkalè buloba bwà ditanta. Bipèèla byà kale nebìsamplè, ne nekwìkalè cyàkudyà myaba yônsò. Nènku tudi mwà kusòmbèla, muntu ne muntu, mwinshi mwà mucì wètù wà mfigì awu, ne kuseka ne kusànkà, ne kwikala ne mwoyi kashidi mu Bwikadi Bwèndè, pààpinganaYe bu Mfùmù.

³²⁴ Ùvwa Mwânaà wa muntu, Mupròfetà. Amen. Ùvwa Mwânaà wa muntu, Mulambu, Mwakwidi. Yéyè udi Mwânaà wa muntu, bu Mfùmù, Mwânaà wa Davìdì musòmbe pa nkwasà wa butùmbi wa Udi Mutàmbe bunène. Mwânaà wa muntu, Yéyè ùdi cish- . . . Nzambì mumwènèshìibwe bu Mwânaà wa muntu. Yéyè wàkatuuuluka ne kushààlaye muntu, bwà kuumusha mpèkaatù kùdì bàà pa buloba. Wàkashààla muntu, bu Mupròfetà. Wàkashààla muntu, bu Mwakwidi. Wàkashààla muntu, bu Mfùmù; Mfùmù wa mu Dyulu, Mfùmù wa bansantu, Mfùmù wa Cyendèleèlè; misangu yônsò ùvwa ànu Mfùmù, ke wíkala misangu yônsò ànu Mfùmù, Mfùmù wa Cyendèleèlè.

³²⁵ Mpindyewu mònaayi, pashìishe, Yòzefù. Kumpàla kwà Yòzefù kupatukaye, bìvwa bikèngela kwanjibu kwela mpungi, dyàmbedi. Ne bantu bàvwà beela mbila mikolè ne: “Twàiyi cinù pansi bwà Yòzefù.” Civwa muntu wenza nànsha ciikale cinyì, ní uvwa usumbisha cintu kampànda mu mùsèesù, pàvvà mpungi awu udila, ùvwa ùtwa cinù cyèndè pansi. Muntu ùkaavwa pabwípì ne kwolola cyanza bwà kwangata mfranga, kàdi ùvwa ùtwa cinù cyèndè pansi, Yòzefù ùvwa munkaci mwà kulwa. Kaa! Kùdì mwen- . . . mwen—mwen—mwenji wa bikasa ní ukaavwa wàmba kwenza cikasa cyèndè aci, kàdi ciikalaye mwà kwenza ncinyì? Bivwa bikèngela bwà kwimanyikaye. “Yòzefù nyéyè awu ùlwa.” Mpungi kudilaye.

³²⁶ Dìmwè dyà ku matùkù adi pansi àà, bintu byônsò, nànsha cikondo, nebiimane. “Pààdilà mpungi wa Nzambì awu, ne bafwè mu Kilistò nebabiiikè, ne dìndà dibwayika dyà Cyendèleèlè, dyà dibàlakana ne dilenga kumònà.” Byônsò nebitwe cinù pansi. “Cinù cyônsò necìtwé pansi, ne ludimi lwônsò nelùCijikulè.”

Bangaayi mpindyewu. “Mpèkaatù yà bàmwè bantu yìtu yìdyànjidila, yìmwè yìlonda.”

³²⁷ Kàdi mpindyewu mònaayi cyàkenzekà aci. Mùshindù mwine ùvvàci cyà butùmbi's wè! Dibà adi pàvvà Yòzefù . . . paanyimà pàà yéyè mumane kusela muntu wa Bisàmbà byà bendè ne mupete díkù, Efàlàyimà ne Maanàsè, bânà bëndè bàà balùme. Nukààvwaku bamònè ku ndekeelu anyì? Pàvvà

Yòzefù... Yakòbò kubanga kubènesha Efàlàyìmà ne Maanàsè. Mmwenze ànu ubanga kutenteka byanza byèndè anyì, kutèèkaye Efàlàyìmà ku dyàbalùme, Maanàsè ku dyàbakàjì, bwà ne cyanza cyà balùme aci cibèneshè mukulumpe. Kàdì mmwenze ànu ubanga kusambila, byanza byèndè kucyàmakanabi, nènku kupeeeshaye mwâna mukesè menemene awu dibènesha dyà cyanza cyà balùme pamutù pàà ewu uvwa usanganyiibwa ku dyàbalùme awu.

³²⁸ Ki Yòzefù kwamba ne: “Kabyèna nànkú to, Taatù.” Yéyè ne: “Wéwé’s udi mutèèke dibènesha pa Maanàsè pamutù pàà Efàlàyìmà.”

Ki yéyè ne: “Nzambì ngudi mucyàmàkaje cyanza cyànyì.”

³²⁹ Cinyì? Kuumukila ku beena Yuda, bakulumpe menemene abu, basungula bàà nzànzànzà bàà Nzambì, ku Nkùruse dibènesha kulwadi kùdi bàà Bisàmbà byà bendà, bwà kupeta Mukàjì-musèla. Dibènesha ndilwile ku Nkùruse, kuumukila kùdi beena Yuda kuya ku bàà Bisàmbà byà bendè. Mubèngìlbwe, bààkabenga Nkùruse, ki bwà cinyì Yéyè wàkapeta Mukàjì-musèla wa Bisàmbà byà bendè.

³³⁰ Mpindyewu pàvvwà Yòzefù, kumpàlà kwà cyôcì eci, pàvvwàye... mumvwe bwà bânà bààbò, bàvvwà... Bàvwa pambelu pàà bwobùmwè munda mwà bidimu byàbùngì, beena Yuda abu.

³³¹ Mpindyewu tàngilààyi. Tudi munkacì mwà kwalukila ku Zekààyì mpindyewu, mwàkatwàbu mikemu amu, ne kwasa myadi ne kutwà mikemu. Nènku nànsha mékù neàtapuluke ôwò miine ne makwàbò mékù, kupatuka, bàmba ne: “Tudi bacyénzè bishi? Mmunyì mutùdì mwà kwikala bacyenze’s?” Pààkambabo ne: “Ebi bibangu Udi mubipetèle penyì, bishidilu bìdì mu byanza Byèbè abi’s?” nànsha bààkaMutwà difùmà abu mene. “Yéyè neàlwe mu matutu. Nènku nebàMumòne, nànsha mene bààkaMutwà difùmà abu. Nènku nzùbu yônsò neàse mwadi, ne nebàtwe mikemu.” Kabààkumanya cyà kwenza to.

³³² Nènku pàvvwà Yòzefù... Nudi bamanye bwalu-bulonda abu’s. Pààkamònaye bânà bààbò, ki kwenzaye bu ne kàvwa mwà kwakula cyena Ebèlu to, ki kukebaye mwandamunyi bwà kumwandamvwinaye. Nènku kavwa mwà kwakula cyena Ebèlu to, kwenzaye bu nànku awu’s; kàdì’s ùvwa ùswa kujandula. Nènku ki ndekeelu wa byônsò, dîngà ditùkù, pààkatwàlàbò mwakunyèndè wa balùme mutekète awu, nukaavwaku bamòne anyì? Ùvwa m’Benyàmìnà wàkasalula musùùkà wà Yòzefù awu’s?

³³³ Ncinyì aci, leelù ewu, cììkalà mwà kusalula musùùkà Wèndè, Yòzefù wetù, Yesù? Èkèleeyìyà wa citende udi mu Iran mwàmwa, udi mulamè mikjenji yà Nzambì awu. Nènku mbantu balediùbwe cyàkàbìdì bàdì badikungwije mu Palestine, ne baalujuludiibwe cyàkàbìdì. Mùtootò wà Davidì wà matumba àsambòmbò awu,

dibendela dyà kale ne kale dyà pa buloba, ditunga ndilediibwe mu ndambù wa bidimu bishààle ebi. Ki Izàlèèlè nyéyè awu's.

Matùngà àdi àpanduluka, Izàlèèlè nyewu
ùtàbuluka,
Bimanyinu byàkadyànjilà Bible kwamba;
Matùkù à bàà Bisàmbà byà bendè mmabala ku
byanza, mûle tèntè ne bintu bìdì bìkwàcishà
bwôwà;
“Alùkilaayi, Éyi nwénù bàdì batangàlajiùbwe,
kùdì beenu sungasunga.”

Ditùkù dyà bupikudi dìkaadi pabwípì,
Myoyi ya bantu ki kufwayi ne bwôwà eku;
(Anji citàngilaayi ànu's, nyawu bônsò
bashààle banyunguluke mitù.)
Ujìjbwà ne Nyumà, mwêndù wèbè
mulongolola kakùyi dikàla ne musukula,
Bàndulukà! Bupikudi bwèbè bùkaadi
pabwípì.

Baprófetà bàà mashimi bàdi bàshima, bàdi
bàvila Bulelèlè bwà Nzambì,
Bwà ne Yesù Kilistò awu ki Nzambì wetù to;
(Butùmbi's wè!) Kàdi Dibuulula ndilwe's.
Pa nànkú netwèndeleya yìdì bapostòlò
badyacile. (Ànu mu mwaba wàbo
ùmwèùmwè awu menemene.)

Bwali ditùkù dyà bupikudi dìkaadi pabwípì,
Myoyi yà bantu ki kufwayi ne bwôwà eku's;
Ujìjbwà ne Nyumà wa Nzambì, mwêndù wèbè
mulongolola kakùyi dikàla ne musukula,
Bàndulukà! Bupikudi bwèbè bùkaadi
pabwípì.

³³⁴ Kaa! Kaa, Yòzefù, pààkamònaye Benyàmìnà mutekète
mwimane mwaba awu! S'ki mwakunyèndè wa balùme
awu's. Nudi numòna Benyàmìnà mwânaà awu mpindyewu
kuntwaku...?...kwàka naka, musòmbe mwaba awu anyì?
Bifuku byà—byà buloba, byà beena Yuda, kwalukilabi mwaba
wîkala binunu lukama ne makumi anaayi ne bïnaayi bààbò
biimane awu, bwà kwakidila Kilistò pààMumònàbò Úlwa. Bôbò
nebàmbè ne: “Mònaayi, ewu s'ki Nzambì wetù Utùvvà bindile
awu's.” Dibà adi nebàmònè mutwibwe difùmà awu...“Ebi
mbilwe penyi?”

Yéyè ne: “Mu nzùbu wa mulunda Wanyì.”

³³⁵ Nènku nebàtwe mikemu ne nebàdilè. Ne dîkù dyônsò, bifuku
byàbò byà Davìdì ne Nefatàlímà ne bônsò, nebììkalè batàpuluke
bôbò biine, dîkù ne dîkù dyônsò, ne bàdiddilà pààMumònabo
mwimane mu mpeepèlè, Ewu wàkatwàbo difùmà awu.

³³⁶ Mukenji Wendè newìkale cinyì? Tàngilààyì cyàkamba Yòzefù. Pààkambayé . . .

³³⁷ Tangilaayi cikwàbò cintu. Pààkapeta Yòzefù bânà kumpàla kwèndè, yéyé kubàtàngila, kumònaye Benyàmìnà mutekète awu. Yéyé kumònaye Efàlàyimà, kumònaye bakwàbò abu mwaba awu, Gaadà ne bônsò baa kùdibo. Nènku bifuku dikumi ne bibidì, bifuku dikumi abi musangu awu, biimane kumpàla kwèndè. Kubàmònayè bônsò biimane mwaba awu. Ùvwa mumanye ne bavwa mbânà bààbò. Kàdi kutàngilaye Benyàmìnà mutekète awu, dyàkamwè, cyà mu dibòdi kumba kumupata. Kumanyaye ne mbânà bààbò. Cyàkambaye ncinyì? “Bantu bônsò banshiile kaaba.” Cyàkenzelà mukàjèndè ne bânà bëndè ncinyì? Bôbò kubwela mu nzùbu wa bukalenge.

³³⁸ Èkèleeyiyà wa bàà Bisàmbà byà bendè neàye penyi mu Dyambwibwa? Mu Nzùbu wa bukalenge. Mukàjì-musèla, Àlèluuyàh, Mukàjì-musèla neùmushìibwe pa buloba, uya mu Dyambwibwa. Pashìshe pààlukilàYe, Mukàj’Èndè-musèla kààkwikalakù pàdìYe ùDìmanyisha kùdì bânà Bààbò, beena Yuda nànsha, bàvvà baMutwè difùmà abu, bàvvwa baMubenge abu.

³³⁹ Kàdi mukàjèndè ne munanga wendè awu, balunda bëndè bàà pa mwoyi abu, ba—banyàndè batuma kùdì Nzambì, bàvvwa mu ntempelu. Nènku mmwenze ànu utàngila anyì, kwambaye ne bàvvwa . . . Kabàvvwa bamanye to. Kwambabò ne: “Kaa, mfùmù munène ewu’s wè!” Kubangabò kwambilangana, umwe ne mukwèndè, kaa, bwà bintu bivwàbò benze abi.

³⁴⁰ Ngeela meeji ne ùvvà ng’Efàlàyimà, anyì kî ng’Efalàyimà to, kàdi ndi mupwe ne mwoyi ni ùvvwa nganyì mene mpindyewu, wà—wàkamba ne: “Èè, kabìvwa bìkèngela bwà twêtù kwikala bashipe mwanèètù, Yòzefù to.” Yéyé ne: “Udi umònà’s, tukaadi munkaci mwà kufuciibwa.” Luubènà, Luubènà kwamba ne: “Kabìvwa bìkèngela twêtù kwikala bashipe mwanèètù to,” yéyé ne: “bwalu, nudi numònà’s, tudi munkaci mwà kufuciibwa bwà bitùvvà benze.”

³⁴¹ Nènku Yòzefù mwimane mwaba awu; kabàvvwa beela meeji ne ùvvwa mwà kuumvwa cyena Ebèlu to. Kàdi’s yéyé ùvvà mucìmanyé.

³⁴² Bàmwè beela meeji ne, kêna mwà kwakula . . . kuumvwaku dyakula dyà mu myakulu to, kàdi’s Yéyé mmumanye byônsò abi. Èyowà, Yéyé mmumanye. Bukalenge bwà bàà Bisàmbà byà bendè bwàkabanga ne dyakula dyà mu myakulu ne dyandamuna, mu mutù wa ngôlò (mutù wa kumpàla) kumpàla kwà kupònawù. Cyàkajikijà cipungu cyà kumpàla cyà bàà Bisàmbà byà bendè aci ncinyì? Mufundi wa mu myakulu myenyi ku cimanu, ne muntu mwaba awu uvwa mwà kuwùmvwija ne kwamba ne ncikampànda. Bidi bipatuka mùshindù wùmwèwùmwè awu. Amen. Bibwela ne bipatuka mùshindù wùmwèwùmwè awu.

³⁴³ Bavwa beela meeji ne kàvwa mwà kuumvwa myakulu yìvvwàbo bàkula ayi to, kàdi's ùvwa muyimanye. Bôbò ne: "Nudi numònà citùdì bapete anyì?"

Nènku ki Yòzefù dîbà adi kumònaye ne bàdi banyingalala bwà civwàbo benze aci's.

³⁴⁴ Mpindyewu Ùdi umònà cinyongopelu ne kanyinganyinga bwà muùvwàbo baMubenge, pa nànku Yéyè mMulgìibwe ne muminu Wèndè mmupate mpindyewu. Ùdi pabwípì bwà kutangalaja Èkèleeziyà Wendè pa buloba, kuMubweja mu Butùmbi. Pashiìshe kwalukila, ne dîbà adi bifuku byônsò byà pa buloba nebyase mwadi.

³⁴⁵ Bààkenza cinyì? Luubènà, bônsò bwàbù, bààkabanga kwela mbila, kwambabò ne: "Kaa! Kaa!" Kuumvwabò bwôwà ne kwambabò ne: "Ewu's n'yéyè. Bwà mpindyewu kaayi tudi tusuna tudyàmbika's. Mpindyewu yéyè's neàtushipe. Mpindyewu yéyè... Tudi bamanye ne netùbutudiibwe mpindyewu mene, bwalu n'Yòzefù uvwa kule neetù kukaadi ntàntà awu. S'n'Yòzefù, mwanèètù awu, bwà mpindyewu kaayi tudi tusuna tudyàmbika's."

³⁴⁶ Yéyè ne: "Kanufìlkidyanganyi munda to. Nzambì ngwakenza cyôcì eci bwà kunùpàndisha."

³⁴⁷ Cyàkenza Nzambì ncinyì? Bwà cinyi beena Yuda bààkabenga Yesù? Bwà twétù bàà Bisàmbà byà bendè, bwà ne, bantu bààkabìikilà Yè bwà bwalu bwà Dínà Dyèndè abu, Nzambì wàkacyenza bwà kupàndisha mwoyi wà Èkèleeziyà wa bàà Bisàmbà byà bendè, Mukàjì-musèla.

³⁴⁸ Bifuku byônsò byàkaMubèngà abi nebyase mwadi. Nebàdisokokè mu nyòngòlo, ne mu mbwebwe, ne bikwàbò, bàmba ne: "Tusokòkaayi, tûpònènaayikù, nwénù mikuna." BâàkaMubenga, Yéyè. Bisàmbà byà pa buloba nebidilè mwadi bwà bwalu Bwèndè. Nènku dîkù ne dîkù mu Izàlèèlè nebìkè batàpuluke. Mékù neàtапulukè, dìmwè ne dikwàbò, bàmba ne: "Cituvwà bacyéñzèle ncinyì? Mbitùfikile munyì bwà kuMubèngà? Munyì's? Ki Yéyè udi mwimane wàwa's. Ki Nzambì Utùvwà bindilèndile wàwa. Kàdi's ki Yéyè awu, mwikàle ne bibangu byà mputpa yà misonso mu byanza Byèndè, kàdi twétù's ke bààkacyènza."

³⁴⁹ Ki cyôcì aci menemene cìvwa bânà bètù abu bâmbe ànu mwaba awu mene's, pààkaalukilabo e kwamba ne: "S'ki Yòzefù, utwàkasùmbisha awu's."

Yéyè ne: "Mêmè ndi Yòzefù, mwanèènù, unwàkasùmbishà mu Ejiipitu awu."

³⁵⁰ "Kaa!" Bâvwa ne bwôwà. Nènku bavwa munkaci mwà myadi ne batwa mikemu, bàdyèla muntu kùdì mukwèndè ne: "Citùdi mwà kwenza ncinyì's?"

³⁵¹ Yéyè ne: “Kanudìfiìkidi munda to, bwalu Nzambì nguvwa mwenze byônsò ebi. Nzambì nguvwa muntume kumpàla.”

³⁵² Nzambì ngwàkafuka bantu bônsò; batòòke, bafiìke, bafiikuluke, bàà kalaabi, muntu yônsò. Nzambì ngwàkafuka muntu yônsò wendenda ewu. Wàkafùka muntu wa Bisàmbà byà bendè, kufùka mwena Yuda. Wàkafùka bwônsò. Byônsò bìdi bwà butùmbi Bwèndè. Ne byákakèngela bwà beena Yuda kubèngiibwabò bwà kwangata Mukàjì-musèla wa bàà Bisàmbà byà bendè.

³⁵³ Ki bwà cinyi bifwànyìkijilu byônsò ebi bìdi nànnku. Bwà ne Mukàjì-musèla wa bàà Bisàmbà byà bendè ne ndelàngànyì Yèndè, Èkèleeyiyà wa butùmbi wa cyena mpenta awu musukula mu Mashi a Mwânà wa mùkòòkò, ne bukolè bwônsò bwà dibìika dyà ku lufù busòmbèle munda mwàbò, neàbiike dìngà ditùkù mu Dyambwibwa (mu katancì, mu mubùnyì wà dísú) bwà kuya kashààla mu Bwikadi bwà Yesù, pàdì Ye wàlukila (ne utangalaja bintu byônsò) bwà kuDimanyisha kùdì bânaà Bâàbò.

³⁵⁴ Tàngilààyi cìdì Mufündu wàmba mwab’ewu, bwà kujikija. Kaa!

Mònaayi, yéyè ùdi ûlwa ne matutu; ne dîsù dyônsò nedìmumònè, (mpindyewu ùdi wàkula bwà Dilwa diibìdi, kí n’Dyambwibwa nànsha), ne aba bààkamutwa difuma kàbìdi:...

³⁵⁵ Nshapità wa 7, mvensa wa 1... Anyi, mvensa wa 7 wa nshapità wa 1.

...dîsù dyônsò nedìmumònè, ne aba bààkamutwa difuma kàbìdi: ne bifuku byônsò byà pa buloba nebítwe mikemu bwà bwalu bwèndè. Amu nànnku, Amen.

³⁵⁶ Pashìshe Ùdi uteela dìyì dyamba dinène adi. Ewu nùnku nganyi’s? Nganyi Ewu udibo ne cyà kwindila’s?

Mêmè ndi Alpha ne Omega, ndi A ne Z, (A wa cyena Ngelika ne Z, alphabèt wa cyena Ngelika)...

³⁵⁷ Byenzedi 2:36, kùdì... Peetèlo wàkamba ne: “Kakwèna dìngà dínà difila mwinshi mwà Dyulu dìdì bantu ne cyà kusÙngidibwaku to.” Anyì, to, mfwilaayiku luse; ndi mucitèèle bibì’s. Wàkamba ne: “Nzùbu yônsò wa Izàlèèlà àmanye bulelèlà ne, Nzambì mmwenze Yesù umwèumwe ewu, unùdì bapoopèlè pa nkùruse ewu, byônsò bìbìdi Mukalenge ne Kilistò.”

³⁵⁸ Yone 14:7 ne 12, Toomààsè wàkamba ne: “Mukalenge, tûleejè Taatù, aci necitùsànkìshè.”

³⁵⁹ Yéyè ne: “Mêmè ndi neenù ntàntà mule be, kàdi wêwè kwêna mummanye anyì?” Yéyè ne: “Ewu udi muMmònè mmumònè Taatù. Bwà cinyi udi wamba ne: ‘Ndeeje Taatù?’ Mêmè ne Taatù Wanyì tudi Umwe.”

³⁶⁰ Mêmè kwambila muntu kampànda cyôcì aci musangu kampànda. Inábànzà awu kwambaye ne: “Anji indila kakesè, Mukalenge Branham.” Yéyè ne: “Wêwè ne mukàjèèbè’s nudi umwe, nwénù pèènù.”

Mêmè ne: “Kàdi aci kî mmu mùshindù awu to.”

Yéyè ne: “Mfwileku luse.”

Mêmè ne: “Udi mummòne anyì?”

Yéyè ne: “Ndi mukumòne’s.”

Mêmè ne: “Udi umònà mukàjàànyì anyì?”

Yéyè ne: “To.”

³⁶¹ Mêmè ne: “Dibà adi, Bôbò’s bâdi mu mùshindù mushìllàngànè’s. Yéyè ne: ‘Paùdi uMmònà, wämònù Taatù.’” Pa nànkù aci civwa cikumbane bwà cyôcì aci.

³⁶² Pa nànkù mu Yone Munsantu, anyì mu Yone wa Kumpàla 5:7 too ne ku 8, nwénù bônsò bâdi bâcifundà abu. Yone wa Kumpàla 5:7 too ne ku 8, Bible ngudi mwambe. Mwakudi awu, muntu ànu umwèumwè wâkafundà Dibuulula dìvvà Yesù mumupe edi, wâkamba ne: “Kùdi bàsàtu bâdi bâfila bujaadiki mu Dyulu: Taatù, Dîyì (Dîyì s’ki Mwânà) . . . Taatù, Dîyì, ne Nyumà Mwîmpè, ne bàsàtù aba bâdi umwe. Kùdi bìsàtu bìdì bîfila bujaadiki pa buloba: mâyi, Mashi, ne Nyumà, ne bìdi bipetangana; kî ne bìdi cintu cîmwè to, kàdi bìdi bipetangana mu cîmwè.”

³⁶³ Kwêna mwà kwikalà ne Taatù kùyi ne Mwânà to. Kwêna mwà kwikalà ne Taatù anyì Mwânà kùyi ne Nyumà Mwîmpè to. Cyà bushùwà. Kàdi wêwè . . . Nènku mâyi, Mashi, ne Nyumà, s’ki bintu bìdì bìkèngela bwà kubwela mu Mubidi Wèndè mbyôbì abi.

³⁶⁴ Pàdì dilediibwa dyà mu mubidi dyènzechka, ncintu kaayi cyà kumpàla cìdì cyenzeka pàdì mukàjì ulela mwânà? Cintu cyà kumpàla, mmâyi. Cintu ciibidì, mmashi. Ncyà bushùwà anyì? Cintu cìdì cîlondà, n’nyumà. Mwânà ùdi ubakula mweyelu wèndè, utwadija kweyela. Mâyi, mashi, ne nyuma, ki bìdì byenza dilediibwa dyà mu mubidi.

³⁶⁵ Kàbìdì, Dilediibwa dyà mu nyumà. Dibatiiza dyà mu mâyi mu Dînà dyà Yesù Kilistò; dibingishiibwa ku diitabuuja, kwitabuuja Mukalenge Yesù Kilistò. Mâyi! Cìdì cîlondà ncinyì? Mashi; dijidiibwa, disukula, dimupâtula.

³⁶⁶ Ki mwaba ngwôwò awu unùdì nwénù ba-Nazaréens bapangile’s; nudi baye ànu too ne mwaba awu kàdi kanuyi batàmbe kuya kule to. Dibungu dìdì dijidiibwe pa cyoshelu, dilongolola bwà mudimu, kàdi kadyèna ku mudimu to. “Bàà disànkà ng’aba,” masànkà, “bâdi ne nzala ne nyoota yà bwakàne, bwalu bôbò nebuukucishiibwe.” Dibungu ndijidiibwe. Aci’s mbulelèlè.

³⁶⁷ Aci's cìdi ànu bu virgo. Mwaku ewu *virgo* ùdi umvwija ne "mukezùke, wa cijila, kàyi musopakaja to, mujidiibwe." Yitaanu yìvwa ne maanyi, ne yitaanu kayìvwa ne maanyi to; yitaanu yìvwa myûjìibwe, ne mikwàbò ayi yìvwa ànu kacya yàshààla mu dijidiibwa's. "Nukaadi bapete Nyumà Mwîmpè *kacya* nwîtabuuja anyì," nwénù ba-Baptistes, ba-Presbytériens?

"Kawèna bamanye mene ne Nyumà Mwîmpè ùtukù to."

"Àpu, nwâkabàtijiibwa mùshindù kaayi's?" Uh-huh.

³⁶⁸ Paanyimà pàà yéyè mumane kubatentekela byanza, bavwa díba adi, paanyimà pàà bamane kusÙngidiibwa ne kujidiibwa, bààkuujiibwa tente ne Nyumà Mwîmpè. Cyà bushùwà.

³⁶⁹ Mâyì, Mashi, Nyumà! Yesù wàkalwa bwà kwowesha mâyì ne kukezula, ne bwà kujidila Èkèleeziyà, bwà Wàmòna mwà kulwa ne kusòmbelamù. Ne Mashi Èndè Yéyè mwine; Yéyè wàkafila Mashi Èndè Sungasunga malela à kùdì Nzambi, bwà Wàmòna mwà kutukezula ku dilediibwa dyètù dyà ku disangila dyà mulùme ne mukàjì adi, ne kutupa lupanza lujidila, lwà cijila bwà Yéyè mwine kulwamù.

³⁷⁰ "Katancì kakesè aka, bàà pa buloba kabààkuMmònà kàbìdì to; kàdi nwénù nenùMmònà bwalu Mêmè," mupinganyi muleeji muntu, "nêngìlkale neenù, munda mwènù mene, too ne ku ndekeelu kwà dikùmbana dyà maalu ônsò." Amen. "Too ne ku ndekeelu, Mêmè nêngìlkale neenù ne munda mwènù. Byenzedi bìndì Mêmè ngenza nenùbyéñzè pèènù. Bimanyinu ebi nebìfile bàdi bìtabuuja." Nzambi mu Èkèleeziyà! Kaa, ekèlekèle! Bunzambi! "Kùdì basatu bàdi bafilà bujaadiki mu Dyulu: Taatù, Dîyi (Mwânà), Nyumà Mwîmpè. Bàdi Umwe."

³⁷¹ Mpindyewu, udi mwà kusÙngidiibwa kùyi mujidìibwe to. Udi mwà kwikala mujidìibwe kàdi kùyi ne Nyumà Mwîmpè to; cyà bushùwà, nyumà mujidila, kùyi müjìibwe tèntè to. Dijidila dyà mwoyi wèbè, dikezula dyà mwoyi wèbè, kawùyi ûjìibwa tèntè ne cintu kampànda to. Ki cyàkambaYe ne: "Pàdì nyumà wa bukooya ùpàtuka munda mwà muntu awu, ùdi wèndakana mu myaba myûmè. Walukila, usangana nzùbu wendè awu mulengeja yônsò, kàdi kubwelamù. Ngiikadilu wa ndekeelu wa muntu awu ùdi misangu yàbûngì, misangu mwandamutekète, mutàmbe kubiipa kupita muvvabi ku cibangidilu amu."

³⁷² Ki cyàkanwènzekelà nwénù ba-Pèlerins de la Sainteté, ba-Nazaréens, ne bakwàbò. Nwénù kwitaba. Nènku pàkalwa Nyumà Mwîmpè, kubanga kwakula mu myakulu, ne kufila bimanyinu ne maalu à kukèma, nwénù kucibìkila ne "ndémon" ne kupenda byenzedi byà Nzambi, kubibìkila ne "nnymà wa bukooya." Kàdi nudi bamònè kwàkaya èkèleeziyà wenù anyì? Pàtukààyi munda mwèndè! Dibà ndyédi, Dibuulula dyà Yesù Kilistò didi munkaci mwà kulongeshiibwa, Nzambi ngwàkabuulula mu bukolè bwà dileeja Dyèndè dyà patòòke dyà Nyumà Mwîmpè. Amen. Ditùkù dyà bupikudi dikaadi pabwîpì.

³⁷³ Mpindyewu, Bunzambi munda Mwèndè, Timòte wa Kumpàla 3:16.

. . . *kakùyi dikòkangana to bwalu busokoka bwà difwàna dyà Nzambi mbunène: bwalu Nzambi wàkamwèneshiibwa mu mubidi, . . . mumòna kùdi banjèlo, . . . mwitàbùùjìibwe pa buloba, mwakidila mu butumbi.*

³⁷⁴ Kaa, ànu nànku ànu nànku ànu nànku's. Kàdi mpindyewu tudi penyi? Ku ndekeelu kwà mvensa wa 8.

³⁷⁵ Dilòòlò edi tudi tubanga mvensa wa—wa 9, *Cikèènà-kumò cyà Patémò*. Kaa, kùdi bintu binène mu cibucilu bwètù twètù's. Nudi baMunangè anyi?

Ndi muMunange, ndi muMunange
Bwalu Yéyè wàkannanga kumpàla
Ne wàkampetela lupàndu
Pa mucì wà Kàlvariò.

³⁷⁶ Ncyà bushùwà ne nudi nwenza nànku anyi? Nzambi mmuDimanyishe kûdi, mubuuludìibwe ne Yéyè ùdi Mwânà wa Nzambi, Yesù Kilistò, Nzambi mumwènèshiibwe mu mubidi, bwà kuumusha mpèkaatu? Ùdi munkaci mwà kuDibuulula mu matùkù à ndekeelu aa mu èkèleeziyà Yendè, uDimanyisha.

³⁷⁷ Mpindyewu, bintu biine bìdì munkaci mwà kwenzeka mu Èkèleeziyà ebi, tàngilààyi numònè, ku ndekeelu kwà Mukenji ewu, Bible ne kêna wamba ne maalu aa àdi ne cyà kwenzeka, ànu mu wòwù menemene. Kumòna ní kabyàkenzeka ànu menemene, mu Cikondo cyà Efeso, ne cyà Pegàmò, cyà Twatìlà, kutungunuka, mu cikondo cyônsò.

³⁷⁸ Kwamba mùvvà Luther mwà kwenza, ne mùvvà Wesley mwà kwenza. Ne mùshindù mwine wìkalà dingumba dyà beena Mpenta edi mwà kubwela mu ngiikadilu wa Laòdikiyà, wa civùmvù ewu, kàdi, mu byônsò abi, Yéyè ûvvà mwà kukoka bantu. Ncyà bushùwà. Mmwômò menemene. Tukaadi ku ndekeelu. Kaa, mêmè's ndi ne disànkà dyàbûngì be! Nènku, kaa, ànu mûngàdimònù ngenda ncyòka, ne ntàngila balunda bàànyì ne bikwàbò, ne pa kumòna buloba ne—ne cimvundu cinènè cìdìbu busanganyiibwamu eci, ne pashìishe kudyambidila ne Dilwa dyà Mukalenge dikaadi pabwîpi menemene. Tukaadi ku ndekeelu wa cikondo.

³⁷⁹ Myoyi ya bantu yìdi yàmba kwimana bwà bwôwà. Myaba yônsò, bantu bônsò, bàdi ànu badilakana ku bisanji, dìbà dyônsò, "Ikalaayi badilongòlôle ku dibundiibwa dyà mvità yà mu lupeepèlè. Angataayi *cikampanda*, angataayi *cikansanga*, nubwele mu nzùbu wa mwinshi mwà buloba." Mmunyi muwàsokoma aci? Kanwêna mwà kusokoma aci to. Èè, cintu aci necìbwele mwinshì mwà buloba mu bwondòkè bwà metèlè makumi anaayi ne ataananu, mu bule bwà kilòmètè nkamà yìbìdì ne makumi anaayi, mu nseke yônsò yinaayi. Mòna's,

munyùkunyuku wààcì newikale... Cyôci cilenge apa nùnku, ncifwànyìne kunyukusha Indianapolis too ne mwinshì mwà buloba. Môna's, mbifwànyìne ànu kutaayisha Indianapolis kumusùnsulula, kulenga mene mu Louisville emu, nwamònù's, cîmwè cyà ku byôbì abi's. Mbikolè bwà kwamba cîdibo naaci pa kuumusha aci.

³⁸⁰ Nènku, tàngila, kabyèna bìkèngela bwà wêwè ku... Udi mumanye's, kabyèna bìkèngela bwà Russie kwenzayè nànnku to. Cuba udi mwà kwenza nànnku. Dînà kaaba kakesè kwônsò, kaaba ka—kakesè kàà bunènè bwà Alcatraz udi kwaka wàwa, nkafwànyìne kucyènza, ne cìkwàta buloba bujimà. Cintu cimwèpelè cîdi cikèngela kwenza cîdi ànu kumuteeka mu njila kâdi kukoka kaanshinga kàmwèpelè. Kwêna dijinga ne cilwilu to. Bidi bìkèngela ànu mukoleshi wa maalu umwèpelè cyanàànà bwà kucyenza, mu byanza byà dyabûlù. Ncyà bushùwà menemene. Üvwa mwà kucyènza, nènku dîbà adi cintu cyônsò mu kaabujima's ncijike. Dîbà adi kwônsò's nkumane kujika.

³⁸¹ Kàdi, kaa, lekèlà nkupèeshèku cintu cibènesha eci. Patùdì tumònà aci pabwípì menemene, patùdì tumònà ne ncifwànyìne kwenzeka kumpàla kwà dîndà. Vùlukààyì ne, Èkèleeziyà mmumane kwalukila kumbelu kumpàla kwà aci kwenzekaci. Dyambwibwa dìdi dyènzekaka kumpàla.

³⁸² Mpindyewu, bwà kanwìkadi nwàlwa kukònyangajibwa, vùlukààyì ne, Yesù wàkamba ne: "Ànu mwàkadibi mu matùkù à Noà, ànu mwàkadibi mu matùkù à Lotà." Vùlukààyì ne, kumpàla kwà mvula kanà yônsò ewu kumatayè, Noà ukaavwa mu bwâtù. Nwamònù anyì? Noà ukaavwa mu bwâtù. Wàkangaciibwa, ku cyôci eci. Nènku mpindyewu, Noà uvwa cimfwànyì cyà beena Ýuda. Kàdi Henoka wàkaalukila kumbelu kàyi mufwè to. Nènku Noà mmwenze ànu ùmònà Henoka uya, kumanyaye ne civwa ncikondo, bwà kutwàdija kwenza bwatu. Ncyà bushùwà. Aci civwa ncimanyinu cyà Noà, pààkayà Henoka kumbelu apu. Nènku pàdì ànu Èkèleeziyà wa bàà Bisamba byà bendè ne cyà kuumushiibwa, dîbà adi Ùdi uDìmanyisha kùdì Izàlèèlè. Nwamònù anyì? Ncyà bushùwà.

³⁸³ Vùlukààyì ne, mu matùkù à Lotà, bu mwàkambà Yesù, kumpàla kwà kasunsukila nànnsha kàmwè kàà kapyà kulengaku buloba, Mwanjèlo awu wàkamba ne: "Lwijakaja. Ambuluja. Patuka mwab'ewu, bwalu ncyéna mwà kwenza cintu nànnsha cîmwè paùdì kuyi mwanji kuumuka apa to." Kumpàla kwà kapyà kanà kônsò kulengakù, Lotà ne dîkù dyèndè bavwa bamane kupatuka bayè. Pa nànnku, Dyambwibwa nedilwe kumpàla kwà Dikenga dinène kubweladì.

³⁸⁴ Dikenga dinènè, bantu bààbûngì bàtu babwejakaja aci's. Netùcìlongòlôle, lumingu elu, byàswà Mukalenge, ku dikwacisha dyà Mukalenge. Vùlukààyì ne, nudi bindile Cikondo cyà Dikenga dinène, civwa ne, bu nwénù mwà kucìfwànyikija

mu Bible, civwa mmatùkù à lutàtù à Yakòbò, nudi numònà's, pààkatacishiibwàye. Aci kacìvwa citangila bàà Bisàmbà byà bendè to. Bàà Bisàmbà byà bendè kabéena ne cyà dyenza naaci to. Kakwèna cifwànyìkijilu mu Bible bwà aci to. Èkèleeziyà wa bàà Bisàmbà byà bendè mmwambwibwe.

³⁸⁵ Ne nwénù nudi nukeba bwà “mâyì àndamuke mashi,” ne bintu byà mùshindù awu. Aci cidi cyàlukidila kàbìdì Izàlèlèà, kuntu kwaka ne Môsà ne Eliyà, pààlukilabò. Eliyà, bwà musangu mwinâyi, ùdi wàlukila mu nyumà. Nànscha umwe wa ku bôbò abu kààkafwà to, anyì, Môsà wàkafwà, bôbò kabààkamanya mwaba wàkajikiibwaye to. Ùvwa ne cyà kwikala mujuke mwaba kampànda pankaci pàà cikondo aci ne mwaba awu, bwalu, pa Mukùnà wà Dikudimuka dyà mpàla, s'ki yèyè awu, uyiikila ne Yesù, kí mmwômò anyì? Nwamònù anyì?

³⁸⁶ Pa nànkú nebààlukile ne nebàshebeyiibwè, ne nebàbàlààdikè mu mùsèèsù wà nyumà awu wùdibo babìikila ne “Sodoma,” mùvvà Mukalenge wetù mupoopèdìùbwè pa nkùrusè, Yélusàlèmà. Bôbò nebàyiishè beena Yuda, ne nebèlè buloba milawu, ne nebàkangè maulu, ne bikwàbò byà mùshindù awu. Nènku ndekeelu wa mudimu wà bwambi wà bàà Bisàmbà byà bendè neùtungunuke ne neùswikakanangane ne cyòci aci, ne bàà Bisàmbà byà bendè nebàye kumbèlu, ne mudimu wà bwambi awu newutungunukè. Kí kwikala kabutu kàà bintu byònsò. Byàbisàtu bìbìdì byà bàà pa buloba nebifwe, ne bikwàbò byònsò. Pavwà mibidi mifwè ayi milààdika mu mìsèèsù amu, munda mwà matùkù àsàtu, tàngilààyi numònè ne civwa ncinyi.

³⁸⁷ Tàngilààyi bimfwànyì ebi bìndì mmupete bifumina ku Amèrikè wa ku Sud, pààkashipabo missionnaire wa cyena Mpenta awu mwaba awu, mukàjèndè, mwadija mu mùsèèsù, ne yéyè ne bânà bëndè bakesè bàbìdì. Mwânà mukesè wa bakàjì, ne kafù këndè kakesè aku kuulakane mùshindù awu. Kabàvvaku nànscha baswè kubajiika to. Bavwa babapicila ku luseke, babatwila mate mwab'awu mùshindù ewu, munda mwà matùkù àsàtu anyì anaayi. Mwanèètù Kopp kukwàtayè bindidìmbi. Ndi naabi kumbèlu, nwamònù's, mùshindù ùdibo benza's.

³⁸⁸ Pashìlshe bàdi båtùminangana mapà, ewu ne ewu. Tàngilààyi mùdì aci cifwànyìkijibwe mu Bible, nudi numònà ne ng'èkèleeziyà kaayi wikala mwà kwenza aci. Ncyà bushùwà, pabwípì menemene, ne kubwela buludi bu nyoka mpindyewu mene, ànu ne budimù muvwabo naabu amu, cimanyinu cyà bintu mpindyewu mene.

³⁸⁹ Tàngilààyi cipròfetà cyàkampà Mukalenge mu cidimu cyà '33, muvwaci mwà kwenzeka ne: “Mbafwànyìne kwitabila bakàjì bwà kwenzabo masungulangana. Mu dyela dyà tukàndà, bôbò nebàsungule muntu udi kàyi ùkengediibwa to.” Bintu mwandamutekète byàkafidiibwa, ne bitaanu byà ku byòbì

bikaadi byenzèke. Cintu cìvwa cìlondà cìvwa mmukàjì munène, èkèleeyiyà, bukolè kampànda anyì cintu kampànda, cìvwa mwà kwangata États-Unis ewu, bwà kukòokesha. Pashìishe mêmè kumumònà mwenze bu butù, butangalaja, mwaba wàkafikaye ku ndekeelu. Civwa ncikondo cyà nshììkidilu.

³⁹⁰ Cyàkamba ne: “Nekwikale màshinyì ìkalà mwà kwenda. Kabyàkukengela kwikala ne mwendeshimù to.” Bààfumu ku diàpwàngaja. Kwambaci, bidimu dikumi ne cìmwè...

³⁹¹ Nyumà Mwîmpè kungambilaye. S’ki cyôcì aci pa dibeji. Kwêna mwà... Kacyèna mwà kuvidiibwa to. S’ki cyôcì aci pa dibeji, ànu bu mwàkambà Nyumà Mwîmpè amu.

³⁹² Bidimu dikumi ne cìmwè kumpàla kwa Cimanu cyà Maginot kwibakiibwaci, Mêmè ne: “Beena Allemagne... Amèrikè neìkalè ànu... Mfùmù wa ditunga Roosevelt ki wìkalà mucimbàkàne wa ku bônsò.” Nènku ncyà bushùwà. Ki cìvwà Ye.

³⁹³ Ki nkunutapa ku mwöyi nwénù ba-Démocrates to, kàdi ndi—ndi nnwambila. Kí Démocrate anyi Républicain mpindyewu to. N’Yesù Kilistò, Mwânà wa Nzambi, utùdì twamba ewu. Mêmè ncyéna ní Démocrate anyi Républicain to. Mêmè ndi mwena Kilistò. Nènku dìbà adi, bôbò, cyônsò cìvwàku aci, kàdi nudi numònà mwaba awu’s.

³⁹⁴ Kàdi tàngilààyì kuneeku, ditùkù adi, bu nwénù baswè kumònà mùdìbu musùmbà wa bavile diitabuuja. Bàngata màshinyì awu ne baàlongolola, bwà ne, musangu wônsò wûdì mufwànyìne kwelela Mukalenge Nixon tukàndà awu, uvwa ne cyà kwelela mulumyana mukwabo ewu, ànu musangu ümwèùmwè awu. Ed... J. Edgar Hoover kupàtulaye màshinyì awu. Mbanganyì bakaadiku bacibale? Mònà’s, cyà bushùwà, byônsò’s mbifundìibwe mu bibejibeji byônsò nkông, nguumu, ne bikwàbò byônsò. Nudi bamònè kutwafiki anyì?

³⁹⁵ Kakucyèna cikwàbò cintu cyà meeji matòòke to pa kuumusha ànu Kilistò. Amen. Kaa, Mukàndà mubènèshiìbwè wà kale awu! S’ki Cyôcì aci’s. Ki Umwèpelè ùdi ukwambila ne wêwè udi nganyì, kûdì mufùmìne, ne kûyaayà (Èyowà’s, mukalenge.), m’Mukàndà mubènèshiìbwè wà kale ewu, kaa, aci’s cìdi cimfikisha ku diMunanga. Kàdi nwénù?

Diitabuuja mu Taatù, diitabuuja mu Mwânà,
Diitabuuja mu Nyumà Mwîmpè, basatu aba
bàdi Umwe;
Démôns neyìzakalè, ne bangènzàmpèkààtù
nebàtabulukè;
Diitabuuja mu Yèhowàh dìdi dinyukusha cintu
kanà cyônsò.

³⁹⁶ Amen. Ndítùkù kaayipu dinène dìdì kumpàla kwètu, balunda bàànyi’s! “Dibuulula dyà Yesù Kilistò divwà Nzambi mupèèshe mwanjèlo Wendè, ne mulwè ne mudijaadikile Yone,

bwà byàmònaku mwà kumanyikila ku Bikondo byà Èkèleeziyà, cintu cidi mu cibucilu bwètù twètù aci.”

³⁹⁷ Mukalenge àtùbènèshèku mpindyewu, patudi tujuukila kuulu apa. Nènku ewu yônsò udi wimba pyano awu, utupeku cyona tûng bu wêwè mwà kuswa, *Angata Dînà Dyà Yesù Wendè Naadì*.

³⁹⁸ Mpindyewu tèèlejàayi. Kudi, kakuyi mpatà to, kudi beenyi mwaba ewu munkaci mwètù mu tabernacle emu mu dindà emu. Ndi muswè bwà nubàlabulè ku byanza. Nubàbiikileku, nuye naabu mu mèènù, ne bikwàbò kàbìdì. Nènku nwàkìdileku muntu yônsò bímpè. Ndi muswè bwà bantu bônsò biikale batwishiibwe bwà kwenza nànku.

³⁹⁹ Nènku nwavùlukaayi ne disangisha nedìtwàdiye pa dîbà mwandamutekète jaajaaja, dilòòlò edi. Nènku pa dîbà mwandamutekète ne tusunsa makumi àsàtu, nêngàkulè pa *Cikèènà-kumònà Cyà Mu Patèmò*. Maalaba dilòòlò, bu Mukalenge mwà kwanyisha, nêngàkulè pa cikondo cyà kumpàla cyà èkèleeziyà, Efeso, cyà Cikondo cyà Èkèleeziyà.

⁴⁰⁰ Mpindyewu netwimbè *Angata Dînà Dyà Yesù Wendè Naadì*, kaamusambu kètù kakesè kàà mu tabernacle kàà ditangalajangana naaku aku. Nènku muntu ne muntu imbè mpindyewu. Eyo.

Angata Dînà dyà Yesù wéndè naadi,
Wêwè mwânà wa tunyinganyinga ne dikènga;
Nedikupè disankà ne busambi,
Nda naaDi kwônsò kûyaayà.

Dînà dyà mushinga, Éyi dyà bupolè be!
Ditékemena dyà buloba ne disankà dyà Dyulu;
Dînà dyà mushinga, (Dînà dyà mushinga!) Éyi
dyà bupolè be!
Ditékemena dyà buloba ne disankà dyà Dyulu.

⁴⁰¹ Mpindyewu kumpàla kwà twètù kwimba cituminyi cidi cilondà, ndi muswè bwà ba-Méthodistes, ba-Baptistes, beena Mpenta, beena Kâtòlikè, ba-Nazaréens, ba Pèlerin de la Sainteté, bwônsò kwòlolola ànu cyanza cyanàànà, kulabulangana ku cyanza ne muntu kampànda udi kumpàla kwèbè, ku luseke lwèbè, lwà paanyimà pèèbè apu awu, wamba ne: “Mwena Kilistò mwena lwendu naanyì, mulunda wanyì, ndi ne disankà dyà kwikalaku neebè kaaba aka mu dindà emu. Ndi ne disankà dyà kwikalaku neebè mu bwobùmwè, banyungùlùkile maalu à Nzambì. Ndi mumanye ne tudi bapete cikondo cyà dicyònkomoka. Ndi ntékemena ne nènnümònè cyàkàbìdì mwab’ewu dilòòlò edi.” Cintu cyà mùshindù bu nànku, panùdì nulabulangana ku cyanza ne bantu apu, kumpàla kwèbè apu, paanyimà pèèbè apu, ne eku ne eku.

Twinamina Dînà dyà Yesù, (Tumònangane
dilòòlò edi, Mwanèètù Neville. Tumònangane
dilòòlò edi.)

. . . makàsà,

Mfùmù wa bamfùmù, mu Dyulu, netùMwase
cifulu cyà butùmbi,
Pààjika lwendu lwètù.

Kaa, Dînà dyà mushinga, Éyì dyà bupolè be!
Dítèkemena dyà buloba ne disànkà dyà Dyulu;
Dînà dyà mushinga, Éyì dyà bupolè be!
Dítèkemena dyà buloba ne disànkà dyà Dyulu.

Too ne patwàsangilà! too ne patwàsangilà!

Too ne patwàsangilà ku makàsà à Yesù; (Too ne
patwàsangilà!)

Too ne patwàsangilà! too ne patwàsangilà!
Nzambi ikalè neenù too ne patwàsangilà
cyàkàbìdì!

Mpindyewu patùdì twinyika mitù yètù apa:

Too ne patwàsangilà! too ne patwàsangilà!



DIBUULULA DYÀ YESÙ KILISTÒ LUA60-1204M
(The Revelation Of Jesus Christ)

DILONDANGANA DYÀ MALONGESHA PA DIBUULUDIBWA DYÀ YESÙ KILISTÒ

Diyiisha edi dya Mwaneetu William Marrion Branham dyakayiishiibwa bwa musangu wa kumpala mu Anglais mu dyàlumingu mu dìndà, matùkù 4 à ngondo wa cìswà-munène, cidimu cyà 1960, ku Branham Tabernacle mu Jeffersonville, mu Indiana, U.S.A. Ndyumusha pa mukaba wa mèyi ne dituuta ku cyamu mu kaabujima kààdì mu Anglais. Nkudimwinu wa mu Ciluba ewu mmutuuta ku cyamu ne mwabanya kùdi Voice Of God Recordings.

CILUBA

©2023 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Dîyì dya bwena-cintu

Makenji ônsò tudi badilaminyine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwè anyi bwa kupeeshangana, kabiyi bya mfranga to, bu cintu cya kutangalaja naaci Evanjeeliyo wa Yesu Kilisto. Mukanda ewu kawenaku mwa kusumbishiibwa, kuvudijiibwa bya bipitepite, kwediibwa mu cibànzà cya lüntândalà, kulamiibwa mu cikàlwîlà, kukudimunyibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyì wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bîngà bintu bitudi naabi, anyisha webeje:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org